

N<sup>o</sup> 37

29,120 / B / 1

J xxxviii

18/6



No 371





FRID. HOFFMANNI

Consiliarii Reg. Boruss. Int. & Archiatr.  
Prof. Med. Prim. in Acad. Hall. ejusque Sen.  
Com. Pal. Cæs. Imperat. Carol. Petropolit. &  
Pruss. Acad. Scient. Sodal.

TRACTATUS


Huc usque seorsim nondum editus,

DE

MORBIS  
INFANTUM  
PRÆCIPUIS.

Accedit

VITA AUCTORIS.



B A S I L E Æ,

Impensis JOHANNIS CHRIST. 1741.

Digitized by the Internet Archive  
in 2019 with funding from  
Wellcome Library



# CONSPECTUS CAPITUM.

## C A P. I.

*De morbis infantum in genere.*

## C A P. II.

*De regimine recens natorum & præ-  
servatione à morbis infantilibus.*

## C A P. III.

*De torminibus infantum & flatu-  
lentiis.*

## C A P. IV.

*De aphthis.*

## C A P. V.

*De pathematibus ex dentitione dif-  
ficili.*

## C A P. VI.

*De epilepsia & convulsione.*

## C A P. VII.

*De variolis & morbillis.*



C A P. VIII.

*De tabe seu atrophia infantum.*

C A P. IX.

*De rachitide.*

C A P. X.

*De vermibus.*

C A P. XI.

*De aliis infantum morbis.*



FRIDERICI HOFFMANNI  
TRACTATUS  
DE  
MORBIS  
INFANTVM  
PRÆCIPUIS.

CAPUT I.

*De morbis infantum in genere.*

§. I.

**T**OT tantisque proh ! dolor mi- *Instituti*  
feriis undiquaque cinctum est *ratio.*  
mortale hominum genus , ut  
pervideri nequeat , quæ cura ,  
quæ sollicitudo & diligentia sufficere  
possit ad impetum tot simul & diversi-  
mode

mode invadentium morborum aver-  
tendum, aut quis artium apparatus  
jam intricatas malignitate partes ex-  
pedire, suæque restituere integritati  
valeat. Docent hanc nostram fragilita-  
tem suo inprimis exemplo infantes  
recens nati, qui vix cum ejulatu mi-  
seriam hanc salutarunt, quum jam in-  
numeris obsessi periculis de salute quo-  
tidie decernere coguntur. At vero, quo  
majora & frequentiora impendent pe-  
ricula, eo fane minus huic teneræ &  
tantum non omni orbata præsidio æ-  
tati concessum est, remedia tollendis  
morbis idonea conquirere, aut mali sui  
conditionem & magnitudinem indica-  
re; nisi forte miserrimo ploratu, aliis-  
que obscuris signis aliorum misericor-  
diam moveat. Quæ cum ita sint, quam  
maxime videtur medico salutis hu-  
manæ cupido convenire, ut ingenuo  
attentoque studio imbecillæ ætatis cau-  
sam suscipiens perite disquirat, quæ  
mala hanc ætatem adgredi soleant,  
quibus signis dignosci & quasi prædici  
queant, qua cautione præcaveri, &  
demum qua arte, quibusque præsidiis  
debellari debeant? Atque his inductus  
rationibus ego post tot labores in  
medicina perpolienda feliciter exant-  
latos



latos non potui omittere, quin etiam opusculo de infantum ægritudinibus conscribendo mentem manusque ad-moverem; præsertim cum ab aliis, qui in eodem studiorum genere de-sudarunt, multa aut intacta & non satis digesta, aut certe emendatione quadam digna relicta deprehenderim. Nec minorem mihi fructum ex hoc meo suscipiendo labore polliceor, quam quem, Deo annuente, jam ex reliquis medicinæ meæ systematicæ tomis satis abundeque conspexi: si-quidem non vana, non imaginaria & falsis opinionum commentis fun-data, sed vera, & tum rationi, tum experientiæ conformia proponam, quæ in artis exercitio per dimidium sæculi & ultra occupatus constanti meditatione & observatione didicisse gaudeo.

§. II.

Primo autem omnium præcipui in-  
fantum morbi erunt indicandi, antequam  
ad causarum nexum, ex quo illi pro-  
deunt demonstrandum, nos accin-  
gamus. In quo quidem perficiendo  
ducem eligere placet præstantissimum  
artis nostræ parentem, HIPPOCRA-  
TEM, qui ætatis morbos *lib. III. aphor.*

*Historia  
morborum  
infantum  
ex Hippo-  
crate.*

XXIV. XXV. & XXVI. ita pro more suo eleganter & concise describit: *Qui in ætates cadunt morbi, hujusmodi fere sunt: puerulis & nuper in lucem editis aphthæ, vomitiones, tusses, vigilæ, pavores, umbilici inflammationes, aurium sordes humidæ, quibus nos ventristormina addimus, sunt familiares: cum jam dentire cœperint, gingivarum molesti pruritus, febres, convulsiones, diarrhææ maximeque cum edunt caninos dentes, & iis præsertim, qui inter pueros crassissimi sunt, alvoque adstricta, eveniunt. At vero, cum ætate processerunt, quod ab anno quarto ad decimum usque & longius intelligendum est, tonsillarum inflammationes, vertebræ, quæ est ad occiput, introrsum luxationes, asthmata; calculi, lumbrici rotundi, ascarides, verrucæ pensiles, satyriasmus, stranguriæ, strumæ & alia tubercula, præcipue vero prædicta male, adficiunt. Hæc qui altius secum reputat, facile perspiciet, cuivis infantum ætati morbos quosdam esse familiares, qui corpus aliter atque aliter adficiunt, longius vel brevius durant, & plus minus periculi præfagiunt. Siquidem mutata corporum propter ætatem textura mutatoque vivendi genere, non potest non*

non ipsa subjectorum ad suscipiendos morbos dispositio immutari & postera ægritudinum ratio à pristina valde recedere. Quamobrem etiam, si de infantum adfectibus differendi animus est, simul omnes ætatum periodos debemus complecti, minimeque omnium strictiori tantum sensu infantes in lucem vix editos considerare; sed proveciores etiam, qui ad decimum usque annum pervenerunt, intelligere, ne forte aliud morbi genus explicemus, aliud silentio prætereamus.

§. III.

Sic igitur ex HIPPOCRATE puerorum morbos enarravimus præcipuos, quorum nonnulli quidem per se statim patent, nonnulli autem difficiliter cognoscuntur; quare proxime jam supeditanda erit accuratior illorum diagnosi; quæ tamen adeo difficilis, abscondita & inexpedita est, ut sæpe vel oculatissimi in dijudicando hallucinentur. Neque enim pueruli ipsi ob vocis articulatæ defectum, morbi sui indolem & nocendi potentiam nobis possunt enarrare, neque ex urina vel curiosissime examinata, neque ex pulsuum ictibus, vel accuratissime observatis, neque tandem ex

*Diagnosis.*



habitu externo , qui ut facile in pejus, ita subito in melius mutatur , firmum stabileque iudicium potest desumi. Nam urinæ minimorum recte valentium perinde ac morbo quodam laborantium sæpe sunt crassæ & turbidæ , & pulsus ab innumeris fere causis potest mutari , & vel accelerari vel retardari , ut explorantibus plerumque imponat. Ne autem utraque ex parte dubius relinquatur artifex, mulierculæ adstantes , quæ curam pusillorum gerunt , probe sunt explorandæ: an infantes ejulatus edant, corpus inquieti jactitent , & vigiles diem noctemque transigant ; an ructus sive acidos sive nidorosos explodant , vomendi conatus ipsosque vomitus , & quales habeant ; an singultu nervorumque agitationibus convellantur , an tussi & respirandi difficultate laborent , an flatus & feces libere dimittant , quem excrementa colorem referant , quam consistentiam habeant & similia? Præter hæc vero, inquirenti medico permultum accendetur lucis , si corpus a capite ad calcem inspiciens probe examinet , an extrinsecus rubedo cujusdam partis inflammatoria , an quædam exanthematum species , aut aliud vitium se manifestet ;

nifestet ; item si ore diducto disquirat, num fervidum halitum tenelli emit- tant , fauces pustulis obsessas habeant , vel gingivæ quadam intumescencia & phlegmone laborent. Siquidem ex his omnibus tanquam ex principiis cognitis ad incognita non obscure li- cet concludere.

§. IV.

In caufarum serie explicanda à vero haud aberrabimus , si causam adfectuum infantilium formalem & materiale*m* 1) tam in habitu corporis laxo & mol- liori , quam in redundante succorum pituitosorum copia admodumque deli- cato fibrarum & membranarum sensu reponimus Etenim , quum in prima hac ætate solidæ partes propter mol- lissimam , qua gaudent teneritudinem fluida non satis vegete possunt pro- pellere & per tenuissimos canalicu- lorum ductus circumagere ; facile in- de potest sanguinis & humorum cir- cuitus retardari , & saluberrimum ex- cretionum negotium cohiberi ; quod si accidit , non tantum succi magis magisque copia increscunt , verum etiam spissi evadunt , & crasin plane alienam salino-acrem adsumunt. Quid vero inde ? ex tali humorum plenitudi-  
ne

*Causa pro-  
xima est  
1) debilitas  
& sensibili-  
tas generis  
nervosi.*

ne non modo fiunt stagnationes variæque fluidorum subsistentium corruptellæ, sed etiam à nervorum subjacentium pressione aut distensione violenti concitantur spasmi, quorum vehementia omnes tam solidæ quam fluidæ partes cum tota functionum œconomia perturbantur, & tenella infantum corpora, quæ ad recipiendas vel levissimas impressiones valde disposita sunt, in morbos & repentinos & vehementes conjiciuntur facillime. Neque adeo difficilis erit labor, ex jam allegatis phœnomenis præcipuarum ægritudinum infantilium veras reddere rationes. Supposita enim humorum pituitosorum abundantia & stagnatione, facile potest concipi, quam ob rem ad crebriores defluxiones catarrhales, rheumatismos, pectoris oppletiones, liquidas alvi dejectiones & diarrhoeas, tumores glandularum, aurium fordes humidas & similes affectiones tenera ætas sit proclivis. Supposita succorum depravatione & acrimonia facile patet, cur frequentius aphthis, variisque cutis exanthematibus pueruli adficiantur, & supposita demum exquisita nervosi generis sensatione, clare apparet, cur tam vehementibus partium tam  
inter-



internarum quam externarum torsionibus ac spasmis torqueantur, si vel levissima irritationis causa præcefferit. Ita enim propter sensibilem fibrillarum intestinalium texturam in dolorifica ventris tormina, in permolestas ventriculi & intestinorum distensiones, atque periculosas angustias incidunt; propter facilem membranarum, cerebrum & spinalem medullam investientium irritationem percrebro motus epilepticos & convulsivos artuum subsultus experiuntur; propter tenuissimas nervorum propages ad pulmonum viscus decurrentes sæpissime tussi convulsiva & asthmate cum suffocationis metu conjuncto, ac demum, ob exquisitum tunicarum sensum, quæ intus ori obtenduntur, pessimis symptomatibus ex dentitione difficili laborant.

§. V.

Neque dein 2) in constituenda 2.) *acidum prævalens.*  
causa materiali parum valet acidum longe multumque præpollens, cui optimus morborum infantilium interpret D. D. HARRIS tantum tribuit, ut omnes fere ac singulos adfectus teneræ ætati familiares inde deducere nullus vereatur. Et profecto in plurimis

mis tam ex ructibus & vomitibus acidum redolentibus quam ex fecibus potest suboleri, aut vel ex eo satis dijudicari, quod non modo lac, unde vivunt infantes, perfacile acefcit & coagulum subit, verum etiam ipforum succi, qui tenues atque lymphatici sunt, vix magis in aliam, quam in acefcentem diathesin inclinant. Sicut enim paulo proVectioris ætatis homines, phlegmatica temperatura præditi, magnaue succorum pituitosorum copia turgidi, in nocivam lymphæ coagulationem præ aliis proni existunt, admodumque facile in purpuram albam, quæ ejus progenies est, incidunt; ita eo minus dubitandum est, quin in infantibus acida humorum intemperies longe citius faciliusque possit contingere.

## §. VI.

*Causæ remotæ debilitatis sunt: Dispositio hæreditaria.*

Proxime nunc etiam causas inspiciamus procatarcticas. Jam quidem, si debile solidorum robur intuemur,prehendimus, omnes omnino infantes & sua ipsius natura adultis esse debiliores, & sensatione magis exquisita præditos; nihilo minus tamen causæ quædam subesse debent speciales, quæ præcipue ad insignem generis nervosi debilitatem & mobilitatem con-

contribuant, ut in his magis, in aliis minus perversi motus cieantur. Nihil vero, me iudice, ex omni causarum classe magis huc confert, quam dispositio quædam hæreditaria, à parentum alterutro in sobolem propagata: quare sæpissime usu venire solet, ut à parentibus non ita bene valentibus, aut crebriori veneris usu & rerum abstrusarum investigatione confectis, aut senio fractis, aut luxu corruptis infantes progignantur, qui à primo conceptionis actu infirma valetudine utuntur, & vitia quædam connata habent, quæ nulla unquam arte aut solertia possunt removeri. Id quod nisi obstaret, minime nos haberemus tot ubique podagricos & calculosos, qui suæ miseriæ solatium anxii apud medicos frustra quærunt.

§. VII.

Si qua autem labes mediante generatione in teneram progeniem traducitur, à matre profecto uterum gerente hoc maximam partem fieri solere deprehendimus. Dici enim vix potest, quantum prægnantium plurimæ, nisi maximo virtutis studio teneantur, in appetitus omnino depravatos pronæ sint, quamque in-

anibus



anibus curis, vagis desideriiis & imaginationibus, terrore, timore, mœstitia, iracundia, fastu, vindictæ cupidine, aliisque mentis motibus agitentur: unde non potest non sanguinis circulus vario modo turbari atque tenerrimis & quasi adhuc tremulis foetus staminibus inimica quædam vis imprimi. Idem mali pertimescendum est, si genitrices intemperantiæ deditæ multis cibis, iisque sæpe incongruis, ventriculum obruunt, aut potibus spirituosus plethoram sub graviditate collectam sæpe commovent, nec tamen ejus copiam venæ sectione detrahi patiuntur. Quo etiam illæ pertinent foeminæ, quæ motibus hystericis valde sunt obnoxia, & peracta conceptione viros crebrius admittunt; siquidem frequentior coitus, nonnullorum testimonio, ad morbosam debilemque prolem gignendam permultum conducere creditur.

## §. VIII.

.. debilitatio in ipso partu.

In ipso etiam partus labore tenera proles sæpe infirmatur, dum aut matres segnitie sua foetus exclusionem retardant, aut impatientia accelerant. Idem perficitur remediis calidis partum promoventibus, aut ab incon-

sulto

sulto obstetricum ministerio per violentam foetus extractionem, & qualemcunque læsionem; siquidem ab improvidis istis mulierculis futuræ capitis laxæ cohærentes ita sæpe comprimuntur, ut inde epilepsiæ, paralyses aliaque horrenda mala cum mortis periculo conjuncta concitentur.

§. IX.

In infantibus utero jam exclusis perfacile etiam sensibiles nervorum fibrillæ ad anomalos motus stimulantur, si quando aut ipsi pusilli terrore quodam inopinato, ut per repentinos clamores, excitationem ex somno, item per jocosam nutricum impressionem, verbis & gestibus factam, percutiuntur; aut si lactantes pravo quodam animi affectu & maxime quidem terrore ac iracundia perturbatæ fugentibus mammas nimis cito offerunt. Hinc nihil est solennius, quam quod varii generis spasmi, nervorum vellitationes, arrosiones, ardores, torminosi intestinorum dolores & inflationes &c. presso, ut ajunt, pede excipiant, quæ se per inquietudinem, vigilias, manuum pedumque jectigationes, pavores, ejulatus, imo etiam

*- animi affectus in matre & prole.*

per epilepticas convulsiones abunde satis manifestant.

## §. X.

-- aeris  
mutatio-  
nes, inpri-  
mis frigus

-- regimen  
nimis cali-  
dum &  
medica-  
mentorum  
usus

Præter hæc vero in debilitando commovendoque solidorum robore multum sibi vendicat excessiva aeris, præsertim frigidi intemperies, aut subitaneæ caloris & frigoris se invicem excipientium vicissitudines, quæ sicut natu grandioribus nervorum quadam imbecillitate laborantibus, ob transpirationem suppressam, ingentem in modum adversantur: ita longe magis infantibus, qui aeris injurias ipsi proletare nesciunt, maxima minantur damna. Nec denique è contraria parte excludendum est nimis curiosum, calidum & delicatum tenellorum regimen, item crebrior medicamentorum sine necessitate usus. Tali enim ratione non modo infantes liberioris aeris insueti vel levissimas auras ægrius ferunt, verum etiam à medicamentis, præsertim activioribus ipsorum natura valde plerumque alteratur, & in moderandis motibus perturbatur. Et cum honoratiores præcipue ac divites pessimum hunc morem teneant, plane non mirum est, cur ipsorum liberi longe debiliores sint,



sint, longeque frequentius ægrotent, quam pauperum, his adminiculis destitutorum.

§. XI.

Hæc autem omnia non solum de pueris lactentibus valent, sed etiam eodem jure de illis intelligenda erunt, qui ætate jam paullo processerunt. Debilitato enim solidorum robore & concepta aut in utero materno, aut ex vitio nutricis ad morbos dispositione; facile judicari poterit, nec minores nec pauciores morbos, facta etiam ab lactatione, posse succedere; sicut proh! dolor innumera puerorum male afflictorum exempla docent luculentissime.

§. XII.

Causæ, quæ ad ingignendum acidi proventum conferunt, iterum variæ sunt, atque ex his etiam nonnullæ, quas jam enumeravimus. Quam maxime autem huc referre decet omnia, quæ lac aut in ipsa nutrice aut in fugentibus corrumpunt, idque crassum & impurum efficiunt, aut in coagulum prorsus condensant. Id quod ex parte nutricum variis modis potest accidere, & maxime quidem, si ipsæ, præter inordinata animi pa-

*Causæ remotæ ad acidum contribuentes ex parte lactantis*

themata , fructus horæos , caseum , acetaria , acida , acria , & falsa copiosius ingerunt , vinaque acida & spiritum vini liberalius hauriunt. Siquidem his omnibus lac viscidum & crassum ingeneratur , quod infantibus oblatum facile acefcit & non modo ad pertinaces primarum viarum & mesenterii obstructions disponit , verum etiam calculi in vesica generationem , quæ non infrequens huic ætati est , oppido promovet : ne dicam largiori spirituosorum usu lac repente æstum concipere , & per mammas lactentibus transmissum febres ardentes posse accendere. Neque sola ciborum qualitas , sed quoque excedens ipsorum quantitas valde nocere solet ; dum se nutrices cibis , quamquam optimis , supra modum saginant , vel cereviasias consistentiores easque parcius bibunt , neque tamen corpus sufficienti motu exercent , sed in alto potius otio commode vivunt : qua ratione non potest non crassior lacti consistentia conciliari , idemque salutis dispendium induci. Similem nocendi potentiam habet validum frigus , improvide mammis admissum ; utpote quod lactiferos mammarum tubulos

bulos coarctando, lac ad spissitudinem haud parum disponit. Præter hæc vero lacteus ille liquor ingentem in modum alteratur & ad pravam indolem in sugentium ventriculo suscipiendam disponitur, si quando matres vel nutrices lasciviores durante lactationis tempore mariti amplexus intempestivos admittunt; aut si menstrua, quæ in gravidis & lactantibus ordinario cessant fluxu fluere incipiunt. Tum enim parvuli plerumque languidi, lacrymosi ac imbecilles fiunt, suisque gestibus satis indicare videntur, lactationem tam diu esse differendam, donec, obturato hoc fonte sanguineo, pristinus matri vigor redeat. Neque demum lac parum corrumpitur, si nutrix passionibus hysteris patet, alvo adstricta laborat, & ob spasmos ac flatu in primis viis collectos variæ sanguinis & humorum ad varias corporis partes congestiones producuntur.

§. XIII.

Ex parte infantum multa pariter -- *ex parte infantum*  
accusanda veniunt. Inprimis autem valde lædi solent, si nimium alimenti accipiunt, & quodocunque male habent, præter voluntatem mammas exhaurire debent, vel etiam si pulticu-



lis viscidioribus plus justo infarciuntur. Quando enim infantes, iique præfertim teneri ac parvi, tantam molem in ventriculo non satis possunt subigere; hæc plerumque in acidum magna facessit, unde tonus ventriculi & intestinorum destruitur, maximaque sanitatis damna, ut fere sunt inflationes stomachi cardialgicæ, pectoris angustię & similia in teneram prolem derivantur. Quam in rem egregia sunt, quæ B. ETTMULLERUS in dissertatione, quam *valetudinarium infantile* inscribit, ex vero protulit: *lactis superflua & tantum non coacta infusione matres pueros suos nimis alendo sæpe necant, & dum lactant, maculant. Sicut enim omnis nimia repletio, ut panis adultis, sic lactis recens natis pessima est. Sic quoque valde peccatur, si cibi varii & sæpe incongrui, acidi, acres, falsi, multæque carnes præter necessitatem devorantur, vel si vinum, ut pancraticus mos est, ad roborandum & ploratus componendos sæpius propinatur: siquidem hæc lacti admixta coagulationem inducendo, ventriculum valde infirmant, variosque morbos excludunt. Quo demum pertinet crebrior lactis cum nutricibus mutatio. Sicut enim adulti non*

non æque bene mutationem potus & cibi ferre possunt ; ita hoc similitudine longeque magis de sensibilibus infantum corporibus prædicandum esse per se liquet.

§. XIV.

Hæc omnia lactationis tempore commissa plerumque etiam in pueros ablactatos redundant , aut certe tumorem temporis vim suam sanitati adversam exserunt , maxime cum , neglectis diætæ regulis , à teneriori alimento ad crassius , ad carnis esum variaque incongrua subito transcendunt ; utpote in his omnibus præcipuum morborum puerilium fundamentum residet.

§. XV.

In prognosi ferenda primo omnium probe tenendum esse arbitror , quod *Prognosis.* infantes , qui non à teneris , delicatis corporeque & animo morbidis parentibus , inprimis matribus geniti fuerunt , præ aliis corpore & animo firmi , vegeti atque robusti esse soleant , nec tam facile damna à rebus externis rependant , neque morbis tam cito implicentur , aut etiam impliciti feliciter inde evadant. Idem fieri deprehendimus , si bene valentes non

adeo bene & delicate in victu & regimine observantur, sed tempestive perferendis mutationibus successive adsuefiunt. Possunt enim consuetudine à teneris ita formari & quasi indurari, ut ne ab externis injuriis tam facile lædantur: sicut quam maxime in infantibus rusticorum & ex infima plebe natorum videre licet, utpote qui neque sanitatis incommoda tam repente suscipiunt, neque morbis tam graviter & tam diu, quam quidem magnatum delicatuli, laborant. Tum quoque sciendum est, omnes infantum morbos, licet innumeri sint, faciliorem promittere sanationem, quam adultorum, si rite illa instituatur. Nam prout tenerrima infantum corpora à rebus adversis facillime impressionem recipiunt nocivam; ita è contrario à medicamentis & rebus naturæ amicis libenter admittunt meliorem, ut ideo tot puerorum funera deplorare non opus esset, nisi sæpe medici ipsi nocendo ista pararent. Præter hæc constantis est observationis, infantes corpulentiores & spongiosiori carne præditos, item qui lacte copioso vescuntur, aut nutricem habent succi plenam & corpulentam, præ aliis frequen-



frequentius morbis adfici, maximeque rachitidi, tussi convulsivæ & aphthis esse obnoxios; cum contra macilentiores frequentius febribus & inflammationibus pateant. Qui alvi sunt fluxilioris, plerumque melius se habent, quam qui sunt adstrictæ: & demum cum convulsivi membrorum subsultus, epilepsiæ & tormina maximam infantum partem vita privent; sciendum est, pessimum indicium, si ista mala cum diuturnis vigiliis sint stipata.

## C A P U T II.

*De regimine recens natorum & præse-  
vatione à morbis infantilibus.*

### §. I.

**Q**Uicunque avertere cogitat gra- *Instituti*  
viores infantum morbos, præ- *ratio.*  
cipue omnium eo debet re-  
spicere, ut à primo nativitatis mo-  
mento omnes abigat causas, quæ  
morbos possunt ingenerare, tenera-  
que infantum corpuscula periculis  
obicere. Operæ itaque pretium fore  
confido, si in præsentī capite breviter  
strictimque doceam, quæ circa victum,

regimen cæterasque res non naturales tam ex parte infantis , quam nutricis tenenda sint , ne forte imprudenti horum usu innocui infantes pessimum multorum morborum fomitem extra omnem sui culpam nimis cito suscipiant , atque prima mox ætate fundamenta valetudinis labascentis jaciant. Multo vero magis hæcce doctrina videtur necessaria, quia generalia quædam præmonenda sunt , quæ deinceps in speciali cujusvis morbi explicatione abhinc repeti & in usum converti poterunt, ne unum idemque proferre opus habeamus.

## §. II.

*Infans abluendus & roborandus.*

Quamprimum in lucem editus est foetus , statim debet post vasorum umbilicalium ligaturam & rescissionem , in balneo tepido ablui , quod vel ex sola aqua , vel ex aqua & vino simul mixtis paratur, huncque simul usum præstat, ut æqualis sanguinis distributio per totum corpus promoveatur. Inter hæc quoque obstetrici commodus conceditur locus & tempus , ut, si quid à partus laboribus male conformatum in capite aut aliis corporis partibus compareat, ab eadem in melius effingatur & in naturalem formam restituatur. Quare  
artus

artus omnes blande contrectando explicet, crura & pedes sæpius contrahat & expandat, ut, quid in articulis mucii vel lentoris residet, dissipetur: neque minus inferiorem partem ventrem vola manus frequenter mulceat, & partes excretionibus dicatas leniter fricando ad fordium eliminationem excitet. Tum vero ante omnia dispiciendum est, an firmus, robustus & perferendis mortalium vicissitudinibus idoneus, an vero debilis ac infirmus sit partus. Id quod vel ex debili ejus voce & respiratione, vel exinde judicare licet, si ipsa mater puerpera teneræ morbidæque est constitutionis, & sub graviditatis decursu variis corporis animique ægritudinibus male fuit affecta, si agitatio foetus in utero adhuc existentis debiliior justo se manifestavit, vel si partus difficilis & ante justum pariendi tempus septimo aut octavo mense contigit. Siquidem his omnibus infantes multum infirmantur, & ad morbos redduntur proclives, dum ex sapienti CELSI effato imbecillitas omnibus morbis patet. Quod si igitur recens natus præter naturam debilis ex dictis signis concluditur, utique eundem  
refo-



refocillare expedit: quod optime perficitur, si more inter obstetrices recepto in vino tepido abluatur, leniter fricetur, pectorique, dorso & vertici spiritus quidam analepticus inungatur, vel si halitus caryophyllis aromaticis, aliisque aromatibus mastiatis vigoratus ori inspiretur, vel pauxillum vini Rhenani vel aquæ cinnamomi infundatur.

## §. II.

-- *decenter  
involven-  
dus*

At vero, quum tener quoque partus ab aëris injuriis mollibus linteis & commoda fasciarum involutione præmuniendus sit, probe cavendum est, ne ex negligentia vel ignorantia damnum inferatur, & magnorum successu temporis malorum causa stabilatur. Præterquam enim, quod infantes sæpe ex nimia pectoris per fasciam constrictione gibbi fiant, & tabem incurrant, vel sæpius vomant & herniosi evadant; multa etiam impeditæ circulationis incommoda vagitusque nimii ab imprudenti arctoquo nimis corpus tenelli involvendi modo proveniunt.

## §. III.

*Meconii  
expurgatio  
mediante  
respiratio-  
ne,*

His ita observatis proximum est, ut infantes, qui ob denegatam alvi  
in

in utero exonerationem , intestina multis fordibus repleta in lucem afferunt , tempestive expurgentur , jam vero ipsi quam primum spiritum ducere aëremque ambientem pulmonibus haurire inchoant , mutua illa & crebrius repetita diaphragmatis musculorumque abdominis actione non modo ventriculum & intestina sua comprimunt , contentasque in ipsis feces ad exitum disponunt , verum etiam hoc salutari respirationis actu bilem in intestina , maximeque in duodenum urgent , quæ dein propter virtutem , qua pollet , abstergentem & stimulantem sensibiles intestinorum membranas leniter irritando ad majorem contractionem & excernendas fordes animat , ut non raro vomitibus & alvi defectionibus sponte obortis tenacia ista recrementa ejiciantur. Quod -- <sup>Et colo-</sup> <sub>stro.</sub> autem si minus etiam contingeret , & debilis tenellorum natura non sola sibi sufficeret , singulari divini Numinis providentia factum est , ut puerperis lac primum tenue , serosum & subdulce , quod colostri nomine insignitur , concesserit , cujus abstergens diluensque facultas melius longe ac tutius , quam sæpe selectissima evacuantia ,

quantia , alvum subducit. Et licet ex medicis plurimi colostrum , ceu lac impurum teneroque infantum ventriculo summe nocivum rejicere suadeant ; aliter tamen ego contraria inductus experientia , statuo , & nulla inde damna pertimescenda credo , nisi fortasse lacteus ille liquor ex impurò fonte promanet , dum puerpera vel contagio est infecta , vel jam ante partum insigni quadam sanitatis labe laboravit , vel sub duris partus laboribus convulsivis agitata fuit motibus , & adhuc male habet , vel si quando aliæ concurrunt circumstantiæ , quæ tale medicamentum à natura ipsa in mammis mulierum elaboratum interdiciant.

## §. IV.

-- median-  
tibus la-  
xantibus.

Quod si autem papillulæ mammarum matris lactantis sint exiguæ , ut tener lactens easdem ore suo haud commode excipere , & non nisi vehementi attractione quidquam ex iis alimenti elicere possit , aut si essent crassæ nimis , ut ipsas capere nequeat ; vel etiam si mater puerpera partum lactare recuset , aut lac in mammis non satis cito concipiat ; tum omnino primis viginti quatuor horis aliis interea congruis laxantibus alvum à meconio suo



suo liberare præstat, quam mox post partum nutrici robustæ & obesæ infantem fugendum tradere. Et enim quum lac foeminarum, quæ diu jam lactarunt, plerumque spissioris sit indolis multumque alimentosæ & pinguis substantiæ contineat, non potest non tenellus ventriculus valde eodem obrui, & inde cruditati acidæ lactisque coagulo promtissima suppeditari occasio. Sunt autem varii alvum ducendi modi. Sic enim plebs nostra tum usu, tum medicorum præceptis edocta mel cum butyro non salito vel saccharum Penidium cum oleo amygdalarum dulc. primis à partu diebus propinat. Galli ac Batavi vinum cum saccharo edulcoratum, alii alia eodem scopo haud infelici successu offerunt. Sed quia intentioni hæc non semper respondent, optime tum in parva quantitate efficaciora, ut syrupus rosar. solutivus, cichorei cum rheo, florum persicor. manna cum aliquot cremor. tartari granis in jusculeo data & similia conducunt. Neque mihi illorum displicet ratio, qui eodem laxandi fine leniora suppositoria, aut, minus his quidquam efficientibus, clysteres commendant

mendant. Intestinum enim rectum in infantibus tam exquisitæ est sensationis , ut leviter saltem vellicatum feces contentas cito reddere soleat. Unde *B. Boerhaavius* in *aph. de cognoscendis & curandis morbis* §. 1347. clyisma ex fero lactis saponato aut mellito recte injicere suadet.

§. V.

*Obiectio dirimitur.*

Enimvero sunt ex medicis nonnulli, qui meconium non tam cito expurgandum esse contendunt ; quia nulla facile impuritas ante conceptam acrimoniam & nocendi aptitudinem è corpore ejicienda esset , nullaque ratione ostendi posset , quomodo hæ infantum feces , quæ per tot menses sine ulla noxa intestinis inhæsiscent , statim ut noxiæ cathartico expelli deberent. Et , profecto , re penitus examinata ,prehendimus , qualitatem tam acrem & venenatam meconio non inesse , ut vulgo putatur. Illud enim per tot menses in tenerissima alimentari fistula fovetur , neque tamen intestinorum inflammationem aut rosionem parit , neque ad excernendum illa irritat , nec colon , quod sua copia potissimum replet , ad cellularum elevationem valvularum-  
que

que contractionem stimulat : neque etiam putredine concepta foedos flatus & exhalationes emittit , nec calore exsiccatur , sed , ut sectiones infantum statim à partu mortuorum institutæ docent , consistentiam mellis habet & odore caret. At vero licet ipse ego præmaturam & coactam infantum purgationem jure rejiciam ; aliud tamen statuendum esse arbitror , si neque infantes suo ipsius robore , neque colostri adminiculo impuras fordes à matris nutrimento residuas eliminare valent. Tunc enim omnino leni stimulante succurrere expedit , maxime cum ex segniori meconii evacuatione gravissima tormina , inquietudines , vigilias , cardialgicas passionēs , hernias , pertinacissimam alvi obstructionem , motus spasticos & convulsivos aliaque symptomata originem duxisse noverim ; quia fordes istæ non modo intestinorum tunicis se tenacissime insinuant & ipsa non raro conglutinant , sed etiam concursu lactis vel optimi crasin plane alienam , eamque nocivam induunt : unde etiam muliercularum plurimæ permotæ recens natos per viginti quatuor horas esurire , & interea mel



cum butyro propinare jubent, metuentes, ne purgato nondum corpore lac in coagulum densetur.

## §. VI.

*Mulierum  
lactantium  
dieta.*

His ita provisus commodus infantibus victus debitumque regimen ordinandum est. Merito autem lac præcipuum & quasi universale constituit alimentum, quia & cibum & potum simul suppeditat, ventriculo arridet & hoc fine ab optimo creatore tam sapienter constitutum est, ut mulieres sanæ statim post partum sufficientem ejus copiam in mammis accumularent. Quum autem vel à matre vel à nutrice, hunc in finem conducta, infantes è mammis nutriantur; eo certe à parentibus, & quibus tenellorum concredita est salus, respiciendum est, ut lac purum & temperatum generent. Id quod vix melius obtinetur, ac si lactantes foeminae exactam diætæ rationem observant, eaque omnia fugiunt, quæ sui vestigia, vel ut sensibus abscondita, in dulci lacte relinquunt, & à notis in superiori capite ceu noxia inter causas morborum sunt relata. Speciatim vero nutrix, si hanc eligendi necessitas postulat, sit sana, ætatis vigentis  
ab

ab anno vigesimo ad trigefimum ,  
gracilis potius quam obesa , bonis  
quoque moribus instructa , animi  
tranquillitati dedita , nec melancholica,  
iracunda , vel ebriosa : neque si oc-  
casio fert, primipara, nec demum lac  
nimis vetustum alat. Præter hæc  
vero similiter bona utatur diæta : &  
quum plerumque pauperes ac vilioris  
conditionis mulierculæ nutricum mu-  
nere fungantur , sedulo videndum est,  
ne subito à pristino vivendi genere,  
seu victu duriori & parco ad mollem  
delicatum & plenum transeant , sed  
paulatim potius ei adsuefiant. Si quan-  
do ipsis ob infantum inquietudinem  
somnia per noctem satis frui non li-  
cet , eundem matutino tempore re-  
sarciant , cavendo tantum , ne nimium  
justo ipsi indulgeant , vitamque otio-  
sam ac desidem agant.

§. VII.

Hæc qui secum perpendit , facile  
perspiciet , quantum istæ matres de-  
linquant , quæ citra periculum vel  
ob humorum impuritatem & virium  
debilitatem , vel alias ob causas , quas  
prætexunt , teneram suam progeniem  
nutricibus mercenariis in dubias valde  
manus immisericordia quadam , bru-  
tam

*Pericula ex  
nutricibus  
mercenariis  
pertinens  
mescenda.*

tam superante, tradunt, & ne penſi quidem habent, an ſanam, an cacochymicam, an bene moratam an protervam nutricem conducant. Quid igitur mirum, quod fidem faciant innumera probatiſſimorum auctorum teſtimonia, infantes à nutricibus malo victu utentibus ulcera, ſcabiem, tineam capitis, cruſtam lacteam, aliaque cutis vitia reportare; à lue venerea infectis, eadem lue, aut ut ego obſervavi, puſtulis & cruſtis contaminari, imo quoque mille aliis modis miſerrime adfici. Et quum mediante lactis vehiculo & pravo confortio non tantum corporis, ſed & animi vitia latius ſerpant, prorſus non rarum ſed frequenter proh! dolor obvium eſt, infantes ab optimis etiam parentibus genitos peſſimis nonnunquam moribus corrumpi. Sic ſcio infantes admodum ſiticuloſos ex nutrice bibula: neque magnatum quorundam bibacitatem & crudelitatem multi auctores aliunde, quam à nutricibus eadem vitiorum pravitate inquinatis derivare contendunt. Egregia hanc in rem ſunt verba *Wirdig in medic. ſpirit. lib. I. cap. 25. §. 6. alieno lacte nutriti,* inquit, *ut plurimum degenerant, & ad*  
*nutricum*



*nutricum naturam naturalisuntur ; ex lacte & spiritibus nutricum adsumunt naturas nutricum & mores : lacte humano cicuntur ferocissima animalia , ob spiritus temperatos , quos una cum lacte sugunt , ut contra homines ferino lacte educati ferini fiunt & feroces , ut Romuli testatur exemplum & Remi.*

§. VIII.

Quantitas fugendi lactis exacte determinari nequit , solent tamen mulierculæ plerumque infanti primis a partu mensibus subinde à bihorio ; post tres quatuorve menses sexies aut septies , & demum bis tantum vel ter in die mammas præbere , donec anni spatium fuerit emensum. Hic tamen in genere notari velim , serio cavendum esse , ne nimis crebro & præter necessitatem mammas offerant mulierculæ , sed omni potius ratione nimis appetentes abstrahant , quia ipsi quousque bibere debeant ignorent , alias ista mala possunt suboriri , quæ in superiori capite evenire diximus.

*Quantitas  
fugendi lac-  
tis*

§. IX

Sæpe incidit , ut lactis temperies variis ex causis corrumpatur : quare ne damna inde impendeant , præcavendum erit. Maxime vero omnium ,

*Præserva-  
tio damni  
in lac re-  
dundantis  
ex terrore.*

ut supra diximus , lac à terrore lactantis solet vitari ; unde , ne statim à terrore mammæ offerantur , optimum terroris noxam avertendi præfidium est. Idem scire licet de iracundia : & quum labes à vehementi ira lacti insinuata post longiorem etiam moram tam lactenti , quam ipsi nutrici e. g. in mammis , variaminetur pericula , opus est ad ipsa præcavenda tempestiva lactis emulsione. Nonnunquam etiam accidit, ut vel infans ad lac è mammis fugendum impotens , vel nutrix ob morbum aliasve causas ad lactandum minus capax sit : quo in casu alia nutrimenta appropriata debent propinari , inter quæ referenda sunt serum lactis dulce, juscula hordeata, avenacea, emulsiones amygdalinæ lactiformes , vel ex crepatura hordei , addito vitello ovorum emulsioni similis mixtura & similia.

## §. X

Eadem profunt & in usum duci possunt , si lac solum ad nutriendum non sufficit, licet eodem fine pro varia regionum & populorum constitutione etiam alia excogitata sunt alimenta. Maxime autem hoc scopo

apud

-- & iracundia

*Alimenta  
lacti sub-  
stituenda.*

*Pulmento-  
rum usus  
& abusus.*

apud nostrates celebrantur varia pulmentorum genera, dum farina cum lacte vel aqua cocta in pultis tenacis ac glutinosi consistentiam redigitur. An vero infantes, præsertim illustrium teneriores, ob ventriculi debilitatem, cibis his viscidioribus probe resolvendis suppare sint, hoc est, de quo valde dubito; ut potius inde sæpissime viam ad viscerum & mesenterii obstructions sterni credam; sicut etiam HILDANUS *Cent. VI. obs. 34.* desperatam pylori obstructionem à tali pulticula observasse legitur. Multo minus debilis ventriculus tali pulticula debet valde repleti, intempestive priori alimento nondum subacto nova ejusdem quantitas denuo obtrudi, quia hac ratione innocuam prolem multum lædi docuimus. Neque probare ego vellem perversam muliercularum consuetudinem, dum infantibus pulmenta ore prius voluta & saliva commixta exhibere solent. Et licet hæc massa, saliva sanæ matris imprægnata in chylum infantili ætati amicum facilius converti posse videatur; ego tamen vix possum adduci, ut huic opinioni penitus subscribam, his motus rationibus; quia tali masti-



catione non modo tenuissima pulmenti portio fugendo absumitur, sed etiam salivæ dentiumque corruptorum vitia, quæ ob summam materiæ peregrinæ subtilitatem vix possunt percipi, facile cum teneris communicantur.

## §. XI.

*Post ablationem  
infantum  
quæ obser-  
vanda?*

Quando sub hac diæta infantes ad talem pervenerunt habitum, ut aliis alimentis capiendis & digerendis apti videantur, quod intra anni spatium aut ferius adhuc contingit, ablactari possunt. Tum vero non minus, quam antea curiose sunt observandi, ne mala antea evitata pleno nunc agmine irruant. Inprimis autem ciborum multitudo, varietas & consistentia fugienda est; siquidem cibi nimis falsi, viscidi, austeri, acidi & pingues copiosius ingesti minusque rite concocti largiorem cruditarum acidoviscidarum proventum fovent. Sic etiam æstate nocent fructus horæi, crudi & immaturi, qui plerumque in particularum suarum contextu acidum recondunt, quod fibras intestinorum irritando & spasmodice affligendo, diarrhœas, dysenterias, tormina & alia mala, adventante præsertim autumno

tumno , excitare valet. Quo demum pertinet panis non rite fermentatus , aut nimis recens , non exclusis faccharatis & dulcibus , quorum interventu chylus ex facili in viscidum abit magma , quo dein lumbrici , ventris tormina atque duries &c. invitantur.

§. XII.

Nunc propius quædam de præservandi methodo dicenda restant , quæ paucis explicabimus. Nihil vero ad præcavendos infantiles morbos deprehendi utilius , quam non modo nutrici , sed & tenello , paullo etiam largiori quantitate frequentius offerre infusa herbarum sanguinem edulcorantia cum aqua facta. Quem in finem non possumus non vehementer laudare infusum herbæ veronicæ , rad. scorzonæræ , liquiritiæ , seminis fœniculi , & similium. Ita enim lac tenue ac fluidum redditur , quo minus angustiora vascula obstruere , sed per omnes corporis tubulos & anfractuosos glandularum ductus ferri possit liberius. Neque etiam illæ sibi male consulunt , quæ quandoque post pastum seminis fœniculi & anisi lac augentis , atque tormina infantum præcaventis portionem comedunt.

*Remedia  
præservati-  
va lactan-  
tibus pro-  
ficua.*

## §. XIII.

*Remedia  
lactis coa-  
gulum im-  
pedientia.*

Quoniam in ventriculo & duodeno lac stāgnans facile acescit, corrosivum evadit & coagulatur, sicque mille gravia excitat mala; omni profecto cura & diligentia prospiciendum est, ut lactis illa tam periculosa coagulatio præcaveatur. Cui quidem scopo egregie serviunt pulveres, qui lapides cancror. ovorum testas, radicem ireos florent. crocum, semen anisi vel ejus oleum, sperma ceti, cinnabarim & solutionem ocul. cancri recipiunt, de quibus bis vel ter in hebdomade dosis cum euphoria potest offerri. Sed quum exoptatum sanitatis infantilis negotium maxime etiam in debita & sufficiente fecum per alvum egestione versetur, & tonus ventriculi ac intestinorum conservetur, interdum quoque leniora laxantia, si opus est, sunt interponenda, quibus lactis coagulati noxæ haud parum quoque avertuntur.

## §. XIV.

*Noxa pur-  
gantium.*

Hic vero omnia purgantia fortiora & acria, ut resinam jalappæ, scammonium, elleborum nigrum & similia, infamia & infantibus absolute noxia declaro; siquidem non modo ad  
tormi-



tormina & alvi adstrictiones , sed & ad atrophiam & adfectus convulsivos disponunt. Ab aloe quoque ob nimium , quem excitat fervorem & ebullitionem , item a fennæ foliis abstineant infantes , quia quo plus remediis alvus ad excretionem irritatur , eo major egerendi postea difficultas alvique tensio subsequitur. Imo quoque non tantum puerulis , sed etiam nutricibus talia exhibita plurimum nocent ; siquidem lacti admixta tennellos sæpe convellunt. Hinc recte SYDENHAM *epilepsia* , inquit , *puerorum primo mense sæpe aggreditur à frequentibus nimis alvi dejectionibus* , & Galenus sua jam ætate prudenter adseruit , quod corpora puerorum non oporteat purgantibus exsiccare , quin alioquin incremento prohiberentur. Et profecto quantum recens natorum ventriculus tener ac debilis à purgantibus lædatur , dici vix potest. Hæc enim medicamenta propter suam , qua pollent , acrimoniam fibras irritant , ventriculum & intestina ad spasmodicas constrictiones disponunt , eademque tandem suo tono ac robore privant , ut dein , turbata digestionem , facili negotio lac ace scat & corrumpatur.

## §. XV.

*Noxa mercurialium.*

Ex mercurio quocunque etiam modo parata remedia , præsertim in pulvere ac paulo majori & repetita dosi infantibus lactantibus oblata , jure meritoque deleteria judicamus , partim quod gravitate sua hinc inde plicis ventriculi & œsophagi firmius adhærescunt , partim etiam , quod accessu bilis acrioris , & corrosivi acidi , vehementiorem , eamque plane corrodentem naturam induunt : unde tonus intestinorum mirifice non tantum læditur , sed ad morbos quoque ex debilitate generis nervosi & spasmis oriundos via panditur ; idque eo magis , si infantibus , qui corrosivam colluviem , ex fecum virore & torminibus judicandam , foveant , temere propinantur. Idem valet de aliis metallicis remediis , ut auro fulminante , martialibus , venereis & antimonialibus , ut mercurio vitæ , pulvere Monckii & similibus , quibuscum profecto cautissime agendum est , quia admodum infida & infecura sunt remedia , quæ quatenus ab humoribus in prima regione residentibus solvuntur , operationes vel mitiori , vel vehementiori modo exserunt , imo fere prorsus enecant.

## §. XVI.

§. XVI.

At vero non sola potentiora hactenus recensita gravium malorum causam subministrant, verum etiam ipsi fyrupi & pulveres nimis crebro & copiosius oblatis, infantum corpuscula sæpe valde lædunt. Qua de re audiendus est *Cardanus*, qui *de malo recentium medicorum medendi usu cap. 48.* graviter sui & nostri temporis morem de fyrupis & pulveribus exhibendis ita reprobatur: *error est*, inquit, *cum noviter natis, auxiliandi scopo, alii fyrupos, alii pulveres, alii aliud consulunt, cum tamen constet, tam mollia membra nulla debere permutari qualitate, sive purgante, sive adstringente. Tenella enim ista membrorum compages, nihil fere innoxium, lacte excepto, recipere potest.* Temperatum quoque oleum amygdalarum dulcium cum saccharo sæpe exhibitum haud penitus noxa caret, prout fidem facit *Harderus in apiario observ. med. 99.* ubi refert, infantem quendam, cui mulierculæ à partu oleum amygdal. saccharo nuptum frequentius exhibuissent, torminibus fere continuis, & demum epilepsia correptum elapsis aliquot septimanis obiisse; in eoque post sectionem non solum viridia, qualia etiam

*Noxa ex lenioribus perperam adhibitis.*



etiam vivus egefferat , excrementa fuisse inventa , sed etiam intestini ilei portionem inferiorem manifesta gangrænosi adfectam. Nec dissimile exemplum infantis ex oleo amygdal.dulc. alternis diebus dato simili morbo defuncti recenset *Weisus in dissert. de abusu purgantium in recens natis.*

## CAPUT III.

*De torminibus infantum & flatulentis.*  
§. I.

*Torminum  
signa*

**E**X cunctis , quæ teneros cruciant infantes, afflictionibus vehementes abdominis dolores & inflationes frequentissime occurrunt, quæ his maxime signis se manifestant. Primo ægri valde inquieti huc illuc se jactitant & torquent, pedibusque calci- trant; mammas averfantur, & continuum fere ploratum edunt, venter flatibus turgidus conspicitur cum spirandi angustia: ructus interdum impetuose ex ore erumpunt, alvus plerumque est adstricta, & si deponitur, excrementa ut plurimum viscida, tenacia, plus minus colore viridi & æruginoso tincta, mox aquæ instar leviter flavescens fluida reddit, mox ve-

ro instar albuminis ovi indurati grumosa dimittit, quod vernacula *vvie Eyergehacktes* exprimunt; sæpe etiam tam acria & corrosiva ejiciuntur, ut inde podex cum perpetuo tenesmo excorietur.

§. II.

Causam immanium harum passionum proximam & continentem potissimum spasticæ intestinalium membranarum, quæ nervosæ valdeque sensibilis naturæ sunt, strictione constituunt, quibus præsentibus & diu perseverantibus naturale robur, tonus & motus peristalticus ita labefactatur & pervertitur, ut non modo excretiones tam flatuum quam excrementorum retardentur, sed ingestorum quoque digestio, correctio, & conveniens secretio impediatur. Quamvis vero hæ intensiores membranarum nervosarum constrictiones & crispaturæ per se valde dolorificæ sint; nihilo minus, quia flatus, ceu effectus spasmodorum subsequentes magnam intestinorum distensionem inducunt; fit omnino, ut omnium in toto corpore functionum œconomia mirum in modum perturbetur.

-- causa  
proxima.

§. III.

## §. III.

*Causſæ me-  
diatæ ſunt*

1) *animi  
adfectus*

Cauſſam harum adfectionum mediatam ut plurimum graves animi commotiones per iram, terrorem, metum & triftitiam in lactantibus ſuppeditant, quæ proxime & immediate in partes corporis nervoſas, maximeque ventriculi & inteſtinorum, ſuam exſerunt potentiam, dum naturalem & æquabilem ipſorum tonum, vel majori relaxatione, vel auctiori conſtrictione pervertunt. Et quandocunque matres, durante graviditate, fonticas iſtas animi perturbationes crebrius graviusque expertæ ſunt; infantes mox à partu & gravius & diutius diris ventris doloribus adficiuntur.

## §. IV.

2) *Dolores  
& ſpaſmi*

Sunt etiam ventris torminum & inflationum haud infrequentes cauſſæ graves aliarum partium dolores & ſpaſmi. Ita enim ordinario fere dentitionem infantum difficilem & dolorificam moleſtæ abdominis flatulentiae & tormina cum excretionem alvi præternaturali & penitus immutata comitantur. Neque raro accuſari debet frigus, improvide ventri pedibusque admiſſum, quo non modo liberior transpirationis ſucceſſus impeditur, verum

3) *Frigus  
externum.*



verum etiam ipsa fibrillarum nervearum textura læditur, & ad stases concipiendas disponitur.

§. V.

Sæpissime etiam fit, ut crebrior laxantium, multoque magis incautus purgantium usus commodam huic malo occasionem suppeditet. Idque non tantum in infantibus, sed etiam adultis observare mihi licuit; quippe qui, si quid gravativi sentientes purgantibus fuerunt tractati non modo intolerabilibus ventris doloribus sunt cruciati, verum etiam abdomen tumidum & instar tympaniticorum inflatum sæpe receperunt, ut postea sensibilis alimentorum canalis in statum naturalem vix maxima cura potuerit restitui.

4) *crebrior laxantium & purgantium usus.*

§. VI.

Si causas intuemur remotiores, deprehendimus, torminosos intestinorum dolores sæpenumero à meconio diutius retento, neque satis per colonum vel aliud lene evacuans expurgato proficisci; utpote quod tum mora & copia accumulatum fibras intestinorum distendit & flatulentias excitat, tum a lacte superingesto acrius redditum sensibiles intestinorum membranas ad dolorificam constrictionem

*Causæ remotæ sunt*  
1) *meconium diu retentum*

D

stimu-

2) *lac in  
primis viis  
corruptum*

stimulat. Eundem subire censum videtur lac ipsum in primis viis corruptum, acescens & in grandinosos quasi globulos coactum, quod bilis & fucorum fermentescibilium admixtione causticam induens naturam intestina pungit, rodit, lancinat. Satis autem hæc nociva fecum acredo & acido-caustica indoles se manifestat non modo per viridem, quo ipsæ tinctæ sunt, colorem, & per vasorum, quibus excipiuntur, arrosiones, verum etiam per illud maxime experimentum, quum ab olei tartari per deliquium adfusione viridis excrementorum color in flavum convertitur; ut taceamus denique, canes, qui alioquin lacteas infantum sordes lubenter absorbent, plane tum a viridibus his excretis abhorrrere.

#### §. VII.

3) *varia  
diætæ vitia*

Tandem in infantibus præsertim ab lactatis permultum ad dolores intestinorum spasticos contribuunt fructus horæi, mellita, nimis saccharata & alia, quibus pueruli libenter se obruunt. Facta enim inde in primis viis fermentatione, facile succi acerrimi generantur, & accedente iracundia, corporisque refrigeratione, magna for-  
dium

dium inutilium copia accumulatur ; unde præcordiorum angustiae , vomitiones , vehementes intestinorum lancements ; imo ipsæ febres biliosæ suam mutuantur originem.

§. VIII.

Quoad prognosin hæc maxime *Prognosis.* notanda censemus. Quo diutius atrocita intestinorum tormina sæviunt , & quo crebrius sensibilia tenellorum corpora infestant , eo solent esse graviora & periculosiora : quam facile enim febres , paralyses , asthmata , epilepticæ convulsiones & alia funesta junguntur mala , quæ , nisi cito convenientibus compescantur remediis , facile ad lethum miseros ducunt. Qui à verminosa colluvie proveniunt intestinorum dolores , raro feliciter cessant , nisi vermibus ipsis exturbatis. Neque in eventu præfagiendo parum interest , ut subjectorum laborantium ratio habeatur ; quæ si à parentibus imbecillioribus & matribus imprimis ad spasmos hystericos dispositis prognata fuerunt , metus est , ne malum & vehementius infantes torqueat , & crebrius recurrat.



CURATIO CUM CAU-  
TELIS.

## §. I.

*Acidum  
corrigentia  
nutrici  
proficua*

Medico torminosos infantum crucia-  
tus curaturo primo omnium incumbit ,  
ut acidum primarum viarum corro-  
sivum absorbere , corrigere & blande  
educere fatagat. Quo fine , si ma-  
lum , ut plerumque fit , à lacte cor-  
rupto & quibuscunque causis vitiato  
originem traxerit, quam primum ne-  
cesse est , ut nutrix vel prorsus mu-  
tetur , vel serio caveat , ne tum  
temporis cibus flatulentis , fructibus  
horæis, leguminibus , vinis , acidis,  
feculentis , aliisque lactis temperiem  
immutantibus indulgeat , quia his  
omnibus vel multum augetur , vel  
pertinacior redditur affectus. Tum  
quoque nutrici , si alvi adstrictione  
laborat, leniora profunt laxantia, in-  
ter quæ maxime recensemus rhabar-  
barina , si e. g. drachma dimidia extra-  
cti rhabarb. in uncia dimidia liquoris  
terræ foliat. tartari & aquæ cinamomi  
soluta mane & vesperti ad LX. & plu-  
res guttas adsumitur. Neque tum mi-  
nus nutricem adjuvant medicamenta  
carminativa , item infusa theiformia ,  
in

in paulo majori quantitate hausta ; utpote quæ in lactis crassitie diluenda & resolvenda excellenter se gerunt. Ipsis vero infantibus , ad acidum in primis viis hærens temperandum , hic qui sequitur pulvis expertæ virtutis meretur commendari , qui ex lapidum cancror. matris perlar. antimonii diaphoretici , rad. ireos florent. ana drachma dimidia , croci granis tribus , olei anisi , macis guttis duabus conficitur , & singulis bi-horiis ad grana quinque vel sex in decocto cornu cervi , vel aquis antispasmodicis & analeptica virtute præditis flor. tiliæ , ceras. nigror. meliss. &c. cum pauxillo diascord Fracastorii remixtis , cum fructu propinatur.

- - & in-  
fantibus  
salubria.

§. II.

Nihil autem fere magis misere ad- flictos solatur , præter clysteres , qui tum blando tepore suo spasmus intestinorum relaxant , tum etiam flatus , qui plerumque torminum causa vel comites sunt , egregie discutunt & evehunt. Quo fine ego laudatissimo sæpe effectum applicari jussi enemata , ex herba major. flor. chamomill. feminibus carminativis cum jusculo tenui avenaceo decoctis parata , & addita

*Alvum du-  
centia.*

olei chamomill. vel anethi cocti sufficiente quantitate , adjectisque aliquot olei anisi guttulis efficacius red-  
dita. Interne eodem fine rhabarbarina optime conferunt , ut syrupus de cichor. cum rhabbaro , medicamentum nutriti supra præscriptum in minori dosi oblatum , & electuarium, quod ex rhabbari electi & lap. can-  
cror. æquali portione cum syrupo cichorei vel rosarum solutivo subacta compositum in decocto hordei , ad-  
jecta convenienti mannæ quantitate , per intervalla propinatur. Neque pos-  
sum , quin hoc loco approbem val-  
deque laudem methodum *Heurnii* ,  
qui in *method. ad praxin lib. II. c. 26.*  
adserit , se usu comperisse , à femi-  
nis anisi scrupulo uno , grosso modo  
comminuto , jam recens natos pue-  
rulos commodissime à viridi bile &  
pituita foeda purgari , simulque cla-  
mosos ventris dolores sedari , si cum  
primo cochleari pultis saccharatæ  
offeratur.

## §. III.

*Quid ver-  
mes postu-  
lent.*

Si vermium in intestinis nidulan-  
tium suspicio adest ; ea omnino dare  
expedit , quæ inimicis hisce hospitibus  
enecandis & educendis infra in pecu-  
liari



liari capite accommodata suppeditabimus remedia.

§. III.

Tandem etiam externis contra vim morbi simul pugnare expedit. Quo scopo egregie se gerunt emollientia, ut sunt flores chamomillæ, sambuci, meliloti, verbasci, semen fœnugræci, anethi, crocus &c. ex lacte cocta & vel vesicæ fuillæ indita, vel linteo excepta abdominique applicata. Nec mihi illorum displicet methodus, qui exterius ventris regionem circa umbilicum oleis destillatis cumini, carvi, anisi, fœniculi, chamomill. & similibus; oleo nucistæ expresso, chamomillæ cocto & axungia quadam exceptis ac temperatis inungunt.

*Remedia  
externa.*

§. IV.

Quod tandem ad cautelas in hoc morbo necessarias attinet; utique consultum est ab omnibus falsis, acribus & fortiter stimulantibus, præsertim purgantibus abstinere: admodum enim intutum est, saburram acerrimam non rite prius correctam per longum intestinorum canalem educere. Inprimis autem omnium insigni nocendi qualitate pollent, resinosa, ut resina jalappæ, quæ sane imprudentissime

*Cautelæ  
circa pur-  
gantia,*

infantibus ex lacte corrupto & acri laborantibus propinatur; & licet copiam humorum aliquoties ejiciat, continuo tamen stimulo & intestinorum irritatione vehementer nocet. Multo magis purgandi intentione, quæ tamen raro exposcitur, pulvis mechoacannæ albæ cum syrupo datus prodest, collectamque ventriculi & duodeni saburram absorbentibus & corrigentibus alterare, & dein mannatis, rhabarbarinis vel clysteribus educere præstat.

## §. IV.

--circa tormenta per consensum inducæta.

Sæpenumero hæc intestinorum tormenta non tam à causâ materiali primis in viis latitante, quam potius à formali, seu vehementi nervorum agitatione, e. g. à gravi in aliis membris dolore per consensum producuntur: quo in casu, remotis laxantibus, primo omnium ad spasmos & dolores sopiendos dirigenda est curatio.

## §. V.

--circa clysteres.

Si ullum remedii genus ob insignem, quam præstat, utilitatem meretur commendari, sunt profecto, ut supra jam innuimus, clysteres, qui immediate ad intestina pertingunt, & tam sedando quam flatus discutiendo insigni-

infigliter opem ferunt, si modo attendatur indicatio, ob quam tepida hæc fomenta injicimus, ut in iis apparandis aliquem habeamus delectum. Ita enim, si excreta alvi sunt liquida instar laticis acerrima, ut non modo gravia ventris tormina, sed & podicis excoriationem inferant, profunt clysmata ex lacte & saccharo, vel terebinthina in vitello ovi soluta, quæ acrimoniam temperando, intestini crassi & podicis rosionem avertunt. Quod si vero amurca viscida in intestinis oberrans, torminibus & flatulentis ansam suppeditat, locum potius inveniunt enemata majori quadam resolvendi virtute prædita, quæ stimulo intestinis crassis addito efficiunt, ut qui in reliquis intestinulis hæret mucus, eo facilius postea descendat. Ita parari potest clyσμα ex decocti flor. chamomillæ uncia una vel duabus, additis mellis rutacei una alterave drachma, saponis veneti drachma dimidia, oleique anisi aliquot guttulis.

§. VI.

Solent tandem mulierculæ plurimæ -- circa sc.  
ejulatum pertæse ad somnum in hoc dativa.  
morbo provocandum, varia sedativa,

D 5

ut



ut mithridatium , requiem Nicolai & alia propinare ; sed pessimo plerumque ausu & effectu ; nam præter multa gravia mirifica mentis hebetudo improvidum opiatorum usum solet excipere.

## CAPUT IV.

*De Aphthis.*

## §. I.

*Aphtharum definitio*

**Q**Uæ infantum os , fauces & œsophagum obsident pustulæ cum inflammatione quadam conjunctæ , in medicorum scholis dicuntur aphthæ , & nil nisi ulcuscula sunt parva , vix milii aut cannabis semen excedentia , quæ nonnunquam , propter ardorem & dolorem , non modo inquietudines & clangosos clamores excitant , sed lactis quoque suctionem ipsamque deglutitionem valde reddunt difficilem.

## §. II.

*-- differentia*

Differunt hæ oris pustulæ ratione graduum ; siquidem aliæ sunt indolentes , rubræ vel flavæ , & tantum per gingivas , linguam & buccas in superficie dispersæ , ideoque benignæ dicen-

dicendæ ; aliæ contra sunt lividæ , nigrae & valde dolorificæ, ad uvulam, fauces & oesophagum usque extensæ, ut sæpe totus oris ambitus exulceratus videatur. Atque harum indoles plerumque est maligna , adeo , ut carnes sæpe subjectæ profundius ad ossa usque exedantur.

## §. III.

Materia , quæ aphthas excitat , omnino est acerrimæ , penetrantis & causticæ indolis ; quæ in sanguine prognata , & in glanduloso faucium peristromate ope glandularum segregata tenerrimam palati carnem rodit , inflammat , exulcerat : unde pustularum & complicatorum cum ipsis symptomatum origo.

*Causa materialis proxima.*

## §. IV.

Inter causas vero mediatas , quæ ad ingignendam tam virulentam materiam disponere solent , maxime omnium referri debet lac vel in puerperis & nutricibus per incongruam victus rationem , per morbos complicatos , & turbulentos animi affectus corruptum , vel in ipsis lactentibus variis ex causis coagulatum , & accessu bilis impurum , valdeque corrosivum redditum. Hoc enim quando

*Causa mediata.*

do cum sanguine communicatur ; non potest non totam ejus massam acrimonia quadam nociva imbuere , & sicut malis pluribus aliis , ita & aphthis occasionem præbere largissimam.

## §. V.

*Phænomeni explicatio.*

Quæ cum ita sint , haud mirandum est , cur aphthæ varii generis morbis à sanguinis impuritate provenientius vel jungi vel supervenire soleant , ut fere fit in febribus acutis & malignis, tussi , diarrhœis cholerodeis , asthmate , dentitione difficili & similibus. In febribus enim , ob nimium calorem, sanguis plerumque temperata & gelatinosa sui portione privatur , admodumque facile falso-sulphuream diathesin acquirit; in reliquis vero morbis antea nominatis acris quædam & vellicans materia peccat , quæ tussim , diarrhœas , asthmata , excitat , adeoque etiam aphthis progignendis apta nata existit.

## §. VI.

*causæ occasionales remotæ.*

Sæpe etiam aliæ quædam causæ externæ ad aphtharum progeniem conferunt ; & maxime quidem intermissæ faucium & linguæ absterisiones, perversa febrium & aliorum morborum per cal-



calidiora medicamenta curatio , aut si corpora infantum æstuantia frigido exponuntur aëri, qui transpirationem cohibendo , sordium salino-sulphurearum accumulationi inprimis favet. Neque hic excludenda sunt alia , quæ immediate laxiori faucium compagi vim quandam inferunt , ut fere faciunt turundæ ex linteo contorto cum mica panis vel saccharo repletæ , nec non frustula panis cerevisiæ intincta , & infanti ad sugendum oblata : quem morem non modo nostrates vilioris conditionis mulierculæ perperam sequuntur , sed *Lentilius* quoque *Ephemerid. German. Dec. III. anno 3. appendice obs. 94.* in Suevia potissimum annotavit , graviterque reprehendit. Nec sine ratione ; siquidem partim fortiori horum affricu , partim mutata salivæ temperie facile mollior oris interni cuticula arroditur , & pustulæ excitantur ; quæ tamen , nisi interna humorum acrimonia concurrat , placide decurrunt , & medentibus ansam dederunt , ut aphthas vel à causa interna , vel externa deduxerint.

## §. VII.

Aphthæ per oris superficiem rarius *Prognosis.*  
dispersæ , indolentes , rubræ & flavescentes

scientes remediis facilius obsecundant, quam quæ totas fauces occupant, ad nigredinem vergunt, profunde exulcerant, foetidumque odorem spargunt. Neque multum periculi alunt, si ab externa potius causa, quam ab interna proficiscuntur, pravamque scororum diathesin pro fundamento agnoscunt; quales sunt, quæ symptomatice febribus acutis aliisque gravioribus morbis junguntur. Pessimis quoque accenferi debent, quæ magnam inflammationem, spirandi & deglutiendi difficultatem junctam habent, quæ in morbis malignis funestum prænuntiant eventum, & sæpe post mortem per totum oesophagum ad ventriculum usque dispersæ sub sectione conspiciuntur.

## CURATIO.

## §. I.

*Curatio*

*mali ex vitio nutritio*

Curatio aphtharum pro ratione causarum variat. Nam, si suspicio subest lactis vel in matre vel in nutrice corrupti, tum hoc omnino debet corrigi, quod optime perficitur, si non tantum nutriens foemina omnia falsa, acria, spirituosæ & acida, animique adfectus ferio fugit, sed & remediis utitur sanguinem

guinem purificantibus & temperantibus, ut fere sunt : decocta radicum & herbarum temperatiora, diaphoretica, absorbentia, & alvum leniter subducentia, quorum a nobis jam sæpius facta est mentio.

## §. II

Si ipse infans mali fomitem continet, per intervalla syrupo mannato, vel cichorei cum rhabarbaro iuxta dosi aliquoties dato debet purgari, & iis tractari, quæ lactis coagulum impediunt, ejusque acrem intemperiem emendant, vitando simul omnia, quæ aphthis ansam præbere supra docuimus. Tum vero, ad acrimoniam humorum temperandam optime profunt decocta avenacea cum saccharo cando & oleo amygdalarum dulcium mixta & propinata, item decoctum raparum, vel dauci vulgaris subinde potus loco oblatum.

-- ex vitio  
infantis.

## §. III.

Sed quoque externis rodentem aphtharum acrimoniam placare decet; quem in finem laudem merentur linctus ex diamoro, succo granatorum & melle parati; itemque succus raparum cum vitello ovorum & saccharo subactus, vel cremor lactis cum syrupo

Remedia  
externa.



po papaveris albi, vitello ovi & tantillo nitri mixtus, & vel digitis linteo involutis, vel penicillo applicatus. Nec minorem præstat opem vitellum ovi, aqua rosarum & saccharo cando subactum, item mucilago seminis cydoniorum cum melle & pauxillo croci remixta pustulisque illita. Quæ denique ad os colluendum præscribuntur gargarismata, pusillis suadere nollem, utpote qui ad gargarisandum minus sunt apti.

## §. IV.

*Curatio  
aphtharum  
symptomati-  
carum.*

Quæ morbis acutis vel aliis morbis junguntur aphthæ, nunquam curantur, nisi morbo ipso, cujus symptoma sunt, vel mitigato vel penitus superato. Minime vero in acutis multis laxantibus natura in opere suo debet turbari, sed potius leniora diaphoretica & emulsiones temperantes ex seminibus IV. frigidis & papaveris pauxillo paratæ omne absolvunt punctum.

# CAPUT V.

## *De pathematibus ex dentitione difficili.*

### §. I.

**N**Oluit provida natura hominem cum dentibus nasci, sed optimo potius consilio, ad præcavendas lactantium inter sugendum molestias, providere, ut dentes sensim paulatimque succrescant; quorum prima, & jam in utero posita rudimenta initio quasi mera sunt filamenta membranea, quæ succo nutritio repleta, in mucum inspissantur, ex mucositate in cartilaginem indurantur, & ex cartilagine demum in osseam firmitatem abeunt. Quamvis vero non unus idemque in omnibus dentitionis sit terminus, sed ipse pro subjectorum ratione differat, dum alii septimo vel nono mense, alii autem vix intra anni spatium dentes accipiant; nihilo minus tamen hic solet in eruptione ordo plerumque servari, ut dentes incisores, qui etiam risorii & lactei dicuntur, à papillarum inter sugendum affricu præ cæteris maturentur, & in inferiori maxilla primo omnium erumpant;

*Dentium generatio.*

-- *tempus eruptionis.*

E

his

his deinceps canini succedant, & hos iterum molares excipiant.

§. II.

*Historia  
dentitionis  
difficilis.*

Licet hæc dentium eruptio opus & res plane naturalis sit, infantibusque nonnullis sine ulla graviore molestia eveniat; pluribus tamen propter varia, quæ jungi solent, symptomata, ingentes creat molestias; unde dentitio difficilis suboritur, quæ non nisi tardior & dolorifica dentium per gingivas eruptio esse solet, atque his maxime signis cognoscitur: infantes calore præternaturali exardescunt pavoribus tentantur, in somno, qui inquietus est, subsiliunt, ploribus defatigantur & vigiliis, lac ex uberibus avidius sugunt, ipsasque mammarum papillas mordent, & manus ori crebrius admovent. Tum quoque gingivæ in anteriori oris parte intumescunt, tumentes aut albicant aut rubent, saliva ad fauces copiosius destillat, ductilisque lympa ex ore sæpe pendet, & alvus vel obstruitur, vel per diarrhoeam colliquescit. Imo demum his symptomatibus junguntur alia, eaque longe graviora, ut fere sunt acutæ febres, motus convulsivi & epileptici, graves maxilla-



maxillarum torsiones & similia, quæ tamen aliter atque aliter adficiunt, prout gradu solet differre ipsa dentitionis difficultas, & subjectorum sensibilitas.

§. III.

Causa dentitionis difficilis aliquando in dentibus ipsis, aliquando in gingivis esse deprehenditur. In illis residet, quando dentes exitum molientes vel grandiores acutioresque sunt, ut canini & oculares; vel quando segnius excrescendo, gingivas diutius rodunt, vellicant & terebrant, vel etiam quando plures simul impetuosiori motu protruduntur. In gingivis vero causa est quærenda, si ipsarum crassities firmiorque textura pertinaciter obstat, quo minus dentes in maxillarum loculis latentes, libere possint exitum moliri. *causa.*

§. IV.

Quum vero à tali violenta dentium protrusione valde sensibilis gingivarum caro, quæ ex variis fibris nerveis & membranis contexta est, non potest non insigniter lædi, pungi & inflammari; hæud mirum esse debet, cur non tantum pruritus, calor & dolor gingivarum cum segniori dentitione

conjungatur, verum etiam ob irritationis vehementiam, factamque inde systematis nervosi commotionem, pavores, subsultus, inquietudines, vigiliæ, vomitiones, asthmata, tusses, imo ipsi convulsivi & epileptici motus concitentur; idque eo magis, si infantes nativa quadam vel acquisita cerebri nervosique generis debilitate & ad spasmodicas constrictiones dispositione jam antea laboraverint, quæ dein, dolore acuto cum febre urgente, in actum deducitur, multumque augetur. Neque ex longinquo repetenda erit ratio, cur præter naturam alvus sub dentitionis difficultate vel supprimatur, vel fluida nimis existat. Et enim, sicut omnis vehementioris doloris, ita etiam ejus, qui ex dentibus nascitur, ea solet esse natura & indoles, ut universum corpus spasmis exagitando, simul etiam primas vias male adficiat; unde lac facile acescit & corrumpitur, indeque pendens libera alvi exoneratio aut retardatur aut nimis acceleratur.

## §. V.

*Prognosis.*

Quoad prognostica dentitionem in pueris periculosam sæpe ac funestam esse, fatis proh! dolor comperimus.

Graves

Graves enim & atroces isti adfectus, quos non raro aut supervenire aut jungi eidem diximus, sæpe tantam virium imbecillitatem adducunt, ut expediundæ dentitionis pugnæ infans evadat impar, & perinde reliqua symptomata majus incrementum sumant. Inprimis vero gravis dubiique eventus esse solet dentitio infantibus plethoricis & succi plenis, itemque iis, qui immodico somno velut marcent, utpote quibus malum omen adfuturæ convulsionis prænuntiat *Hippocrates lib. de Dentitione*. Tum quoque idem gravissimus auctor dentientes cum tussicula tardius producere dentes, inque perforatione corpuscula laborantium magis extenuari adserit; sine dubio, quia tum per se tussis vires ad protrudendum necessarias enervat, tum etiam magnam succorum viscidorum & acrium in corpore præsentiam indicat, qui non possunt non dentientibus, gingivas vehementius irritando, graviter obesse. Similiter etiam pejus adficiuntur, qui alvo adstricta laborant, quam qui alvum laxam & fluidam sæpe deponunt; licet pariter experientia confirmatum habeamus, quod non minus hi, quam illi præ-



dolore in ipso febrili paroxysmo convulsi moriantur. Porro multum quoque interest nosse, an subjecta ægro-  
 tantia valde sint sensibilia & forte à  
 parentibus iracundis genita : quod  
 enim si ita fuerit, semper certiores  
 sunt convulsiones, magisque dubii  
 eventus, quamvis non omnes convul-  
 sione correpti moriantur. Denique,  
 quo difficilius & quo longiori tempore  
 dentes erumpunt, eo majus est pericu-  
 lum, ne natura nimis debilitata tan-  
 dem succumbat : quæ autem divus ille  
 senex *Hippocrates* citato loco amplius  
 prodidit, quod febre acuta laboran-  
 tes convulsionem effugiant, & hiber-  
 no tempore dentientes facilius conva-  
 lescent, id aliis experiundum com-  
 mitto.

## C U R A T I O.

## §. I.

*Dieta ante  
 dentitio-  
 nem & sub  
 ea tenenda.*

Qui consilio & auxilio imminenti-  
 bus infantum morbis vult succurrere,  
 primo omnium tempus dentitioni à  
 natura dicatum, ut fere est septimus  
 mensis, accuratâ computatione debet  
 advertere, operaque laudabili ante  
 ipsam dentitionis difficultatem infanti  
 adesse,

adefse, ut ne huic quicquam cibi vel solidioris, vel calidioris ad mandendum porrigatur, sed tenuissimus potius victus, maximeque tenuiores forbitiones propinentur. Quum vero insigni simul auxilio esse soleat nutricis fugentis temperantia, & conveniens præceptorum diæteticorum observatio, eo sane pariter respiciendum est, ut hæc omnia calefacientia, vinum, aromata, & quæ sunt ejusmodi alia maxime fugiat, & sibi potius usum alterantium & humectantium, ipsiusque aquæ potum sedulo familiarem habeat. Neque vero hæcenus dicta tantum ante molestam dentium eruptionem locum inveniunt, verum etiam sub ipsa possunt ac debent adhiberi.

§. II.

In ipsa curativa methodo id maxime agendum est, ut dolor & inflammatio, quæ febriculas, convulsiones & diarrhœas plerumque comites habet, placide sistatur, gingivæ laxentur & emolliantur, sicque dentium eruptio promoveatur. In quo quidem scopo obtinendo; si interna primum spectamus, præcipitantia & maxime quidem gelatinæ C. C. in potu dissolutæ, cum essentia papav. rhœados, item

*Curatio infantis per interna.*

liquor noster anodynus mineralis , ad aliquot guttulas interdum oblatus , omnibus palmam reddunt dubiam. Neque præclaro suo usu caret mixtura crebrius exhibita , quæ ex aquæ lil. convall. flor. tiliæ , primulæ veris singulorum uncia una , pulveris Marchionis & antimon. diaph. scrupulo uno , croci granis aliquot , & syrupi de pœonia , f. papav. rhœad. drachma una , additis liquoris & spiritus salis ammoniaci paucis guttis , conflari potest.

## §. III.

*nutricis  
per interna*

Sicut autem in gravibus infantum morbis nutrici sæpe , quam infanti medicamenta dare præstat ; ita quoque hoc similiter observandum est in vehementioribus retardatæ dentitionis symptomatibus : quo fine ego insignem sæpe opem vidi ex medicamentis antispasmodicis nutrici oblatis , ut sunt pulveres , qui radicem pœoniæ , C. C. sine igne , unicornu fossile , succinum , castoreum & similia continent.

## §. IV.

*alvus aperta  
servanda.*

Nihil fere magis humorum ad superiora impetum concitat & auget , quam diuturnior alvi adstrictio , & quæ inde  
pendet



pendet flatuum atque spasmodum in nervoso intestinorum tractu progenies. Quamobrem nihil prius esse debet medico, nihil posterius, quam ut tum infanti clysteribus emollientibus & oleosis, tum ipsi nutrici convenienti medela alvi libertatem restituat, ne forte reliqua morbi præsentis curatio à tali fontica causa retardetur vel prorsus suspendatur.

§. V.

Sed externis quoque remediis ad *Remedia  
externa.* ipsas gingivas applicatis juvare decet, quo fine ad gingivas emolliendas & relaxandas egregie confert lactis cremor, item butyrum insulsum tam solum, quam cum melle mixtum; neque minus prodest, in ipsa illa parte, ubi dens prorumpere conatur, & tumorem, dolorem & ardorem gignit, ficum per medium dissectam admove, medullam crurum vituli, vel mucilaginem sem. cydonior. cum vitelli ovorum tantillo, aqua rosacea & syrupo violarum dissolutam, vel etiam cerebrum leporinum, quod specificè in tali casu laudari solet, adhibere: sicut pariter insigni juvandi energia pollet linimentum, ex spermate ceti, syr. papav. albi oleo amygd. dulc. cro-

co & nitro paratum, carniq̃ue gingivarum dolenti inunctum. Quo demum pertinet mica panis albi cum lacte cocta, additoque oleo rosar. & croco remixta, quam nonnulli, si anodyna propter dolorem & inflammationem poscuntur, mirifice commendare solent.

## §. VI.

*Sectio gingivarum.*

Quod si vero dentes erumpere plane renuant, sectione ipsis parandus est exitus, & scalpello membrana, cui extremitates dentium incumbunt, incidenda: quod ego experimentum sæpe ex voto successisse memini.

## CAUTE LÆ.

## §. I.

*Cautelæ circa nonnulla medicamenta.*

In dentitione difficili inprimis nocent omnia calidiora, purgantia, externa quoque valde spirituosa nari- bus oblata, vel adstringentia gingivis inuncta, quia, dum in toto corpore motus auctiores sunt, hi facile exacerbantur, & febris, quæ frequentissimus & fere individuus doloris comes est, magis adhuc accenditur. Unde simili ratione peccant matres, quæ in his morbis, cum dolore, febre & inflammatione junctis, infantes

fantēs nimis calido regimine tractant,  
& lectis aut conclavibus nimis calidis  
includunt.

§. II.

Quum alvi libertas, etiam paullo *- circa alvi*  
major, nunquam fere non majorem *fluxum.*  
facit spem fanitatis recuperandæ, nul-  
la sane ratione tum temporis alvum  
roborantia vel adstringentia debent  
propinari. Alias enim res periculi  
est plenissima, & convulsiones cum  
aliis symptomatibus longe citius cer-  
tiusque subsecutas esse recordor.

C A P U T VI.

*De epilepsia & convulsionibus.*

§. I.

**V**eram tam epilepsiæ quam con- *Instituti*  
vulsionum ideam jam in parte *ratio.*  
III. tomi IV. med. systemat.  
fufius suppeditavimus, ibique argumen-  
tis sat ponderosis evicimus, causfam  
morbi alterius in spasmo duræ matris;  
alterius in spastica membranarum me-  
dullam spinalem investientium stricture  
ponendam esse. Nihilo minus tamen,  
ut seorsim innotescat, quænam maxime  
causæ infantes horrendis hisce adfecti-  
bus



bus subijciant , quibusque remediis depelli istæ debeant ; è re fore arbitror , ut , in præsentī morborum infantilium disquisitione , specialia quædam , & magis ad infantes pertinentia adjiciam.

## §. II.

*Epilepsiæ  
& convul-  
sionum  
subiecta.*

Solent autem epilepsiæ & convulsionēs teneram ætatem , quam ab anno primo ad septimum usque extendimus , præ ceteris frequentissime torquere ; non aliam ob causam , quam quod in infantibus partes nervosæ membranaceæ sensuque exquisitiori præditæ ex tenerrimis , admodumque mobilibus fibrillis sunt compositæ , quæ levissime tantum irritatæ in spasticas & irregulares commotiones conjiciuntur facillime. Quam ob rem etiam usu venire solet , ut quo tenerior & ætate minor est infans , & quo majorem à parentibus vel animi adfectibus deditis , vel eodem olim morbo adfectis , obtinuit sensibilitatem ; eo etiam facilius ac vehementius tam epilepsiis quam convulsionibus corripiatur.

## §. III.

*— origo à  
matre &  
nutrice*

Tum quoque truculenti hi adfectus facile solent accidere , si non modo  
matres

matres. uterum gestantes , salutare diætæ leges neglexerunt , sed etiam nutrices lactantes hysterice vel aliis nervosi generis pathematibus laborant; si acetaria , acria , fructus horæos aliaque incongrua copiosius devorant, spirituosâ liberaliori manu assumunt, vel lacte copioso æque ac crasso pusillos sibi demandatos nutriunt. Neque adeo rarum, sed mihi aliquoties obvium fuit , perfacile fugientes in epilepticas convulsiones easque difficulter curabiles incidere , quando nutrices vehementi animi adfectu , præsertim ira , terrore & timore percussæ mammas statim ante debitam lactis emulctionem & correctionem offerunt ; aut si quando menstruas purgationes , quibus ab initio lactationis ad tempus caruerunt , denuo experiuntur.

§. IV.

Deinceps experientia demonstrat , nonnunquam tam comitiam , quam convulsivum morbum suboriri, si partes quædam nervosæ spasmodicis vel doloribus agitantur , & simul consensus lege ipsæ meningum & medullæ spinalis membranæ adficiuntur. Fieri hoc maxime deprehendimus à meconio in

-- à spasmodicis  
& doloribus aliarum partium

in primis viis retento, & per moram acrius reddito; item à ventris torminibus & vermibus, sensibiles intestinorum tunicas lancinantibus, nec non à doloribus ex dentitione difficili subortis & à purgantibus fortioribus iisque præsertim crebro oblatis; siquidem hæc omnia ita sunt comparata, ut in subjectis sensatione paulo majori præditis facili negotio motus epileptico-convulsivos ciere valeant.

## §. V.

*.. ab exanthematibus repulsis.*

Sicut illi denique pueri ab epilepsia & convulsionibus præcaventur vel liberantur, quibus favi, crusta lactea & scabies cum pustulis superveniunt; ita hisce impuritatibus improvide retropulsis sæpe sæpius hi gravissimi morbi originem debent; quod similiter valet de variolis & morbillis, quorum vel impedita eruptio & nociva retrocessio, vel improvida cura infantes numero plurimos epilepsiis & convulsionibus enecat.

## §. VI.

*Prognosis.*

Quæ febribus acutis, petechialibus & variolosis superveniunt convulsionibus & epilepsiæ, mali sunt ominis, nec etiam periculo carent, quando ex dentitione difficili & ventris tormi-  
nibus



nibus subortæ diutius adfligunt. Quibuscunque hi morbi, teste *Hippocrate sect. III. aph. 28.* & experientia, circa annum septimum non solvuntur, iis plerumque usque ad aliam ætatis periodum misere inhærent. Nec denique minus ex ipsa paroxysmorum frequentia prognosis petenda; ubi sciendum, quod quo crebriores sunt accessiones, eo magis timendum sit, ne natura demum superata succumbat.

## *C U R A T I O.*

### *§. I.*

Sicut in omni morbi genere, ita *Curatio* non minus in nostris adfectibus tota *mali à nutritricis lacte* medentis intentio ad causas debet esse directa. Quod si itaque ex vitio nutritricis per terrorem aut vehementem iracundiam commotæ malum originem repetit, sepositis omnibus spirituosus, acris & irritantibus, ea dare expedit, quæ inordinatos & spasticos nervosi generis motus placide compescunt; ut inprimis faciunt clysteres ex emollientibus & carminativis parati, item pulveres antispasmodici, ex pulvere Marchionis, cinnabari & moschi tantillo confecti & vel soli, vel in vehi-

vehiculo aquarum, sedante quadam virtute præditarum, tiliæ, liliorum convallium, primulæ veris, aurantiorum &c. propinati.

§. II.

-- à lactis  
corruptione

Neque parum differt curatio, quando malum a lacte in ipso infante corrupto & corrosivo reddito proficiscitur; siquidem tum pariter, præter clysteres demulcentes, egregius pulverum absorbentium cum croco, moscho vel momento extracti castorei remixtorum est usus; maxime si simul decoctum cornu cervi paulo spissius pro potu adsumatur. Quod si vero simul primæ viæ à sordibus acido-corrosivis sunt purgandæ, fieri id commodè potest decocto mannato successive dato, cui aliquot guttulæ olei tartari per deliquium sint instillatæ.

§. III.

-- à lacte  
coagulato  
stagnante

Quando lac crassum & copiosum mali causam suppeditat, infans pauciori lacte alendus, & talia nutrimenta præbenda sunt, quæ illud fluidius & serosius efficiunt. Sæpe etiam in tali statu ventriculus à lacte stagnante & coagulato multum est infarctus, ubi sæpe lene emeticum  
extra

extra paroxysmum oblatum prodest, quod ex tertia vel quarta grani parte tartari emetici cum syrupo violarum & aqua quadam destillata remixta componi potest.

§. IV.

Meconium primis mensibus non rite expurgatum & subsistendo acrius factum, quando ansam malo porrigit, debet illud lenioribus laxantibus cum absorbentibus junctis evacuari, maxime vero per electuarium, ex syrupo cichorei cum rhabarbaro, lapidibus cancrorum & pulvere Marchionis compositum. Vermes contra per remedia ipsis accommodata sunt interficiendi & expellendi.

-- à meconio retento

-- & vermibus

§. V.

Si quando epilepticum malum ex repressione scabiei, tineæ capitis, vel aliorum exanthematum suboritur; ea debent propinari, quæ materiam impuram ad habitum corporis revocandi virtute pollent; inprimis autem vesicatoria nuchæ applicata in tali casu sæpe usum præstitisse novimus. Atque hoc etiam experientia Fernelii videtur confirmatum, qui multos epilepticos per fonticulos & fetacea curatos refert.

-- ex repul-  
sione cutis  
exanthema-  
tatum.



## §. VI.

*Cautio cir-  
ca opiata  
& volati-  
lia.*

Solent nonnulli , nec adeo incelebres medici ad vehementissimos solidorum motus placandos interdum opiata , ut massam pilularum de cynoglossa , theriacam coelestem & alia commendare ; sed quia sæpe infaustum inde vidi effectum , cum hisce cautissime mercandum esse censeo. Idem valet de volatilibus , quæ etiam extrinsecus adhibita sæpe sæpius nocent.

## CAPUT VII.

*De variolis & morbillis.*

## §. I.

*Instituti  
ratio.*

**E**Quidem jam in quarta medicinæ systematicæ parte , ubi de omnis generis febribus agitur , variolas atque morbillos seorsum consideravi , nihilo minus tamen de singulis pauca jam addere placet , quæ partim allata magis dilucidabunt , partim eo servient , ut totum rei negotium , quo exoptata horum adfectuum curatio absolvitur , breviter in conspectum veniat.

## §. II.

## §. II.

Variolæ quidem & morbilli, si *Variolarum & morbillorum differentia* primum invadunt, ratione symptomatum valde inter se conveniunt, dum utraque morbi species cum febre accedit, exanthematica contagiosa est, epidemice grassatur, & universum corporis habitum cum aliquali cutis elevatione deformat; progrediente vero morbo differentia facile advertitur, dum in morbillis longe minor cutis elevatio apparet, pectus maxime maculis obsidetur, tussis excitatur atque totus morbi decursus mitior & benignior deprehenditur, citiusque terminatur: cum contra variolæ caput, manus & pedes potissimum occupent, maculæ in dies majores fiant, & rubræ, quæ deinceps suppurantur, albescent, exulcerantur & exsiccantur, ad quod non solum plures dies requiruntur, sed vehementiora quoque symptomata accedunt, & vestigia sæpe indelebilia in cute remanent.

## §. III.

Nunquam aut variolæ, aut morbilli -- *difficilis eruptionis signa.* sine febre eveniunt, certisque temporibus plus minus benignæ vel malignæ sunt; nihilo secius tamen si ægrius erumpunt, laborantes ut

plurimum delirant, somnia in somno terrifica experiuntur, magnas pectoris angustias ipsiusque gutturis dolores sentiunt, urinam albam mingunt, nihilque alvi deponunt, quia diversis aliunde humoribus feces exsiccatae remanent; imo sæpe epilepticis convelluntur subsultibus & mortis periculo expositi sunt; nisi his omnibus in melius conversis symptomatibus quietiores fiant, & liberior exanthematum eruptio facilius succedat.

## §. IV.

--Symptomatum ratio

Symptomata cum utroque adfectu conjuncta ut plurimum à febre & abhinc pendente sanguinis impuri ebullitione proveniunt; quam ob rem non mirum esse debet, cur sanguinis cursu ad superiora impetuosius directo pectoris anxietates, tusses & cordis palpitationes, in capite cephalalgiae, deliria, oculorum & faciei inflammationes, lacrymarum fluxus, rauedines, salivationes &c. eveniant, & præterea, propter nervorum à materia caustica rodente vellicationem tormina, epilepsiae, tremores, nervorum subsultus & similia pessimam ludant tragœdiam.

## §. V.



## §. V.

Multum omnino refert, ut sci- -- maligni-  
amus, quam variolæ præferant in- tatis & be-  
dolem, & an malignæ, benignæ, an nignitatis  
mediæ sint naturæ. Pessimæ autem signa in va-  
sunt, si depressæ cum foveis, vel riolis.  
etiam valde ardentes, acuminatæ &  
simul confluentes conspiciuntur; si  
violaceæ, lividæ aut profus nigræ &  
vel petechiis vel purpura, præsertim  
alba, interstinctæ apparent; si febris  
post eruptionem magna cum anhelitus  
difficultate permanet, & vel mictus  
cruentus, vel narium hæmorrhagiæ,  
vel cruentæ alvi dejectiones sociantur.  
Pessimæ quoque indolis sunt, si in  
vesiculas sero vel acri, vel sanguino-  
lento repletas dehiscunt, & ad sup-  
purationem tendere renuunt, aut si  
demum in lentas & hæcticas febres  
desinunt, malique moris ulcera &  
abscessus relinquunt. Benignas contra  
dijudicare licet ex remissiori sympto-  
matum vehementia, pustulis debito  
modo & tempore erumpentibus, sup-  
purantibus & arescentibus; quæ vero  
mediæ naturæ dicuntur variolæ, inter  
utrasque obtinent medium malignitatis  
gradum; uti nos pluribus in capite  
citato de variolis ostendimus.

## §. VI.

*-- in mor-  
billis.*

Morbilli perinde gradu differunt , semperque mali haberi debent , si quando ipsis alia exanthematum genera immiscentur , si tussis nimia , rauco , & febris diutius durant , morboque declinante gravia remanent symptomata , quæ morbis chronicis ansam præbent facillimam.

## §. VII.

*Gradus va-  
riant se-  
cundum  
subiecta.*

Pendent autem hi diversi malignitatis gradus ab ipsa subiectorum laborantium constitutione & natura. Ita enim sæpius iterumque observare mihi licuit , quod pueri succulenti sanguineque copioso præditi , maxime si à parentibus morbidis fuerint prognati , & propter victum incongruum impuros in corpore humores collegerint , sub morbosa cœli iniquitate præ ceteris variolas & morbillos malo omine decurrentes incidere soleant. Etenim , quo major materiæ impuræ intus latitat copia , & quo minus naturæ robur eidem foras propellendæ sufficit ; eo etiam difficilior est morbus , cujus unica certe medela in decenti materiæ peregrinæ ad habitum corporis propulsione consistit.

## §. VIII.

## §. VIII.

Tum quoque ad augendam horum -- & alias  
adfectuum malignitatem non parum *circum-*  
conferre solent perversum ægrotantium *stantias.*  
regimen & commissi in diæta errores,  
itemque aliæ, quæ præter morem  
junguntur circumstantiæ, ut præci-  
pue sunt vermes, qui naturam in  
motibus salutariter institutis sæpe adeo  
turbant, ut omnia in pejus ruant  
symptomata, siquidem ego non raro  
spasmodicas artuum tractiones, cum  
aphonia, ventris torminibus & nimia  
salivatione concitatas novi, quæ nun-  
quam subsecutæ fuissent, nisi vermi-  
nosa progenies ansam suppeditasset.  
Sæpe etiam diarrhœæ & salivationes  
nimix, incongruo tempore obortæ  
statum pejorem afferunt; licet mode-  
ratæ hæ evacuationes, si in princi-  
pio & fine morbi critice incidunt,  
plus plerumque profint quam obsint.

## §. IX.

Qui pernicialibus his morbis pereunt, *Causa mor-*  
ut plurimum inflammatione partium *tis & pro-*  
internarum, & subsequente sphace- *gnosis.*  
latione, vel suffocatione, per angi-  
nam & catarrhum suffocativum mo-  
riuntur, quando acris caustica ma-  
teria vel non satis expellitur, vel



expulsa recedit, & in sensibili nervorum systemate graves spasmos, imo epilepticas convulsiones excitat, quæ si post factam eruptionem aut perdurant, aut revertuntur, multum plerumque alunt periculi. Non raro indubium mortis præbet indicium, quando materia ad partes nobiliores revertitur; unde extrema frigent, & subito faciei, totiusque cutis intumescencia subsidet.

## §. X.

*Seçtio anatomica.*

Demortui cultro anatomico dissecti sæpe exhibent viscera pluribus pustulis & maculis lividis obfessa, vel etiam ventriculum cum intestinis magna copia variolarum quoad superficiem conspersum; ut ipse ego non solum crebrius annotavi; sed alii quoque auctores observarunt sæpissime. Vid. *Kerkring. spicileg. observ. 62. Fernel. lib. II. c. 12. de abditis rerum causis.*

## CURATIO.

## §. I.

*Curatio per diaphoretica & emulsiones.*

Totus curationis cardo in eo potissimum vertitur, ut materia acris & caustica temperetur, corrigatur, & à partibus internis ad externas propella-

pellatur. Quo scopo præcipuam merentur commendationem pulveres absorbentes & diaphoretici, qui acrimoniam corpori infestam in variolis & morbillis non modo contemperant, sed optimo etiam effectū eandem ad externum corporis habitum propellunt. Hi vero ex cornu cervi philosophice præparati, usti, lapidum cancror. antimon. diaphoret. ana drachma una, succini præparati, nitri purif. ana drachma dimidia, cinnab. cortic. cascarillæ ana granis octo commode possunt parari, & pro ætatis ratione debita dosi exhiberi. Neque tum laude sua carent emulsiones temperantes, vel dictis pulveribus interponendæ, vel cum iisdem conjunctim propinandæ, quales ex seminum cardui mariæ, frigidorum majorum, papaveris albi ana drachma una, aquæ cardui benedicti, flor. sambuci, cerasorum nigrorum, rosarum, florum tiliæ ana unciiis duabus conficere hætenus consuevimus. Huc quoque eadem intentione pertinent decocta cornu cervi & hordei, avenacea, ptisanæ hordeaceæ cum ficibus paratæ, serum lactis dulce & similia, quæ in acrimonia temperanda, & placidiori ex-

anthematum eruptione promovenda maxime merentur laudari.

§. II.

-- *per alia  
combinata  
remedia.*

Hactenus recensitis absorbentibus , diaphoreticis & demulcentibus , si prudenter administrantur , totum curationis negotium feliciter absolvitur, nisi vel in retardata exanthematum eruptione dictis pulveribus bezoardicis tantillum myrrhæ & croci adjicere , vel parum liquoris bezoardici , ut spiritus Bussii cum liquore nostro anodyno mixtus est , propinare , vel durante suppuratione liquorem myrrhæ aquosum cum sale tartari paratum ad acrimoniam temperandam offerre velimus , quod medicamentum simul pectus , si tussis valde urget , egregie solatur.

§. III.

*Curatio  
ventris tor-  
minum.*

Inter symptomata cum variolis & morbillis conjuncta inprimis referri debent torminosi intestinorum cruciatus & tenesmi , quibus vix melius possumus mederi , ac si oleum amygdalarum dulcium recenter sine igne paratum ad cochlear unum cum decocto cornu cervi , vel jusculo avenaceo subinde propinatur.

§. IV.



## §. IV.

Quando rauco cum tussiculosa pe-  
 ctoris concussione valde urget, optime <sup>-- rauccidi-  
 nis & tuf-  
 sis.</sup> conducit electuarium, ex oleo amygdalarum dulcium recenti, spermate ceti, syrupo violarum & croco paratum, & cum potu calido crebrius exhibitum, non exclusis decoctis avenaceis cum saccharo cando & vitello ovi parandis.

## §. V.

Hæmorrhagiæ si incidunt, cau-  
 tissimus sit adstringentium usus; sed <sup>-- hæmor-  
 rhagia-  
 rum.</sup> tantum, ad impetum sanguinis moderandum, profunt mixturæ ex aquis antispasmodicis cum diascordio Fracastorii nuptæ, & cum pulveribus præcipitantibus leniter nitrosis oblatae.

## §. VI.

Variolæ præcipue faciem petunt, <sup>Oculorum  
 defensio.</sup> aciemque oculorum facile lædunt: quare, præservandi fine, commendari meretur lac muliebre aqua rosarum dilutum & cum modico myrrhæ & croci remixtum, vel aqua rosarum & florum sambuci cum tertia parte liquoris nostri anodynæ mineralis, & momento camphoræ vigorata, oculisque applicata.

## §. VII.

## §. VII.

*Faciei pulchritudo quomodo conservanda?*

Nihil plerumque magis à medicò exposcitur, quam ut faciei nitoris & pulchritudinis conservandæ curam gerat, ne profundæ relinquantur cicatrices faciem deturpantes; quod fieri plerumque videmus, si materia acris nimis profunde cuti inhæret. Licet autem raro in totum evitari possint tædiosæ istæ cutis defœdationes; aliquid tamen petitionibus dandum, & linimentum commendandum est, quod ex axungia humana recenti, cum solutione lythargirii in aceto facta paratur; modo caveatur, ne nimis cito, sed arescentibus demum papulis adhibeatur.

## §. VIII.

*Nares quibus defendenda?*

Nares sæpe internæ variolis obsidentur & obstruuntur, quo minus dein liberior aëris in & exspiratio rite possit succedere; quam ob rem, si opus est, illæ commode possunt illiniri oleo amygdalarum dulcium cum oleo ligni Rhodii & tantillo camphoræ remixto: quod remedii genus locum pariter invenit, si fauces exulceratæ opem exposcunt.

## §. IX.

*Reliquiæ morbi qui*

Sæpe, licet omnia diligentissime observen-

observentur , in fine morbi nocivæ *bus tollenda ?*  
 permanent reliquiæ , quæ peculiarem  
 opem exposcunt. Ita si ulcera mali  
 moris restitant , unguento de cerussa  
 camphorato vel lythargirii sunt tra-  
 ctanda , vel iisdem balsamica , ex es-  
 sentia succini , myrrhæ , balsamo Peru-  
 viano confecta , vel balsamum nostrum  
 vitæ aquæ sclopetariæ nuptum inji-  
 cienda. Quicquid vero mali evenit;  
 semper continuationem cum internis  
 purificantibus requirit. Quem in fi-  
 nem non modo alvus lenioribus la-  
 xantibus , ut tinctura rhabarbari , per  
 intervalla debet subduci , & saluber-  
 rimum transpirationis negotium de-  
 bito regimine infusis herbarum ca-  
 lidis veronicæ , scordii , scabiosæ , ra-  
 dic. glycyrrhizæ & sem. fœniculi , pul-  
 veribusque diaphoreticis leniter myr-  
 rhatis promoveri , verum etiam tem-  
 peratis balsamicis , e. g. essentia myr-  
 rhæ aquosa & aliis , deperdita sanguinis  
 temperies restitui. Juvat hic quoque  
 exacta diætæ ratio , quæ in eo con-  
 sistit , ut inter cibos dura , falsa ,  
 flatulenta fugiantur , potuique de-  
 coctum radicis chinæ , sarsaparillæ ,  
 glycyrrhizæ &c. substituatur.



## §. X.

*Præservan-  
di ratio.*

Haftenus commendata interna remedia fimiliter præservandi scopo ex usu funt , fi quando propter inordinatam aëris constitutionem vel propter aliorum jam ægrotantium contagium , hæc exanthemata funt pertimescenda. Nam multum omnino refert , ut corpus ad morbi impetum felicius fuftinendum antea bene præparetur.

## CAUTELÆ.

## §. I.

*Cautela  
circa regi-  
men.*

Si ullo in morbo accuratum vitæ regimen tenendum eft , observari quam maxime debet in variolis & morbillis. Præsertim autem aëris regimen ita moderandum eft , ut nec ægrotantes nimis calidis tegumentis prope fornacem cooperiamus , nec in hypocaustis humilioribus & frigidis detentos frigoris injuriæ exponamus. Utrumque enim periculofiffimum eft , dum altera ex parte , ob facilem internorum inflammationem & auctam materiæ peccantis acrimoniam , hæmorrhagiæ & alia mala concitantur ; ex altera vero exanthematum eruptio vel retardatur , vel pustulæ retroaguntur.

## §. II.

## §. II.

In principio & statu morbi carnes -- *circa*  
vitare decet, omniaque alimenta mul- *dietam.*  
tum succi præbentia; nisi majorem ac-  
cerfere velimus putredinem. Vitentur  
quoque nimis dulcia, eaque præfertim  
viscida, quia humorum viscositatem au-  
gent. Id quod in morbillis similiter  
valet de acidis temperandi ardoris gra-  
tia cum potu datis; siquidem tussim,  
quæ fere individuus hujus morbi co-  
mes est, plerumque vehementiorem  
reddunt.

## §. III.

Veteres medici inter morbi initia, *Ufus fri-*  
ad materiam hostilem à partibus inter- *ctionum.*  
nis evocandam, externe frictiones par-  
tium extremarum cum pannis calidis  
valde commendarunt; quod remedii  
genus nec ego rejicere ausim; quo-  
niam ad meliorem cutis perspirationem  
haud parum conferre arbitror.

## §. IV.

Remedia alvum ducentia magis *Cautela*  
præservandi, quam curandi scopo uti- *circa la-*  
lia sunt; nihilo minus tamen crebrius *xantia.*  
ego in morbi principio, si propter  
summam sanguinis ebullitionem hu-  
mores vehementius ad caput & pectus  
propelluntur, clysteres ex decocto  
hor-

hordei , saccharo , & oleo amygdalarum dulcium paratos applicari jussi ; idque inde obtinui , ut exoptata symptomatum remissio subsecuta fuerit.

## CAPUT. VIII.

*De tabe seu atrophia infantum.*

## §. I.

*Atrophia  
definitio*

**I**Nter morbos infantibus familiares non infimum tenet locum tabes , quæ est paulatina universi corporis consumptio cum abdominis inflatione & insigni functionum læsione plerumque conjuncta.

## §. II.

*historia*

Incipiente malo artus tam inferiores quam superiores incipiunt flaccescere & marcescere , abdomen vero distendi , adest spiratio difficilior , lassitudo corporis , alvus modo strictior modo solutior , appetitus vagus , cibus maxime frigidis dicatus : incrementum malo facies propter tempora collapsa est adspectu misera & pallida , palpebræ post somnum tument , costæ protuberant , scapulæ alarum instar prominent , cibi plerumque semidigesti excernuntur , & dolores circa umbilici regio-



regionem lancinantes sæpe percipiuntur ; urina mingitur crassa modo , modo rubicunda ; somnus est turbulentus , & circa noctem lentus calor cum oris siccitate & siti accedit.

§. III.

Minime vero hic noster adfectus debet confundi cum gracilitate corporisque macilentia, quæ à pinguedinis defectu oriunda, sæpe unam tantum partem occupat, neque tamen totius corporis functiones lædit. Tum quoque probe debet discerni à rachitide, in qua partes quidem nonnullæ contabescunt, sed artus simul tumore, contractura, incurvatione deformantur. Dein cavendum est, ne tabes ceu primarius adfectus, pro illa tabescentia habeatur, quæ ceu symptoma aliis morbis, ut febribus, variolis, morbillis diarrhœis & lumbricis supervenit. Differt tandem vera tabes à marcore qui à defectu lactis dependet ; id quod cognosci potest ex nutricis uberibus, si flaccida sunt & lactis omnino egena, si ipsæ nutrices non bene appetunt, si infantes parum mingunt, plorant, vagiunt, sique alimento accepto, conquiescunt, & mammas cupidi arripiunt.

*.differentia  
ab aliis  
morbis*

## §. IV.

-- *sectio  
anatomica*

Qui pereunt hoc morbo , in horum sectione plerumque glandulæ mesenterii tumefactæ , scirrhusæ , vel ipsi abscessus deprehenduntur ; hepar quoque & lien raro sine labe , infarctu & magnitudine aucta conspiciuntur : musculi , præsertim abdominis tam extenuati sunt , ut vix membranam referant ; intestina contra valde inflata & amurca foetida , quandoque nigra sunt referta.

## §. V.

- *causa pro-  
xima*

Causam hujus mali proximam in succi nutritii temperati & gelatinosi defectu , vel ejusdem insufficienti ad partes solidas appositione reponimus : medietas vero causas in depravata alimentorum digestionem , chylo impuro & crasso , ejusque denegato per vasa lactea adductum thoracicum & sanguinem transitu collocandas esse statuimus. Quam maxime autem hoc loco accusari etiam debet bilis defectus , vel inertia , à præternaturali hepatis constitutione inducta , ob quam non modo digestio valde læditur , sed oscula quoque tunicæ intestinorum villosæ minus rite à mucositate sua liberata chylum ægrius recipiunt & transmittunt.

## §. VI.

§. VI.

Caussæ remotæ & occasionales iterum variæ sunt; plerumque tamen observavimus, post perpeßos varii generis morbos, ut variolas, morbillos, motus ex dentitione difficili convulsivos, & alios, gravem hanc & chronicam passionem fuisse subsecutam; præfertim quando convalescentes gulæ nimium indulgentes alimenta crassioris texturæ, ut caseum, panem non rite fermentatum, farinacea, placentas, fructus quoque horæos, cibos acidos & vina acida adsumserunt. Nihil vero, prout frequenti habemus experientia, magis nocet, quam si infantes calefacti & sudore madidi noctu frigidum potum sæpius accipiunt, vel à somno in lecto calentes in frigidiorum auram transferuntur. A suppressa enim transpiratione & constrictis extremorum subtilissimis tubulis non modo succus nutritius divertitur, & à peripheria ad centrum & inferiores partes reprimitur, verum etiam prava, falsa & acri intemperie imbuitur.

*- cause remotæ sunt prægressi morbi*

*-- frigus*

§. VII.

Neque cum clarissimo DNO CHUDEN dubitamus adserere, infantes, nisi bene fuerint loti & à sordibus suis

*-- omiffæ lotiones*



mundati, ob pororum cutis occlusionem, tabem posse incurrere: qui vero ex omiffa lotione vermiculos in cute neonatorum generari statuunt, quos comedones vocant, magnamque boni nutrimenti partem subtrahere credunt, hi me eo adducere non possunt, ut ipsis fidem penitus tribuam, quia novam hanc adfersionem sufficienti experientia nondum fatis habeo confirmatam.

## §. VIII.

- *perversa  
medicatio*

Neque inficiandum, ex præpostero medicamentorum, præsertim terreorum, absorbentium, & adstringentium, in diarrhoeis, febribus intermittentibus, torminibus, variolis &c. usu tabidos ejusmodi adfectus infantibus posse accidere. Nam testantur, qui corpora hoc morbo defunctorum anatomicè dissecuere, se tum in ventriculo, tum in adnexis intestinis tenuibus crustas quasdam solidescantis materiæ invenisse, quæ vix ab horum substantia divelli potuerunt: quod indicio est, non modo liquoris gastrici separationem inde fuisse prohibitam, sed chyli quoque colaturam, osculis lacteorum occlusis, retardatam.

## §. IX.

- *dispositio à*

Tabes quoque rectè statuitur scorbuti-

butica, si à parentibus impura humo-  
rum dyscrasia laborantibus progene-  
rantur, vel à nutricibus morbidis vel  
cachexia & alio scorbutico affectu  
ægrotantibus lactantur. Sæpenume-  
ro etiam venerei quidpiam complica-  
tum est, unde atrophia tanquam effe-  
ctus à causa dependet.

§. X.

Sæpe etiam vermes, intestinorum  
volumini innidulantes atrophix caus-  
sam constituunt, qui non modo par-  
tem alimentorum & chyli optimam  
præripiunt, sed pravis quoque exhalationibus ipsum imbuunt. Notabile fa-  
ne exemplum A.N. C. *vol. III. append.*  
*p. 161.* de puero atrophia defuncto &  
dissecto referunt, in cujus intestinis  
plures vermium nodi alii majores,  
alii minores, interiori tunicæ villosæ  
tam firmiter adhærere visi sunt, ut  
cum eadem veluti concreti conspice-  
rentur, nec sine læsione ipsius tunicæ  
separari potuerint.

§. XI.

Non raro porro infantes antea fani,  
& per omnia recte valentes absque  
aliqua prægressa manifesta causa lan-  
guere, corporeque extenuari inci-  
piunt. Atqui hoc patiuntur, quan-  
do à

-- *prava  
diætæ post  
ablaçtatio-  
nem.*

do à lacte matris vel nutricis ad solidiorem deferuntur cibum; cumque jam antea bene pedibus insistere, suamque corporis molem sustentare valuerunt, nunc minus possunt consistere & terram attingere detrectant; sed mox genuina morbi indoles clarius se manifestat, quando penduli artus in sensus incurrunt, habitusque corporis flaccidus & rugosus fit, ut in natibus maxime & femoribus conspicitur. Interea cibos sic laborantes continuo ingerunt, ut vix saturari possint.

## §. XII.

*De fascinatione judicium.*

Nihil magis solenne & inter vulgus receptum est, quam, ut plurimi, adeoque etiam medici, diutius perseverante hoc malo, causam in fascinationes rejiciant. At vero, sicut hæc ludicra & inanis excusatio non obscure indicat, hos homines, qui ad tam absurdum ignorantiae asylum confugiunt, nec genuinas morbi causas cognoscere, nec commodis posse remediis easdem abigere; ita nos hanc judicandi rationem ineptam & medico philosopho indignam merito rejicimus.

## §. XIII.

*Prognosis.*

Quando ab imprudenti adstringentium, nimio salinorum & absorben-

tium



tium usu malum originem suam repetit, multum ut plurimum temporis ad curandum requirit; quod si vero materia terreorum absorbentium jam soliditatem quasi acquisivit, spes salutis dubia est, & multi ante causæ sublationem morte præripiuntur. Quando inveteratus est morbus, & mesenterium, hepar, lien, pancreas, renes ac pulmones jam infarcta & scirrhusa, tunc raro aut nunquam curatur. Salutem contra promittit, si coctione ciborum emendata, appetitus magis constans & regularis redit, tumor abdominis decrescit, & vires recolliguntur. Si diarrhœa adest, & materia purulenta admodum foetida cum sanguine mixta per anum excernitur, atque corpus insuper valde emaciatum est, malum difficili aut nullo plane negotio potest tolli; siquidem diarrhœa reliquas adhuc vires consumit, & materia foetida jam corruptionem in abdomine indicat, quam mors plerumque satis cito excipit. Quando infarctus vel scirrhus in exulcerationem abit, & febris supervenit hectica, quam ex urina flammea & rubicunda, æstu ac phlogosibus post cibum ut plurimum cognoscimus, tunc infantes cer-

tō certius succumbunt. Tandem sæpenumero per febres intermittentes talem feliciter sublatam observationes testantur.

## CURATIO CUM CAUTELIS.

### §. I.

*Curatio per  
commo-  
dam die-  
tam*

Curatio multum pro differentia causarum differre solet, generatim tamen in ablactatis eo maxime respiciendum est, ut ejus generis cibi suppeditentur, qui corpusculo languido partibusque emarcidis nutrimentum & robur addunt. Egregia hunc in finem sunt juscula ex conquassatis gallinis & caponibus sine pinguedine & evidenti falsedine parata, item pulmenta ex pomis Borstorfianis cum vitello ovorum & saccharo confecta, quibus cinamomi, macis & vini pauxillum addi potest.

### §. II.

*- - juscula  
aperientia*

Quando oscula vasorum lacteorum & ductus glandularum meseraicarum ab amurca tenaci obstructionem patiuntur, brodia gallinæ veteris cum radice graminis recenti, fœniculi, petroselini, asparagi, sellerie &c. decocta, pinguedine remota sunt omnium utilissima, quibus in refracta dosi spiritus

ritus nitri dulcis vel vitrioli martis aliquot guttæ, vel solutio ocul. cancror. addantur. Sed debet per plures dies imo septimanas continuari ita, ut singulis quatuor horis elapsis, tres vel quatuor unciaë ad forbendum offerantur.

§. III.

Inter medicamenta magnæ in hoc morbo efficacisë deoppilativa præcipue etiam locum tenent liquores salini mediæ naturæ, si v. g. ex solutione oc. cancri cum succo citri, terra fol. tartari, arcano tartari cum aqua petroselini vel fœniculi parantur, & juxta dosi aliquoties de die offeruntur; à quibus remediis summam & mirabilem sæpe energiam expertus sum.

-- per medicamenta aperitiva

§. IV.

Ad laudabilem alimentorum digestionem promovendam, præsertim ubi bilis balsamica deficit, & acidum ac viscidum prædominatur, elixir nostrum balsamicum temperatum inter cibos sumtum laudatissimum præstat effectum. Ubi vero tormina, dolores, inquietudines &c. complicantur, liquor noster anodynus mineralis, cum solutione salis tartari tenuiori mixtus

-- per balsamica stomachica



& oblatum, remedium præbet optatissimi effectus.

§. V.

-- per bal-  
nea.

Quando ab obstructis & infarctis tubulis subcutaneis, seu transpiratione prohibita, malum dependet, balnea ex rad. alth. filic. herbis malvæ, meliloti, flor. chamomill. & sapone Veneto, addita lactis portione parata præstantissimam opem exferunt; modo non nimis calida adhibeantur. Et observatum sæpius est, balnea iteratis vicibus primo post partum mense adhibita insigni præservandi energia pollere.

§. VI.

Externe, ad discutiendum tumorem, oleum chamomill. vel anethi coctum, & moderate camphoratum non sua laude caret.

§. VII.

Curatio ta-  
bis à nu-  
tr. ce con-  
tractæ

Quando ex impuro scorbutico lacte ortum traxerit ejusmodi tabes, nutrix est removenda, & ferum lactis dulce, vel etiam lac asininum cum aliquot guttulis olei tartari per deliquium offerendum. Jungenda quoque infusa diluentia theiformia ex veronica, hedera terrestri, rad. glycyrrh. cichor. cum liquore ex solutione salis tartari & arcani duplicati. In ablactatis cerevisiæ  
semper

semper alius diluens potus est substituendus, ipsique similiter oleum tartari per deliquium instillandum.

§. VIII.

Si à nimio absorbentium usu adfectio oritur, infusa diluentia, junctis laxantibus ex manna, rhabarbaro, vel syrupo cichorei cum rhabarbaro proficua erunt. Juvat etiam interdum ventriculum à fordibus viscidis per pulverem ireos Florentinæ in paulo majori dosi exhibitum deplere.

§. IX.

Purgantia adfectum hunc magis exasperant, & ad hecticam disponunt, præsertim si subiecta sint sensibilia. Nam sæpe inde inflammatur ventriculus cum intestinis & post sequitur mors.

C A P U T IX.

*De Rachitide.*

§. I.

**E**Xplicata jam tabe universali, progredimur ad particularem, quæ rachitis appellatur, & non nisi inæqualis nutritio est, qua partes aliæ debito suo nutrimento orbatae contabescunt; aliæ plus justo nutritæ augmentum

ab absorbentibus orta.

Cautela circa purgantia.

Rachitidis descriptio.

tum recipiunt, & cum ossium spinæque dorſi incurvatione majores fiunt.

§. II.

- - *historia*  
*& decur-*  
*ſus.*

Novum eſt morbi genus, & vix ſæculo priori ad exitum properante in Anglia obortum; poſthinc vero per reliquas Europæ regiones ſeptentrionem ſpectantes diſſeminatum, quod his maxime ſignis ſe manifeſtat. Accedente malo circa menſem ætatis nonum, aut ſerius adhuc, ſenſim paulatimque irregularis fit plurimarum corporis partium proportio, cutis laxa, abdomen macrum, & quaſi flatibus turgidum: muſculi atrophia conſumuntur, juncturarum contra articuli in brachio, manibus, genu & pedibus protuberant; oſſa ad ſuſtinendum corpus minus firma & cum ſpina dorſi ſæpe incurvata obſervantur: unde motus & ingreſſus debilis, qui ſæpe in movendi impotentiam terminatur. Tum quoque arteriæ jugulares & carotides intumeſcunt, caput eſt magnum, & ob colli ſuſtentantis flacciditatem ſæpe nutans: ingenium ſupra ætatem acutum, pectus vero anguſtum & à lateribus quaſi compreſſum cum ſterno acuminato & extremis coſtarum nodofis. Invaleſcente demum ma-



lo jungitur febricula lenta, tussis, respirandi difficultas & alia, quæ plerumque ad mortem perdurant. Sed probe omnino tenendum est, quod certi dentur rachitidis gradus & durationis modi, qui non eadem in omnibus symptomata, sed in nonnullis graviora, in nonnullis leviora producant.

## §. III.

Qui hoc modo defunctorum dissecuerunt corpora, aliud atque aliud viscus vitale labe corruptum invenerunt; siquidem alii hepar naturale grandius, scirrhusum & diaphragmati coalitum, mesenterium glandulis induratis obstructum, & cum pancreate obstructum; alii pulmones pleuræ vel tergo adnatos, eosque vel lividos, vel vomitibus refertos; alii pericardium aqua repletum se reperisse testantur. Plerique tamen, inter quos solertissimos corporum scrutatores GLISSONIUM, BONETUM, & inter recentiores celeb. HEISTERUM referimus, unanimi fere consensu adferunt: principium medullæ spinalis in hoc morbo solito esse durius & obstructum, caput inter duram piamque matrem aqua perfusum, cerebrum mole majus, venas vero carotides & jugulares arteriis minores.

*Seçtio anatomica*

## §. IV.

## §. IV.

-- causa  
proxima.

Quod si igitur his viris laude dignis fidem adjungere, nostramque ipsius experientiam interponere licet; non possumus non causam hujus diri adfectus proximam in impedito succi nervei in spinalem medullam vel compressam vel obstructam influxu reponere; unde necessario earum partium omnium, ut brachiorum, pedum &c. perit nutritio, quæ nervos ex spinali medulla recipiunt: contra vero illæ plus nutriuntur, quæ vias habent apertas & sufficientem succi nutritii admittunt copiam, sicut, teste anatomica experientia, in capite rachiticorum conspiciamus, quod ob denegatum lymphæ nutritiæ in medullam spinalem influxum, plus nutrimenti accipit, atque ideo non solum in majorem molem excrescit, sed & faciem bene coloratam exhibet. Neque aliunde derivandum est vividum ingenii acumen, quam à cerebro & cerebello illæso, riteque suis muniis fungente; quare etiam partes, ad quas nervi inde abeunt, plerumque recte solent esse constitutæ.

## §. V.

ratio sym-  
ptomatum.

Facile quoque patet, cur ossa incurventur & circa epiphyfes nodis de-  
for-

formentur. Nam quia muscoli eorumque ligamenta, quibus ossibus annecti solent, minus rite in hoc adfectu nutriuntur, sed alimentum copiosius per arterias ad ossa devehitur; fieri solet, ut eorum extrema, quæ in infantibus mollioris plerumque texturæ sunt, ob minorem resistantiam distendantur, & tubercula accipiant. Quoniam vero, perseverante hac nutritione, ossa perpetuo crescunt, & muscoli contra minores, brevioresque fiunt; facile omnino ipsa ossium extensio à musculis alligatis retardatur, & incurvatio contingit, idque eo magis, cum ossa in hac ætate admodum sunt mollia & flexibilia. Nec denique distorsio spinæ dorsi aliam agnoscit causam, quam processuum osseorum, cartilaginum, ligamentorum & musculorum vertebrae dorsi connectentium flacciditatem, tonumque naturalem depravatum: quo præsentè hæ partes sub corporis inclinatione latius à se invicem secedunt magisque distenduntur, quam iterum recedere, & in pristinum statum possunt restitui.

#### §. VI.

Causam hujus morbi mediatam constituit viscida succorum tenacitas, qui  
à san-

*Causa mediata.*



à sanguine spisso segregati ad medullam spinalem deponuntur, ejusque meatus comprimendo vel occludendo impediunt, quo minus liquidum nervorum tenuissimum in spinæ medullam rite possit influere, & abhinc per nervos amplius dispensari.

## §. VII.

*Causæ remotæ sunt diætæ errores*

Ex causis vero remotioribus ad humores inspissandos ex diætæ vitio huc fere conferunt omnia, quæ inter causas atrophix in priori capite à nobis sunt relata. Quæcunque enim digestionis negotium turbant, chylumque crassum, viscidum & ad nutritionem ineptum ingenerant, suffragante experientia, huic nostro adfectui etiam velificantur.

## §. VIII.

*.. aëris prava constitutio*

Si quid autem speciatim ad ingenerandum hoc malum potens existit, est profecto aër, qui teneros ambit, frigidus, nebulosus, variisque exhalationibus peregrinis refertus, qui partim cutis tonum debilitando, sordes pituitosas in corpore retinet, partim pulmones relaxando impedit, quo minus in hoc viscere intima sanguinis mixtio, ejusque per totum corpus distributio rite possit succedere. Luculentum hujus

jus rei testimonium illustre totius Angliæ emporium exhibet Londinum, quod non tantum propter maris circumfluentis exhalationes, sed etiam propter minerales quasdam ex carbonibus fossilibus emissas particulas inprimis rachitidi producendæ & sustentandæ idoneum deprehenditur. Neque ideo mirum esse debet, cur ex eadem causa in locis paludosis & maritimis, itemque vere & autumnino frequentior hujus mali sit proventus; & cur hic Halæ, quæ tam ob Salæ præterlabentis & salinarum effluvia, quam ob sulphureum carbonum fossilium fumum atmosphæra valde humida cingitur, tam multi pueri rachitici se nobis fanandos offerant.

## §. IX.

Neque dubitarem adserere, quod ad - - externa  
violentiæ faciliorem humorum in medulla spinali stagnationem multum contribuat prava quarundam muliercularum consuetudo, qua infantes pallio involutos sæpe diu noctuque brachiis gestant, & non modo spinam dorsi in situ incurvato diutius retinent, sed pedes etiam inæqualiter flectunt; unde non tantum gibbera & pedes vari producuntur, sed & nostro morbo occasio datur

H aptis-

aptissima. Quod similiter fieriprehendimus, quando teneri ex improvido ictu vel lapsu externam vim & spinæ torsionem patiuntur, quare etiam gibbosi facile fiunt rachitici.

## §. X.

*- - morbi  
prægressi.*

Morbos quoque prægressos ad tabem non minus quam rachitidem disponere nihil dubii est; ex omnibus tamen ii præcipue huc concurrunt, qui humorum ad medullam spinalem decubitum efficiendo, liberum fluidi tenuissimi itum reditumque suspendere valent. Ita in artis exercitio non raro solet occurrere, quod hanc ob causam post variolas non rite tractatas, item post scabiem crustamque lacteam & capitis tineam retropulsam dirus hic adfectus originem receperit.

## §. XI.

*Prognosis.*

Morbus invalescens si super quintum ætatis annum aut diutius inhæret, difficulter curatur, & corpus plerumque languidum ac deforme juventuti tradit, & nisi accedentibus juventutis annis, ubi totum corpus maximam patitur mutationem, penitus tollitur, per totam vitam nullam sanationis spem admittit. Nec minorem habet difficultatem sanatio, si per hæreditariam dispo-



positionem fuit inductus, aut mox primis à nativitate mensibus obortus. Denique si phthisis cum hectica febre, hydropicus tumor, asthma vel diarrhoeæ superveniunt, spes in angusto est posita. Quæ vero ab aëris aut victus vitio oritur rachitis, aut variolas, scabiem, aliasque cutis efflorescentias subsequas habet, nec à tanta ossium incurvatione & motus impotentia comitatur, faciliorem recipit medelam.

## C U R A T I O.

## §. I.

Quum humores visceri, lenti & pituitosi ad spinalem medullam depositi causam & fomitem rachitidi præbeant: primo omnium eo respiciendum est, ut lentor succorum resolvatur, obstructions referentur, & liber fluidorum motus per totum corpus promoveatur. Quo fine ante omnia, ad fomitem mali, qui in primis viis residet, præscindendum, conferunt leniora laxantia, non omittis, si opus est & tenera infantum constitutio admittit, lenioribus emeticis, ex radicis ipecacuanhæ aliquot granis cum saccharo & aqua cinamomi sine vino datis, aut

*Curatio per  
laxantia  
& eme-  
tica*

cum fyrupo in electuarium redactis. Si-  
quidem hac ratione non modo fordes  
viscidæ, in ventriculo & intestinis  
collectæ, perbelle educuntur, sed  
etiam, addito hoc stimulo, debita hu-  
morum resolutio & tubulorum ob-  
structorum reclusio egregie obtinetur;  
si modo caveatur, ne talia stimulantia  
in subjectis jam valde exhaustis, & ma-  
gna viscerum labe vel pertinaci me-  
fenterii obstructione laborantibus adhi-  
beantur; quia tum potius ea commen-  
dare expedit, quæ inter medicamenta  
deoppilativa & referantia in superio-  
ri capite de atrophia retulimus.

## §. II.

-- per re-  
solventia

Hactenus dictis commode possunt  
interponi alia leniter resolventia, ut  
fere sunt diaphoretica, tinctura tartari,  
antimonii acris, & cinnabarina, mer-  
curialibus in hoc casu anteponenda,  
quæ partim per cutim, partim per uri-  
nam serofas impuritates evehendo, in-  
signiter juvant, maxime si cum infusis  
sanguinem diluentibus & purificanti-  
bus adhibeantur.

## §. III.

-- per ex-  
terna

Speciatim vero ad obstructionem me-  
dullæ spinalis referendam & liberum  
fluidi nervei influxum restituendum, à  
variis

variis auctoribus frictiones cum linteis calidis in spina dorſi, brachiis, pedibusque instituendæ, item ſuffimigia ex thure, ſuccino, maſtiche, olibano &c. commendantur. Si quid vero, mea ipſius experientia, commendationem meretur, ſunt proſecto balnea aquæ dulcis, cum herbis nervinis, majoranæ, lavendulæ, ſerpilli, roriſmarini, chamomillæ, meliſſæ &c. decoctæ; quibus ſi laborantes crebrius immittuntur, & poſtea linimenta nervina, ex axungia humanæ, olei nucis expreſſi ana uncia dimidia, baſami Peruviani drachma una, olei rutæ, lavendulæ, caryophyllorum ana guttis XXX. compoſita una cum frictionibus ſpinæ dorſi & artuum adhibentur, ſæpe tam exoptatus ſequitur effectus, ut ego plures inde viderim mirum ſublevatos, & tandem, cæteris paribus, ex voto reſtitutos.

## §. IV.

Ante omnia vero ſimul conjungendum accommodatum vitæ victusque regimen, quod in eo conſiſtit, ut pueri, remotis omnibus flatulentis, concoctu difficilibus, & viſcidis, crebrius juſcula gallinarum & vitulorum tenuia cum radicibus aperientibus, aſpa-

-- per dietam



ragi, foeniculi, cichorei, apii, felle-  
rie, petroselini & cancris fluviatili-  
bus contusis decocta adsumant, &  
ventriculi roborandi gratia temperata  
elixiria stomachica, ut nostrum visce-  
rale est, inter cibos capiant. Tum  
quoque potus offeratur tenuis, & du-  
rante lactatione lac bonum satisque di-  
lutum, conjuncto convenienti & æta-  
ti accommodato motu, qualis vectu-  
ra est, ut corpus segne paulum modo  
excitetur. Alvi libertas si deficit, leni  
promoveatur laxante vel clystere. Et  
si demum prava nutricis dispositio ma-  
lum vel induxerit, vel sustentet, huic  
similiter ea exhibeantur medicamenta,  
quæ infantibus in minori dosi propi-  
nanda commendavimus.

## §. V.

per liga-  
cula

Nec denique reticendum est, ad  
spinam dorsæ incurvatam & membra  
diversimode distorta commendabilem  
esse ligaculorum & thoracum appli-  
cationem, si modo caveatur, ne loco  
auxilii vim inferamus, & infantes ex  
uno vitio in alterum sæpe gravius præ-  
cipitentur.

# CAPUT X.

## De Vermibus.

### §. I.

**V**ermes sunt animalcula viva variæ *Vermium definitio.* figuræ, structuræ & magnitudinis, quæ ex seminio seu ovulo insecti cujusdam cum alimentis adsumti in cavo intestinorum nascuntur, & putrido quodam corrupto succo increscunt, corporisque universi functiones mirum in modum labefaciunt & lædunt.

### §. II.

Quamvis nulla hominum ætas ab *-- subjecta* exitiis hisce hospitibus plane sit libera, maxime omnium tamen infans & puerilis, hoc est, ab ablactatione ad decimum quartum annum, iisdem obnoxia est; quapropter etiam inter morbos infantiles de lumbricis tractatio præcipue meretur institui.

### §. III.

Variæ lumbricorum species, ipsa *-- tres species 1) rotundi* experientia teste, in corpore humano observantur, quæ potissimum à medicis tam veteribus, quam recentioribus in numero tres dispescuntur. Primo se offerunt rotundi, qui etiam teretes.

retes, Germanice *Spuhlwürmer* vocantur, & magnitudine, quæ vix spithamam æquat, ab aliis se distinguunt, maximeque sedem suam in tenuibus superioribus jejuni & ilei occupant; unde interdum ad ventriculum progressi oretenus prodeunt, vel vomitu ejiciuntur. Atque hi fere sunt, qui teste HILDANO *cap. I. observ. 57* pueris maxime innascuntur, & magno nonnunquam numero in globum quasi conglomerati ileo firmiter inhærent, cujus membranas persæpe ore suo acuto perrodunt, atque rependo in abdominis cavitatem penetrant.

§. IV.

2) *lati*

Altera vermium species est eorum, qui ob figuram suam instar fasciarum latam, lati & tæniæ appellantur, admodumque longi sunt, ut duos, imo decem interdum pedes mensura excedant, & à PLATERO in adultioribus quadraginta pedes longi observati sint: *vid. M. N. C. anno III. observ. 29. BARTHOLINUS Histor. anatom. Cent. III. observ. 14.* Hi plerumque totum intestinorum tractum, præcipue vero ileon, occupant, & raro sine cauda & capite conspiciuntur; siquidem non toti, sed frustulatim per ramenta



menta , cucurbitæ vel cucumerum semen referencia , prodire solent , quæ interpretante SPIGELIO *cap. XV.* nihil aliud sunt , quam nodus lumbricorum medius crassus , à lateralibus & membranaceis suis appendicibus , putredine jam absumtis superstes.

## §. V.

Tertiam lumbricorum speciem constituant ascarides , seu vermes parvi , <sup>3) Ascarides</sup> exigui , graciles , Germanice *Maden* , qui intestinis crassis maximeque recto innidulantes , hoc plerumque graviter cum tenesmo & molesto ad defidendum stimulo rodunt , vellicant & incredibili sæpe copia cum excrementis exeunt.

## §. VI.

Vermium in intestinis præsentia cognoscitur , si pueri in somno pavent & excitati ab eo trepidant , si narium adsunt pruritus , oris foetor , fitis , salivæ fluxus , facies intercurrentibus phlogosibus pallida , extremorum frigus , urina turbida , ventris inflatio , appetitus modo nimius modo dejectus , irregularis alvi apertura & similia. Verum enim vero , cum signa hæcenus recensita aliis etiam morbis sint communia : nullum fane melius nul-

lumque certius datur criterium, ac si vermes ipsi per alvum prodeuntes sui præsentiam indicant.

§. VII.

*Symptomata.*

Symptomata verminosis familiaria pro ratione partium, ubi sedem peregrini hospites obtinent, admodum plerumque variant; sæpe tamen gravissima sunt: siquidem nonnunquam tam horrendæ artuum convulsiones excitantur, ut incantamenti suspicio non raro plebejis incutiatur. Potissimum vero, si in ventriculo resident, nauseam, cardialgiam, syncopen, corporis jectigationes, dentium stridorem, deliria, imo mortem denique ipsam inferunt: in intestinis tenuibus, tormina, morsus circa umbilicum, famem caninam, ventris intumescuntiam, & alvi fluxus concitant; in intestino autem recto molestas titillationes, rosiones fereque perpetuum tenesimum efficiunt.

§. VII.

*Morbi quibus junguntur.*

Vermibus sæpe junguntur febres putridæ, anomalæ, lentæ, quotidianis similes: sæpius autem infesta hæc animalcula aliis se morbis, ut variolis & morbillis, immiscent, vel iisdem superveniunt, & non tantum sympto-

ſymptomata valde augent magnum-  
que virium decrementum adferunt ,  
ſed indicia quoque diagnoftica , &  
prognoſtica , imo ipſam curandi metho-  
dum valde reddunt difficilem.

## §. VIII.

Certis anni temporibus , præſertim *Vermium*  
autumno , quando ſub valde humida *generationi*  
& inæquali aëris temperie , febres *favent cer-*  
catarrhales , variolæ & morbilli epi- *ta anni*  
demice graſſantur , copioſior vermi- *tempora*  
um ſolet eſſe proventus , non aliam  
ob rationem , quam quod tunc tem-  
poris humana corpora , ob labe-  
factatum ſolidorum robur plus humi-  
ditatis inertis , viſcidæ & ad corru-  
ptionem pronæ accumulunt , unde ſe-  
minium illud verminofum plus ali-  
menti & ſuſtentationis recipit. Et in-  
de quoque ratio petenda , cur in-  
fantes, pueri & ſequior ſexus , ſi præ-  
ſertim vita ſedentaria & prava diætæ  
ratio accedunt, frequentius graviusque  
vermibus & inde oriundis morbis  
laborent , quam quidem juvenes ,  
ætate proſectiores & ſexus nobilioris  
homines , qui majori ſolidorum ro-  
bore , circuloque ſanguinis vegetiore  
præditi non tam facile ſuccos inertes  
& viſcidos alunt.

## §. IX.



## §. IX.

-- certa ali-  
menta

Ex omnibus vero causis certa alimenta lumbricorum generationi favent, ut fere sunt ea, quæ partim copiam succorum pituitosorum & inertium ingenerant, partim insectorum ovula & seminia secum recondita in corpus invehunt; quorum pertinent lacticinia, caseus, fructus horæi, panificia cum melle & saccharo condita, legumina, farinacea, & hujus census alia, quæ præ ceteris intus continent nociva insectorum ovula, sine quibus nulla fit in rerum natura animalculorum progenies. Comprobant hoc optime experimenta à *Francisco RHEDI & MALPIGHIO* solerter instituta, qui laudatissimi viri media quondam æstate res putredini subjectas, ut pisces & carnes, diversis lagenis, quarum altera fortiter clausa, altera aperta servabatur, immiserunt, & præterlapso non ita longo temporis spatio in eo vase, cujus orificium insectis & muscis patulum relictum erat, contentas res vermibus valde scatentes invenerunt: in ea vero lagena, quæ clausa erat, ne unicum quidem vermem

mem observarunt. Similiter quoque MALPIGHIIUS commemorat, se sæpius carnis frustula humo sepelivisse, in quibus tamen nunquam, licet per longum tempus in terra condita fuissent, animalcula deprehendisset. Quæ si ita sunt, ut nullus dubito, in apri-co jam posita videtur ratio, cur infantes solo lacte victitantes non prius lumbricis tententur, quam si demum alia edulia, verminoso seminio foetida, accipiunt.

#### §. X.

Pro diversitate corporum magis vel *Prognosis.* minus valentium & sensibilibum, item pro diversa materiæ corruptæ & vermium indole, ipsa quoque differunt symptomata supra §. VII. enumerata. Sæpius tamen iterumque annotare mihi licuit, quod, si exanthematicis febribus, ut purpuræ, variolis, morbillis &c. se vermes immiscent, placidus horum morborum decursus valde plerumque perturbetur, & præter extremorum frigus, pulsus inæquales ac debiles, animique deliquia, mors sæpe ipsa accersatur: quod tamen in pueris crebrius, in ætate provectis rarius contingit. Lumbrici variegati coloris, rotundi nunquam

quam fere non deterioris sunt notæ ; siquidem ad ventriculum sæpe adscendunt, ejusque orificia lancinando, & interdum perforando, epilepticas convulsiones, suffocationis periculum, imo mortem repentinam inferunt. Tæniæ, siue longi longiores inducunt morbos, & quandoque nondum cogniti vita privant. Ascarides minus periculi alunt, quia in intestinis crassioribus, sensu non adeo acuto præditis, residentes rofionibus suis minus nocere valent. Circa meridiem & vesperam plerumque acerbiora observantur verminosorum symptomata; quoniam tum temporis animalcula nervosum intestinorum canalem à cibis vacuum morficando fortius adgrediuntur. Vermes mortui si dejiciuntur, ob summam, quam arguunt, putredinem, periculum portendunt; nisi forte à datis medicamentis fuerint enecati & expulsi. Ex ore prorepentes lumbrici in morbis gravioribus mortuiros indicant ægrotantes; maxime si frequens & frigidus adsit anhelitus: neque tamen omnino mortem semper prænunciant, quia varia testantur exempla, omnis generis febres expulsione vermium fuisse solutas. Quam  
in



in rem legi merentur M. N. C. Vol. III. in append. obs. IV. p. 163. ubi febris tertiana & continua pluribus expulsis oretenus vermibus sanata legitur.

## C U R A T I O.

## §. I.

**Q**uamvis in ingenti vitæ discrimine infantes verminosi versentur, nunquam tamen desperandum est, quodocunque pro diversitate symptomatum, naturarum & rerum circumstantium debito tempore & ordine commoda adhibentur remedia. Jam vero in nullo fere morbo tam diversa & activæ indolis medicamenta à medicis laudantur & applicantur, quam in morbis, ubi vermes vel sunt expellendi, vel enecandi; quare operæ pretium fore confido, si in præsentī anthelminticorum natura, virtute & usu sollicitus, breviter demonstrarem, quæ in iis exhibendis à medico prudentia & circumspectio sit adhibenda.

*Instituti  
ratio.*

## §. II.

Primo autem omnium inter remedia vermibus & morbis inde oriundis dicata referri solent acida, qualia sunt succus

*Anthel-  
minticis  
accensenda  
acida*

fuccus citri, aurantiorum, limonum, ribium, berberum, granatorum, phlegma & spiritus vitrioli, cremor tartari, vinum præsertim acidulum Rhenum ipsumque tandem acetum. Quæ singula profecto eo tempore, ubi æstus & calor præternaturalis jungitur, & febriles complicantur motus, commode locum inveniunt: siquidem non modo æstum egregie temperant, sed putredini quoque, quæ semper fere comitatur, mirifice resistunt, & periculofam symptomatum malignitatem avertunt.

## §. III.

-- amara

Anthelminticis quoque remediis amara, ut absynthium, centaurium minus, scordium, trifolium fibrinum, ruta, & multo adhuc magis, quæ simul purgante facultate pollent, ut aloë, rhabarbarum, colocynthis, & parati ex ipsa trochisci alhandal &c. accensentur. Licet vero hæc remedia vermibus non penitus sint adversa, dum non modo in rhabarbaro, & absynthio, sed in ipsa quoque vesica fellea, teste HILDANO cent. I. obs. 160. vermiculi proveniunt; minime tamen negari potest; quin amara insignem contra hæc animalcula præstent effectum:

fectum : quia partim materiam crudam & viscidam , qua nutriuntur , vi sua balsamica corrigunt , & fibras intestinorum stimulando , corruptos humores una cum verminosa colluvie nonnunquam evehunt , partim vero bilis inertiam , quæ sæpe causam vermium mediatam constituit , in pueris & subjectis humidioribus emendant.

## §. IV.

Tum quoque oleosis magna tribuitur -- oleosa  
efficacia , quæ maxime experimento *Franc.* RHEDI videtur confirmata, dum muscas & alia insecta variis liquoribus immersa in vivis permansisse refert, exceptis aliis oleo perunctis & infusis, quæ invicem mortua vitam non receperunt, licet radiis solaribus fuerint exposita. Equidem libenter concedo, hæc omnia veritati esse consona, atque etiam oleosa, ut oleum olivarum, raparum & amygdalarum dulcium, non sine fructu adhiberi : sed scire licet, minime illa eo unquam scopo posse offerri, ut vermes enecent, quia admodum magna oleorum copia requireretur, si immediate vermes, per totum intestinorum volumen dispersos,  
I debe-



deberent extinguere. Multo magis oleosa in gravibus à lumbricis symptomatibus ideo cenferem utilia, quia sensibiles intestinorum tunicas spasmus constrictas relaxant, & mucilagine quasi oblinunt atque defendunt, ut postea acriora quædam & purgantia remedia magis secure & sine læsione exhiberi possint. Ita ego sæpius mirabili cum effectu, ad vermes enecandos & symptomata lenienda, oleum amygdalarum dulcium ad aliquot cochlearia, imo unciam unam vel duas circa lecti introitum, vel summo mane pueris præscripsi sumendum, subjungendo aliquot horas post pilulas ex extracto panchymagogo Crollii, resina jalappæ, & mercurio dulci paratas.

## §. V.

--*salina*

Eximia etiam laude, ad exturbanda noxia hæc animalcula celebrantur salina, tum quod tenerrimæ horum animalculorum structuræ infesta sunt, tum etiam eorum exitum, intestina stimulando, promovent; idque eo magis, si in sufficiente aquæ quantitate fuerint soluta. Valet id potissimum de salibus istis neutrius generis amaris, & nominatim de sale Glauberi,

beri, Epslonienſi, Sedlicenſi, Egrana-  
rum & Carolinarum aquarum quæ,  
cum vehiculo ſufficienti ſumta con-  
tinuato uſu egregium præſtant ef-  
fectum, maxime ſi pueri & juvenes  
ea vermium ſpecie, qui tæniæ & lati  
appellantur, laborant; quoniam hi non  
tam promte purgantibus, quæ ſpaſmo  
agunt, quam potius per ſalia & fon-  
tes ſalinos feliciter exterminantur.  
Quam ob rem non ſine ratione fonti  
Sedlicenſi, qui ſale amaro ſcatet, e-  
gregia vermes enecandi energia ad-  
ſcribitur, eademque virtus anthel-  
mintica noſtris ſalinis Halenſibus à  
plebe tribuitur, quæ ſubinde largum  
falſæ potum pueris contra vermes  
propinare ſolet. Neque male ſibi  
conſulunt populi maritimi, qui ea-  
dem intentione marinam potant, aut,  
ſi divites ſunt, aquam ex oſtreis re-  
centibus, adjecto limonum ſucco &  
pipere, ebibunt, atque ſic expulſis  
iſtis beſtiolis à tabe aliisque pluribus  
morbis infantes liberantur feliciffime.  
Et quis denique aliis ſalibus, præſertim  
vitriolicis, ſuam in his efficaciam  
antiquitus comprobata denegabit,  
cum per experientiam fatiſ ſuperque  
cognitum ſit, aquas Pyrmontanas,

quæ de subtili martis vitriolo participant, adversus tænias vermesque turbinatos seu cucurbitinos tanto cum successu usurpari, ut ægri pluries instar incantamenti ab omnibus symptomatibus liberi evadant.

## §. VI.

-- *varia  
specifica*

Si ullum morbi genus specifica admittit remedia, ea certe me iudice in vermibus enecandis & ex corpore eliminandis locum inveniunt. Quo nomine inprimis commendanda sunt ex gummosis asa foetida, opoponax, sagapenum, myrrha; ex herbis tanacetum, scordium, absynthium, ex radicibus bulbosis ceparum & allii genera, ex fructibus amygdalæ amaræ & ex his elicatum oleum expressum, ex feminibus semen fantonici, caiputiæ & similia; quæ omnia sulphureo illo graveolenti & specifico, quem exhalant odore, vermibus inimicissimo eos vita privant. Et profecto hæc appropriata tam necessaria sunt, ut nisi convenienti dosi, aliis, jam supra memoratis, fuerint admixta, rarissime optatus respondeat effectus.

## §. VII.

-- *inprimis  
mercuria-  
lia*

Restat vero adhuc aliud non minoris energię specificum ex minerali regno



regno petitem. Est illud ipsum argentum vivum, quod peculiari quadam proprietate his animalculis adversum vitalem istorum motum destruit; quamvis non tam accurate ex principiis mechanicis hæc operandi ratio possit deduci. Hactenus autem varii hoc anthelminticum propinandi innotuerunt modi, quos paucis considerabimus. HELMONTIUS forsan primus fuit, qui experimentum cum hoc remedio instituit, dum illud aqua vel pura, vel quadam destillata decoxit, talemque aquam subtilissimis mercurii particulis imbutam maximo cum emolumento verminosis propinavit. *Henricus* MEIBOMIUS senior alium modum secutus, vinum Rhenanum argento vivo infusum per viginti quatuor horas sine decoctione leni digestionem exposuit, & postea præsentiozem adhuc effectum vidit. Chymicis magis hactenus placuit mercurius dulcis rite præparatus, quem, pro diversa subiecti natura, ad aliquot grana cum purgante, v. g. scammonio sulphurato, refina jalappæ, extracto panchymagogi Crollii &c. in pilulis non sine laudatissimo effectu obtulerunt, vel etiam eundem musco

corallino nuptam cum & sine purgante dederunt. Alii securiorem ingressi viam æthiopem mineralem ex accurata mercurii vivi & sulphuris mixtione, confectum cum saccharo, sicut HARRIS, utiliter propinarunt. Nos denique ipsum argentum vivum bene depuratum cum saccharo cando in mortario exacte miscuimus, &, præmissis præmittendis, sub accuratiori diæta longe efficacius deprehendimus; maxime si postea ægri, ut præservandi fine commendavimus, à carne, piscibus, lacticiniis, dulcibus, caleo aliisque nocivis abstinerunt, & pro potu aquam puram, cum cornu cervi usti decoctam, substituerunt.

## §. VIII.

- præparata.

Inter alia denique præparata multiplici experientia pilulis usi sumus sequentibus: recipe asæ foetidæ, extracti rhabarbari, tanaceti, aloës depuratæ, myrrhæ electæ, mercurii dulcis ana scrupulum unum, extracti croci, castorei ana grana quatuor, M. f. ex scrupulo uno pilulæ numero XV. quibus pro subjectorum & ætatis ratione ad no. V. VI VIII. datis, plures vermibus misere vexatos ex voto sanavimus. Qui à pilulis abhorrent, iis in

in syrupo offerantur, vel bis in die iusta dosi propinetur hujus medicamenti, quod ex liquoris terræ fol. tartari uncia una, extracti rhab. tanaceti & absynthii ana drachma dimidia compositum. Nec denique minorem vidi effectum à sequenti pulvere: Rec. mechocann. alb. sem. fantonici, corallinæ, rhabarbari, mercurii dulcis, scordii, cornu cervi usti, nitri purif. ana drachmam dimidiam, camphor. gr. VI. M. f. pulvis, qui pro ratione ætatis in varias doses dispescendus, vel in electuarium redactus offerendus.

### C A U T E L Æ.

#### §. I.

Sed ut omnia recte administrentur, quasdam subungere placet cautelas, quarum præcipua est, ut nunquam purgantia acriora, vel calidiora propinentur remedia, si febrilis calor subest, nisi hunc augere velimus. Similiter quoque à mercurialibus, omnibusque fortioribus abstinendum est, quando duodenum acri & caustica bile scatet; siquidem inde symptomata non modo exacerbata, sed intestinorum quoque inflammationes accersitas novimus.

*Cautela  
circa pur-  
gantia &  
mercuria-  
lia*



## §. II.

-- circa  
vermes te-  
nuibus in-  
sidentes

Ad vermes ex tenuibus intestinis ex-  
turbandos prodest ante purgantium  
& specificorum usum clysterem ex lacte  
& melle paratum ano infundere, ut  
bestiolæ istæ dulcedine allectæ ex lo-  
culis suis ad intestina facilius descen-  
dant.

## §. III.

-- circa as-  
carides

Ascarides, si recto innidulantur,  
clysteres detergentes lactei, quibus  
tanacetum, allium, vel scordii folia  
incocta sunt, optimum præstant effe-  
ctum: quod similiter etiam de illis va-  
let, qui ex muria, cum marrubio,  
centauryo minori & scordio decocta  
additoque electuario hieræ composito à  
nonnullis parari solent.

## §. IV.

-- circa  
vermes post  
purgatio-  
nem reli-  
ctos

Neque minus tum temporis enemata  
commodum inveniunt locum, si, quan-  
do verminosa progenies post purgatio-  
nem per alvum non ejicitur, quod sæ-  
pius usu venit, si in cœco intestino ni-  
dum obtinet, quod purgans non valet  
attingere.

## §. V.

-- circa an-  
thelminti-  
corum ob-  
lationem.

Optime quoque dantur anthelmin-  
tica in electuario vel syrupo, qualis est  
cichorei cum rhabarbaro: quod opti-  
me

me norunt mulierculæ , quæ pueris verminosis semen fantonici ad scrupulum circiter unum cum melle subactum ante lunæ vel incrementis vel decrementis mutationes in lacte propinant; nec sine effectu , modo caveatur , ne semen illud sit cariosum.

## §. VI.

Nonnunquam cum internis exter- *Externorum usus.*  
na utiliter possunt conjungi; quo fine laudem merentur emplastra vel epithemata epigastrii & umbilici regioni applicanda , quæ ex absynthio , felle tauri , aloë , colocynthide , succo centaurii minoris & oleo florum spicæ conflari possunt; quorum etiam spectat unguentum de artanita cum aliis.

## §. VII.

Si quid vero utile & inprimis necessarium datur monitum , est profecto hoc , quod coronidis loco adjicere lubet , ut scilicet medicus ante omnia vermium præsentiam certis signis habeat cognitam , si remedia iis vel enecandis vel extirpandis apposita adhibere studet , ne forsan , si ægri ex alia causa , alioque morbo ægrotant , plus noxæ quam utilitatis adferat.

## CAPUT XI.

*De aliis infantum morbis.*

## §. I.

*Institutum.*

**P**lacet nunc pauca de adfectibus nonnullis in uno capite collectim sumtis subjicere; non quidem eo animo, ac si eosdem leviores, & speciali disquisitione indignos haberemus, sed quia non tam longam & scrupulosam causarum evolutionem postulant, admodumque pauca ex medendi methodo ad sanationem requirunt, si modo recto tempore, ordine & debito regimine adhibeantur.

## §. II.

*Cardialgia  
signa*

Primo loco se offert cardialgia, quæ se maxime per insignes pectoris angustias cum respirandi difficultate junctas, per abdominis & præcordiorum sub costis spuriis inflationes, per inquietudines & sæpe conjunctos ructus manifestat; quibus etiam non raro febriculæ & convulsiones superveniunt.

## §. III.

*-- causa*

Oritur hoc morbi genus à violenta & spastica ventriculi orificiorum stricture, & flatibus inde inclusis, qui sensibiles ventriculi membranas distendendo, summas anxietates, inquietudines,  
&



& ob impeditum diaphragmatis descensum, respirandi difficultatem cum reliquis producant symptomatibus. Ad hanc vero causam constituendam maxime omnium meconium non rite evacuatum, vel lac coagulatum & stagnans, vel alii etiam humores visceri in prima regione stabulantes, & in flatu resoluti contribuunt; non exclusis demum aliis, quæ nervos ventriculi tunicas irritando, ad spasmodicam constrictionem animare, & nocivam flatuum retentionem inducere valent.

## §. IV.

Præsente paroxysmo parum lactis offeratur, & tam nutriti, quam infanti pulveres antispasmodici absorbentes cum aqua quadam carminativa propinentur, datis simul potus loco decoctis cornu cervi gelatinosis, & emulsionibus temperantibus. Quum vero debita flatuum discussio &eductio optimum in tali casu præstet auxilium, necesse est, ut per clysteres leniter carminativos & emollientes huic scopo quamprimum satisfiat. Extrinsecus quoque adhibita paregorica multum huc faciunt; quo fine inunctiones abdominis cum linimento, ex oleo chamomill. & anethi cocto, additis ali-

quot

-- curatio  
per anti-  
spasmodica

quot guttulis olei cumini, menthæ vel caryophyllorum & aliquot granis camphoræ, merentur commendari.

## §. V.

-- per carminativa

Alvo clysterum ope reſerata, leniora carminativa profunt; niſi febricula auctior obſtet: quamobrem nutrici eſſentiam corticum aurantium, carminativam Wedelii cum liquore noſtro anodyno mixtam; infanti vero æleoſacharum ex aliquot guttulis olei aniſi & chamomillæ veri paratum offerre expedit, ſuperbibendo decoctum avenæ excorticatæ calidum.

## §. VI.

-- poſt paroxyſmum.

Extra paroxyſmum ad fomitem mali ſubtrahendum non modo nutrix, ſed infans quoque leniter debet à for-  
dibus depleri; quod in hoc caſu optime perficitur, ſi per intervalla ad ſex, octo vel decem grana pulvis por-  
rigitur, qui ex rhabarbari electi, lapid. cancror. ana drachma dimidia, ſemin. cymini gr. VI. componitur; non omiſſis demum remediis roborantibus ſtomachicis, ut eſt elixirium noſtrum baſſamicum viſcerale.

## §. VII.

Urinæ ſuppreſſio.

Quando pueri vel nihil urinæ red-  
dunt, vel guttatim & cum ploratu  
min-

mingunt, urinæ adest suppressio, quæ horrendis sæpe cruciatibus adfligit, quia tum plerumque teneri præ anxietate & inquietudine lac avidius sugunt, neque tamen ab ejus copia per mictionem se exonerare valent. Oritur hæc anxia mingendi difficultas, quando lac nutricis per crassa, acida & acria edulia est corruptum, vel si ipsa, ob potus infalubres, difficulter mingit; siquidem talis solet esse infantis urina & mictio, quales sunt ejus humores, atque ea deprehenditur humorum constitutio, qualis lacteus nutricis succus, quem nutrimenti loco, durante lactatione, ex mammis pusillus recipit.

§. VIII.

Sæpe etiam causa ischuriæ est calculus in vesica obhærescens, quo facile *Calculi origo & signa.* infantes, ob largiorem succorum acidorum progeniem, laborant; maxime si per hæreditariam dispositionem à parentibus acceptam ad calculi generationem inclinant. Hæc vero causa si subest, exinde cognoscitur; si infantes genitalia digitis scalpunt, & urina non modo guttatim ac cum gemitu emittitur, sed sabulosæ quoque particulæ simul prodeuntes in urina adservata fundum petunt. Quod si vero  
signa



signa hæc omnia non sufficerent, per artificialem explorationem præsentia calculi facile poterit detegi.

## §. IX.

*Curatio is-  
churia per  
diætam &  
alia*

In curatione id maxime curandum est, ut diætâ nutricis, durante adhuc lactatione, aut ipsius infantis, si ab lactatus est, emendetur: quod optime fit, si omnes cibi incongrui, & potus minus salubres serio fugiuntur. Dein vero, malum plerumque sustentatur ab impedita alvi exoneratione: quare hæc ante omnia debet promoveri; nisi impetum humorum ad vias urinarias majorem efficere velimus. Quo fine vel passulæ rhabarbarinæ inter cibos datæ, vel clysmata ano injecta profunt.

## §. X.

*-- per po-  
tum*

His præmissis commodus nutrici, vel etiam infanti potus est præscribendus, qui non modo diluens, sed leniter quoque diureticus est; qualis esse solet, si aqua levis cum radicibus asparagi, dauci, petroselini, graminis, foeniculi, saxifrag. cichorei decocta mane calide, & dein frigide potus loco exhibetur. Nec minor est efficacia feri lactis aciduli cum canerorum lapidi-

lapidibus correcti, quod simul temperantem habet virtutem.

§. XI.

Quando à calculosis ramentis urethram obstruentibus, & sensibilem *-- calculi per interna* ejus tunicam irritantibus urinæ fluxus cohibetur, & horrendi dolores calculosi concitantur, itidem profunt clysteres emollientes; interne vero, ad spasmum compescendum, dare convenit decoctum dialthæ Fernelii cum sapone Veneto, & oleum amygdalarum dulcium cum aliquot liquoris anodynii guttulis in decocto hordei vel avenæ calido; quibus, relaxato spasmo, subjungi possunt pulveres ex lapidibus cancrorum, testis ovorum uftis, solutione oculorum cancri, & alia urinam leniter pellentia.

§. XII.

Extrinsècus, si dolor à calculo & *-- per externa.* ischuria valde urget, balnea quoque aquæ dulcis, cui emollientia, ut malva, radix althææ, flores chamomill. &c. incocta sunt, usum haud spernendum præstant. Neque de nihilo est, facculos cum talibus speciebus repletos regioni pubis tepide imponere, vel eisdem oleum scorpionum inungere.

§. XIII.

## §. XIII.

*Morbi catarrhales unde?*

Maxime quoque tenera progenies, ob largam succorum pituitosorum copiam, catarrhalibus & serosis tentatur adfectionibus, quas inter coryzam, gravedines, raucedines, tussim, asthmata, pectoris infarctum cum roncho & sibilo, parotides, oculos & aures manantes, crustamque lacteam recensemus, & jam breviter considerabimus. Singuli hi morbi generatim in eo conveniunt, quod ut plurimum ab aëris vitio, & subitanea tempestatum mutatione, nec non à suppresso transpirationis negotio suam nanciscantur originem.

## §. XIV.

*Tussis & asthmatis generatio*

Quod vero speciatim ad asthma & tussim, eamque ferinam & siccam attinet, sciendum est: hæc vitia cum magna anhelitus difficultate, & suffocationis metu non solum sæpe epidemice grassari, sed inprimis etiam, experientia teste, dentitionis difficultatem comitari, si consensus lege ipsi respirationis nervi tenduntur & vellicantur. Neque raro eveniunt, à variolis & morbillis improvide tractatis, & quando superato jam morbo, nec alvi excretio, nec insensibilis transpiratio



tio debito modo promovetur; vel etiam, si acris quædam excrementitia materia in erysipelate, purpura, crusta lactea &c. ad interiora fuerit repulsa. Tum enim ab humore viscido acri libenter pulmonum infarctus, & molestæ nervorum pulmonalium irrationes, quæ asthma & tussim concitant, produci solent. Denique, inprimis etiam hæc mala solent adfligere, ob nimiam ventriculi inflationem à lacte viscido ibi copiose stagnante & diaphragmatis descensum impediante inductam; unde etiam non raro usu venit, ut vomitus vel sponte obortus, vel arte provocatus tam tussientibus, quam ægre spirantibus exoptatum ferat levamen.

## §. XV.

Quoad sanationem tussis & asthmatis hæc maxime tenenda erunt, quod interius pulveres absorbentes cum radice iridis Florentinæ, spermate ceti & saccharo cando mixti & colati, item elixir balsamicum, ex tinctura tartari, essentia myrrhæ, croci, nucistæ, corticum aurantiorum & spiritu salis ammoniaci confectum, insigniter prosint. In subjectis vero siccioribus & magis sensibilibus melius adhuc elixir pectorale temperatum, ex extracti

*curatio  
per resolu-  
ventia  
pectoralia*

croci granis IV. aquæ veronicæ & hyssopi ana uncia dimidia, & syrapi papaveris albi vel de erysimo Lobellii drachmis duabus compositum, convenienti dosi propinatur.

## §. XVI.

-- per de-  
mulcentia

His commode interponi & subjungi possunt infusa herbarum pectoralium calida, quibus, regnante præsertim humida & frigida aëris intemperie, non modo transpiratio egregie promovetur, sed & resolutorius effectus perbelle obtinetur. Atque hæc similiter conducunt, quando contumax & sicca tussis à lymphâ acriori laryngem irritante vel provenit, vel cum ea jungitur; maxime quando simul, ad acrimoniam demulcendam, sperma ceti in jusculo solutum propinatur, vel cum oleo amygdalarum dulcium, saccharo cando, syrupo dialthæ Fernelii, croco & guttulis aliquot anisi in electuarium redactum per intervalla deglutitur.

## §. XVII.

-- per lenio-  
ra emetica

Si quando asthma cum tussi conjunctum à cruditatibus acido-viscidis in ventriculo fluctuantibus, & inde inducta ejus inflatione dependet, cum fructu sæpius datur lene emeticum, ex grano dimidio vel quarta tantum parte tartari eme-

emetici cum soluta manna paratum, aut ex granis aliquot rad. ipecacuanhæ cum aqua calida, infusis & syrupo quodam addito edulcoratis : quem usum etiam quam optime clysteres præstant emollientes & carminativi, qui flatibus infra exitum parando, ad feliciorum morbi decursum haud parum contri-  
buunt.

## §. XVIII.

Si repulsa materia acris excrementi-  
tia ansam malo suppeditat, præter in-  
terna diaphoretica, sæpe mirabilem  
præstant effectum leniora vesicatoria  
nuchæ apposita. Extrinsecus vero in  
hisce pectoris adfectibus suppetias fe-  
runt inunctiones cum axungia humana  
& spiritu salis ammoniaci vinoso in-  
stitutæ.

## §. XIX.

Achores, vari & tinea, tubercula  
sunt ulcerosa, à vitio & corruptione  
feri falsi, viscerum in glandulis tubulisque  
subcutaneis subsistentis oriunda, &  
plerumque à nimia voracitate, lacte nu-  
triciis corrupto, & suppressa per frigus  
admissum transpiratione, suam nancif-  
cuntur originem. Quod similiter va-  
let de parotidibus, auribusque & ocu-  
lis manantibus.

-- & vesicatoria.

Achorum,  
tinea &c.  
origo



## §. XX.

-- *curatio.*

Singuli hi adfectus, ut & reliquæ defluxiones catarrhales, optime sanantur, si nutricibus partim infusa sanguinem & lympham diluentia ex radice liquiritiæ, cortice & ligno sassafras, femineque foeniculi parata; partim pilulas de succino Cratonis cum & sine mercurio dulci, item elixir pectorale superius descriptum propinamus: infanti vero pulveres ex antimonio diaphoretico, lapidibus cancrorum, iride Florent. lacte sulphuris, pauxillo croci & oleo anisi confectos; nec non laxantia, & mercurio dulci, rhabarbaro & manna conflata porrigimus. Parotides vero, præter interna resolventia, externe emplastro diachylo simplici cum camphora remixto volunt tractari, & si tumor discuti renuit, cataplasmate emolliente ad maturitatem deduci. Sed hæc sufficiant, quia jam in quarta Medic. System. parte Tomi IV. de his adfectibus fufius egimus.

## §. XXI.

*Singultus  
& vomitus  
causa pro-  
xima*

Singultus æque ac vomitus ex stomacho & cruditatibus in ipso coacervatis oriuntur. Quod si enim tenacior acidiorque mucus superiori ventriculi orificio firmitus infidet, non modo ipse ventri-

ventriculus ad contentorum depletio-  
nem, sive vomitum stimulat, sed  
etiam propter consensum diaphragma  
quasi convellitur, & facta hujus sub  
inspirando contractione, singultus,  
subinde contumacissimus, proritatur;  
unde etiam non raro singultus & vo-  
mitus simul tenellos cruciare solent.

§. XXII.

Evenit ut plurimum utrumque ma-  
lum à nimia lactis repletionem, vel ejus-  
dem in ventriculo corruptionem. Hæc  
autem si præsto est, materia plerum-  
que lactea vitiosi coloris malique odo-  
ris vomitu solet rejici. Sæpe vero  
externum frigus debet accusari, vel  
etiam dentitio difficilis & dolorifica  
ansam potest suppeditare, si propter  
consensum diaphragma & ventriculus  
in mali consortium trahitur.

§. XXIII.

Si à copia lactis adsumti vomitus &  
singultus proveniunt, nihil fere peri-  
culi præfagiunt, cum jam in vulgus  
notum sit, vomitu in hoc casu infantes  
plerumque levari. Si vero lactis cor-  
ruptio causam mali constituit, pejus  
est, quia sæpe epilepsiæ & convulsio-  
nes accersuntur, quæ vitam haud raro  
auferunt.

## §. XXIV.

-- curatio  
generalis

Ad rectam sanandi methodum ipsæ nos causæ deducunt. Quod si enim lac copiose sumtum peccat, in posterum ejus quantitas debet subtrahi; si vero depravata ejus qualitas in vitio est, debitam ejus excretionem tam in nutrice, quam in infante procurare decet. Qua autem ratione hoc perficiendum velimus, iterato in hac tractatione docuimus.

## §. XXV.

-- & spe-  
cialis.

Speciatim vero in utroque adfectu prodesse solent, syrups menthæ vel betonicæ cum aliquot olei macis vel liquoris anodyni guttis datus, vel etiam aqua florum chamomillæ, millefolii, menthæ, ceraforum nigrorum cum prædicto liquore minerali oblata. Extrinsecus non modo frictiones cum pannis calidis, sed & inunctiones regionis ventriculi cum oleo anethini uncia una, menthæ drachma dimidia croci scrup. i. vitelli ovi no. i. egregio sunt levamini.

## §. XXVI.

Alvi ad-  
strictæ  
causæ

Alvus infantibus modo adstricta modo nimis soluta est. Adstrictio con-  
tingit,



tingit, quando infantes nimis sunt voraces, aut ipsæ nutrices, si adhuc sugunt, victu crasso & acido, potibusque spirituosus delectantur. Licet vero ex tardiori fecum excretionem non statim noxa redundet; sæpe tamen, si diutius retinentur, magnis gravibusque malis ansam suppeditant.

§. XXVII.

Ad alvum igitur rite solvendam, eo -- *sanatio.*  
præcipue dirigenda est intentio, ut nutrix victu levi & emolliente utatur, interpositis in cibo passulis minoribus cum rhabbaro & saccharo in electuarium redactis, vel cum pomis Borstorfianis decoctis. Infanti vero succurritur partim syrupo cichorei rhabbarino, cum aliquot granis mechoacannæ albæ per intervalla dato, partim clysteribus ex decocto avenaceo cum melle & butyro factis, vel ex ferro lactis & sapone Veneto paratis. Neque usu caret infimi ventris circa umbilicum inunctio cum oleo amygdal. dulc. pulveri trochisc. alhandal nupto instituta.

§. XXVIII.

Alvi adstrictioni opposita est diarrhœa, seu nimium alvi profluvium, *Diarrhœæ genesis*

quod infantibus numero pluribus ab ira & perversa nutricis diæta, à transpiratione prohibita, à vitiata ciborum digestionem & inde inducta bilis acrimonia evenit: unde feces varii coloris, odoris & consistentiæ, imo sæpe sanguinolentæ crebrius dejiciuntur: non alia ex causa, quam quia intestina vel spasmus contracta contentas fordes exprimunt, vel propter atoniam sponte dimittunt. Quare sæpe sæpius usu venit, ut ejusmodi alvi dejectiones non modo graves dolores e. g. ex dentitione difficili comitentur, verum etiam atrophicis & paralyticis valde sint familiares.

## §. XXIX.

-- *tractatio respectu  
nutricis*

Licet vero sordidum hoc malum tum infanti, tum aliis valde sit molestum, sæpeque timorem funesti eventus injiciat; minime tamen statim debet fisti; præsertim si illud bene ferant pueri, nec inquietudine, vigiliis, ventris torsione, atrophiam, aliisque signis opem sibi ferendam expetant. Quod vero si accidit, primo omnium ad lac nutricis, si eodem adhuc utitur, est respiciendum, atque nutrix, si mali causam fovet, permutanda, substituendo

tuendo in potus locum ptisanam cum succo cydoniorum, vel juscula gallinacea cum oryza & milio decocta.

§. XXX.

Ipsi infanti laboranti pulveres ex - - *ratione*  
bolo armeniae lapid cancror. cum ali- *infantis.*  
quot granis cort. cascarillae interne dati profunt: quibus etiam pro circumstantiarum ratione succinum, vel tertia pars theriacae coelestis pro dosi potest addi. Extrinsecus autem linimentum ex olei nucistae expressi, olei jessmini ana uncia dimidia, balsami Peruv. drachmis duabus, olei menthae drachma 1. compositum, ventrique calide inunctum commendari meretur.

§. XXXI.

Præter hæc vero in tali morbi statu *Clysterum*  
insignis est usus clysterum, ex fero la- *usus.*  
ctis dulci cum milio & oryza cocto & transcolato paratorum; quæ simul tenesmum frequentissime junctum egregie solantur: licet etiam huic ipsi diutius duranti optime & quasi specificè profint suppositoria, ex vitello ovi asfato, cum croco, thure & uno grano opii conflata.



## §. XXXII.


*Conclusio.*

Atque hæc sunt, quæ de morbis infantum præcipuis cum B. L. communicare volui. Deus O. M. qui non ignorat, me, præter sui gloriam, artis nostræ incrementum, & ægrotantium salutem, nihil unquam magis curæ cordique habere, hæc omnia reddat salutaria, ut suo tempore fructus ferant uberrimos.

F I N I S.



COM-



COMMENTARIUS  
DE VITA  
FRIDERICI  
HOFFMANNI,

Regis Prussiæ Consilarii Intimi,  
Archiatrorum & Professorum  
in Academia Regia Halensi  
Senioris &c.

AUCTORE  
JOANNE HENRICO SCHULZE,  
Philosophiæ ac Medicinæ Profes-  
sore publico.

**F**LORENTISSIMA & per totum  
orbem celeberrima Academia  
Fridericiana, quæ Halæ Mag-  
deburgicæ, auspiciis FRIDE-  
RICI primi Borussiae Regis & Ele-  
ctoris

ctoris Brandenburgici , An. M DC  
XCIV. fundata fuit , tam felici incre-  
mento caput extulit , ut non solum  
omnes litterarias civitates sub ejusdem  
Regis sceptro degentes , & jam olim  
coalitas , brevi tempore superaret, ve-  
rum etiam vicinarum Academiæ nullo  
quicquam concederet , five famam  
& merita docentium in iisdem Patrum  
spectes , five litteris operantium fre-  
quentiam & nobilitatem. Tam læti  
& ad votum potentissimi fundatoris  
omnino fluentis successus causam si quis  
quæsierit ; ex hominum quidem parte  
non aliam potiore facile inveniet ,  
quam quod initio statim provide cura-  
tum fuit , ne alii constituerentur Pro-  
fessores , nisi nominis celebritatem con-  
sequeuti , eaque ætate vigentes , qua &  
strenuis laboribus sufficerent , & re-  
rum usu jam essent subacti & exerci-  
tati. Unde factum est , ut tot viris le-  
ctissimis per omnes , ut vocari solent ,  
facultates summis viribus simul eniten-  
tibus , omnique ingenio pro novæ  
Academiæ gloria contendentibus , nul-  
la siue divinarum siue humanarum re-  
rum scientia fuerit , quam non nova  
luce collustrarent , adeo , ut mox in  
sui admirationem plurimos raperent ,  
nec



nec paucos ad æmulum studium provocarent.

Eluxit quam maxime inter hæc sidera doctrinæ elegantis copia & varietate ornatissimus, splendorum munerum meritorumque decoribus illustris & variis ingenii monumentis artisque felicissimis operibus inclytus vir, Dominus FRIDERICUS HOFFMANNUS, Comes Palatinus Cæsareus, Regiæ Majestati Borussicæ à consiliis sanctioribus & valetudinis tutela, doctrinæ naturalis & medicæ primus in Academia Fridericiana Professor & primarius, omniumque, qui in ea publice docent, Senior, Academiæ Cæsareæ Naturæ curiosorum, ut & Petropolitanae ac regiarum societatum Britannicæ ac Borussicæ Socius, Patronus ac Præceptor meus perpetuo obsequio ob plurima beneficia colendus; Cujus vitam tanto majore fiducia litteris mandare adgredior, quod longa ac diuturna ejus consuetudine usus, nullaque rerum ad illum pertinentium notitia destitutus, tum Commentarii de vita HOFFMANNI, quem ipse composuit accuratissime, particeps factus, certiora omnino allaturus esse videar, quam ab aliis exspectari possint. His itaque

itaque præfidiis instructo & diligenter  
uso haud metuendum videtur, ne me-  
diocre hoc ab omnique ornatu vacuum  
scribendi genus minus gratum atque  
posteritati demerendæ inidoneum exi-  
stimetur.

Videor autem mihi in laudatissimos HOFFMANNI nostri majores inquirendo familiam vere Asclepiadeam intueri. Quantum enim per duo admodum sæcula respicienti patet, Medici aut Pharmacopœi sunt, quibus suam debet originem. Atque ut à materna stirpe initium faciam, indicandus est vir præstantissimus *Wolfgangus Holzwirth* ex familia nobilissima & consulari apud nos ortus, qui artis pharmaceuticæ studiosus illo tempore *Wittebergæ* versabatur, quo *Valerius Cordus* magna sui nominis gloria *Dioscoridem* ibi explicabat. Tantopere autem *Cordi* doctrina capiebatur *Holzwirthus*, ut *Wittebergæ* discedentem eum Romam usque prosequeretur, atque indivulsus comes & socius c1010XLIV. eidem immatura morte obeunti adfisteret. Quum biennium Romæ exegisset, stimulabat ipsum plura lustrandi & simplices medicinas in patriis locis requirendi desiderium, quasi hereditate

ditate à *Cordo* præceptore acceptum usque *Venetiis* navem conscenderet & *Hierosolymam* usque pergeret. Ex longinqua peregrinatione redux *Wolfgangus* noster c1010LIV. viri magnifici & consultissimi *Melchioris Klingii* Archiepiscopatus *Magdeburgici* Cancellarii filiam *Catharinam* uxorem duxit, & ex hac suscepit filiam *Elisabetham*.

Hanc vero *Elisabetham Holzwirthiam* conjugem c1010LXXIX. duxit LAURENTIUS HOFFMANNUS, ex celeberrima Episcopatus *Bambergensis* metropoli ortus, *Lipsiæ* autem artem pharmaceuticam edoctus. Hic FRIDERICI nostri proavus, atque HOFFMANNORUM *Halensium*, quotquot cognatione nostrum tangunt, sator fuit. Ex progenie hujus Laurentii maxime notari merentur duo filii *Laurentius* & *Andreas*; quorum ille, *Jo. Georgii* Electoris *Saxonie* Archiater, eximium & immortale nomen inter præcipuos Germaniæ Medicos consequutus nobilitatis insignia, tribuente divo *Ferdinando II.* Romanorum Imperatore, familiæ *Hoffmannianæ* intulit, & ingenii etiam præclara monumenta reliquit: hic autem pharmaceuticæ rei consecratus in hac urbe mansit & ex *Gertrude,*



de, *Friderici Seyferti*, Ædilis & Camerarii *Halenfis* filia, progenuit FRIDERICUM HOFFMANNUM, qui *Friderici* nostri parens factus est.

Postulat hic maxime locus honorificam commemorationem *Balthasaris Brunneri*, viri inter sui temporis Medicos celeberrimi & de *Hoffmanniana* familia meritissimi facere. Erat is *Halæ* natus, patre *Laurentio*, cive & Senatore, qui originem duxerat ex *Briga Silesiorum* urbe & quondam sede ducali. Commendatissimus autem erat hic *Balthasar* magno trium Imperatorum Archiatro *Jo. Cratoni à Kraftheim*, in cujus ædibus aliquanto tempore vixit filii loco habitus. Non minus carus erat *Georgio Laureæ* Electorum & Marchionum Brandenburgicorum Archiatro, cujus filiam uxorem ducebat. Quum vero illam immatura morte amississet, secundis nuptis sibi adjungebat *Laurentii Hoffmanni* viduam *Elisabetham Holzwirthiam*, ejusque liberis *Hoffmannianis* summa benevolentia fovendis & educandis operam ita impendit, ut non in vitrici manus eos incidisse, sed amantissimum patrem in eo habere intelligeretur. Despondebat hic unicam filiam ex priori uxore susceptam, privigno

Lau-

*Laurentio*, quem ad optimas scientias & medicinæ penetralia deduxerat, eundemque commendatione sua potissimum juverat. Gratus hoc beneficium prædicat *Laurentius* in præfatione, quam amantissimi vitrici socerique consiliis præfixit, quum apud nos cl<sup>o</sup>l<sup>o</sup>c<sup>o</sup>xvii. primum ederentur. Eadem enim non ita pridem apud *Batavos*, procurante *Hermanno Bærhavio* recusa esse publice notum esse debet.

Transimus ad *FRIDERICUM HOFFMAN-  
NUM*, *Andrææ* filium, qui cl<sup>o</sup>l<sup>o</sup>c<sup>o</sup>xxvi. apud nos natus & litteris probe tinctus, medicinæ autem scientia *Jenæ* ac *Wittebergæ* imbutus tantam crebro & felici artis exercitio famam consequutus est, ut *Augusti Saxonie* Ducis & Archiepiscopatus *Magdeburgici* Administratoris, Archiatri munus consequeretur. Nomen etiam illustre in republica litteraria scriptis immortalibus consequutus est, quæ inter maxime celebrantur *Methodus medendi* & *Clavis Schræderiana*. Hic in matrimonio habebat *Annam Mariam* ex antiqua & nobili *Knorriorum* gente ortam, *Friderici Knorrii*, *Patricii*, & Senatoris filiam, proxima adfinitate junctam Medico & Chymico clarissimo *Matth. Unzero*;

L

cujus

cujus gener fuit itidem celebris *Andreas Nietnerus*, Ducis Saxoniae, & Administratoris Magdeburgici Archiepiscopatus Archiater; Ex hac inter complures liberos suscepit M.D.CLX. a. d. XIX. Februarii FRIDERICUM nostrum, qui non solum omnes ex iisdem parentibus natos, verum etiam ejusdem familiae majores, quantumvis laudatissimos, ut eruditionis & meritorum magnitudine ac dignitatum splendore, ita etiam longævitate, divino quidem munere, longissime superavit.

Primam ejus ætatem ad christianam pietatem & litterarum rudimenta, quantum sese explicantes animi vires capere poterant, pii parentes formarunt, eidemque tam necessario negotio idoneos homines in subsidium adhibuerunt. Quum hæc inter ætatis decimum tertium attigisset annum, publico urbis Gymnasio, tunc frequentia auditorum & docentium celebritate florentissimo, tradebatur. Inter cæteros eminebat M. *Prætorii* neque minus M. *Drechsleri* fidelis industria & singularis nec omnibus concessa facilitas, qua teneris adolescentulorum animis ea instillare præcepta



cepta noverant , quibus ad altiores disciplinas cum fructu percipiendas præparari debent. Atque horum imprimis virorum fideli institutione per quatuor annos gavifus , præter pure ornateque loquendi & scribendi exercitia, per omnes etiam philosophiæ partes deductus & mathematicis insuper disciplinis large imbutus fuit. Memini ipsum sæpe auditoribus suis, sæpius filiis , iisque quos filiorum loco præter cæteros amabat, commemorare , nihil magis præclare sibi profuisse , quam quod mature ad numerorum doctrinam & mathematicas res tractandas deductus fuerit. Ita enim se se adsuevisse clarorum & perspicuorum conceptuum desiderio , & ex cognitis certisque principiis obscuriora & incognita eliciendi demonstrandique methodo , ut deinceps, tam discendo quam docendo occupatus, non nisi quæ clara & perspicua sunt , vel ipsemet amplecteretur, vel aliis proponere amaret. Solebat in hanc rem commemorare HIPPOCRATIS ad *Thessalum* filium epistolam , quæ hujusmodi studiorum in omni vita multiplicem fructum impense laudat , medicinæ vero cupido ea-

dem seorsim commendat. Et ingenium omnino tale nactus erat noster, ut istiusmodi disciplinis, quæ certis conclusionibus innituntur & connexæ sunt, præcipue delectaretur: minime vero ferretur ad illa, quæ imaginationis & memoriæ ingentem vim & nativam promptitudinem poscunt, ut sunt poëtica facultas aut musica, item oratoria atque amplissima stirpium cognitio; quibus quidem iustum pretium statuit, ipse autem severioribus istis, quæ iudicium & meditationem requirunt, animum à primis annis, & per omnem deinceps vitam impendit.

Hæc inter domi ipsum ab otio illiberali fatis revocabat indulgentissimi parentis semper occupatissima ad aliis inserviendum industria. Nam quum continuo illi adhærerent medicinæ studiosi, quibus per omnes artis salutaris partes instituendis operam dabat; creberrime noster doctissimo parenti adstabat, quoties vel anatomicis vel chemicis demonstrationibus occupabatur. Sicque vere illum reportabat fructum, quem isti priscorum Asclepiadarum filii, qui cum patribus, artis opera, eoque pertinentia progymnasmata,

nasmata, exercentibus continuo verfantes, ipsi propemodum non sentientes proficiebant, tamque profunde animis visa, audita propriisque manibus tractata immittebant, ut facilius fuisset elementa litterarum oblivioni tradere, quam ex animo hæc dimittere, quibus à teneris unguiculis adfueverant.

Tam felici successu, gradibusque citatis ad metam studiorum decurrentem adolescentem acerba clades *Hoffmannianam* domum MDCLXXV. affligens graviter perculit. Dei enim nutu fiebat, ut intra triduum uterque parens & filia natu maxima, epidemio morbo, qui veris initio tunc sæviebat, abriperentur. Non possum quin hoc loco commemorem, quod ex ore excellentissimi viri sæpe me audire cum summa jucunditate, nec minori fructu meo, memini. Nam ut sæpe solebat vel liberis vel familiaribus amicis recensere, quæ sibi adversa olim visa, ad felicitatem tamen veram promovendam potentissima, divinitus evenerint; & non minus ex sobria philosophia quam pietatis christianæ intimis doctrinis de fructu ex adversis capiendo graviter dislere-



re : ita hujus quoque casus non aliter meminisse solebat , quam ut divinæ providentiæ gratias ageret , quæ hæc in maximam utilitatem sibi & suis evenire jussisset. Decefferant optimi parentes , quo tempore lubrica ætas natorum maxime indigebat parentum consiliis , monitis & multis ad viam commodam subsidiis , ab illorum pietate & indulgentia expectandis. Decefferant non amplissimo patrimonio relicto , & hujus non exiguam partem flammæ consumferant. Sed orba parentibus adolescentia ad Deo constantius fidendum , ad preces ardentius fundendum , ad virtutes amandas & honesta studia impensius colenda impulit , & loco fastus , quem felicissime vivere adsueta vix effugiunt , veram modestiam & inserviendi promptum honestumque studium inspiravit , quibus virtutibus effectum est , ut satis mediocres opes , divino adspirante favore , sufficerent ad illud in vita consequendum , ut nemo illorum , quos tam gravis calamitas simul cum nostro perculerat , non abunde haberet , unde vitam honeste & cum decore toleraret. Quin nec studia , quibus se noster consecraverat , detrime-

trimenti quicquam inde cepisse idem probe accurateque ostendit. Nam quum mature gustum medicinæ beatus parens præbuisset, verendum erat, ne se his, quæ huic disciplinæ domestica & propria sunt, nimis cito immergeret, eorumque dulcedine captus segnius aut minori saltem ardore ea tractaret, sine quibus hæc, quæ ad sublimiores scientias pertinent, nec bene digeri nec communicari cum aliis possunt.

Manfit autem Gymnasii patrii alumnus usque ad finem A. MDCLXXVIII. quo editis speciminibus eruditionis suæ per disputationem *de Mundo*, præside laudato *Prætorio* defensam & solennem orationem publice eidem vale dixit, & cum patronis ac necessariis amicis de ratione studiorum alibi locorum ineunda earumque sede eligenda deliberavit. Amor artis salutaris, *Hoffmannianæ* domui quasi gentilitius, semper animum nostri tenuerat; ejus autem celeberrimus Professor *Georg. Wolfgangus Wedelius* in inclyta *Jenenfi* Academia tunc unus omnium maxime florebat: quare omnium consilio hæc ipsi schola *Asclepiadei* dogmatis eligebatur.

Quemadmodum mature cognoverat, Medico futuro maxime idoneas esse disciplinas mathematicas & philosophiæ naturalis assiduum studium: ita inprimis curæ cordique habebat, ut in hisce magis confirmatus medicinæ operam felicius navaret. Nec deerant tam honesto amorī, qui abunde satisfacerent, celeberrimi tunc Doctores *Erhardus Weigelius*; ille *Archimedes Jenensium* & *Jo. Andr. Schmidius*, Theologus postea *Helmstadiensis* & Abbas *Mariæ-vallensis*, quorum doctrinis se plurimum debere gratus sæpe celebravit. Ad medicinæ autem doctrinas recte percipiendas præter cæteros utebatur jam laudato *Wedelio* præceptore: plurimum tamen ab assidua meditatione & frequenti bonorum medicinæ auctorum lectione expectabat. Sub hoc præside in cathedra stabat An. MDCLXXIX. & de *Menstruo ventriculi* disputabat.

Quum annum tempus Jenæ transigisset omnibusque commilitonibus industriam suam comprobasset; rogabant ipsum non pauci amicorum suorum, ut se participes redderet domesticarum exercitationum, quibus chemiam assidue colebat. Horum itaque



que in gratiam, & ut ipsemet docendo magis confirmaretur; hunc laborem minime subterfugendum duxit. Neque parum isto se studio tam illis, quam sibi, profuisse sensit. Enimvero major erat cupiditas per chemiam speranda Medico doctrinæ emolumenta consequendi, quam ut retinere se ipsum posset, quo minus ardenti desiderio quovis modo satisfaceret. Florebat tunc artis hujus singulari laude *Caspar Cramerus* Medicinæ in vicina *Erfordienſi* Academia Professor longe celeberrimus, ad quem anno c1o1o c LXXX. ineunte proficiscebatur, seque omni officiorum genere in amicitiam tanti viri insinuabat. Multum ipsi profuerunt prælectiones chemicæ, quibus assiduo studio intererat: sed longe plus emolumenti ex domestica conversatione & quotidianis colloquiis ejusdem Medici percipiebat. In hoc secessu elaborabat ad dogmata potissimum *Helmontiana*, quæ tunc in scholis medicis regnabant, quibusque luce physicæ doctrinæ plenius collustratus nuncium remisit, dissertationem de *Autochiria*, quam circa finem anni Jenam reversus illustri *Wedelio* legendam & percensendam

offerebat, ut, si luce digna esset, sub ejus præsidio publice ventilaretur.

Enimvero tantopere commentatio hæc celeberrimo viro placebat ut *nostro* aperte declararet, tam egregium specimen majori præmio dignum se existimare. Ne vero ambiguum esset, quorsum hæc tenderent; suadebat *nostro*, ut se illis viris adjungeret, qui tum honores doctorales ab ordine medico petierant & propediem reportaturi erant. *Noster* vero sine consilio & auctoritate illorum, quos patrum loco venerabatur, tantam rem minime adgredi ausus, quum id excellentissimo *Wedelio* declarasset, ab ipso tunc Decano facile impetravit locupletissimum testimonium, quod tutoribus & proximis agnatis vel affinibus exhiberet. Quo viso illi facile assenserunt, ut oblatos honores ambiret. His auspiciis examina legibus præscripta subiit, & cum omnium calculos promeruisset, An. c I o I o c L X X X I. ultimo Januarii die de *Autochiria*, applaudentibus omnibus, disputavit. Hoc facto a. d. V. Februar. quum nondum vigesimum primum ætatis annum attigisset, doctorales in  
medi-

medicina honores , brabeuta & præcone toties dicto *Wedelio* , reportavit.

Enimvero *nostro* minime illa mens erat , quæ in pluribus conspicitur , qui publico eruditionis testimonio acquiescentes , non tam amplificandæ ac ulterius comprobandæ doctrinæ student , quam emolumentis cito reportandis inhiant. Vix doctorem è cathedra *Wedelius nostrum* dimiserat, quum jam flagraret cupiditate , maxime quidem laudabili, omnibus comprobandi quam esset docendo , cathedræque per se tuendæ idoneus : Periculum itaque virium sequenti Majo tanto cum successu fecit, ut disputatio , quam primam suis auspiciis habuit , de *cinnabari antimonii* , mox diversis formis recusa prodiret , quum admirabilis & profunda chemiæ, quam pandebat, doctrina lectores ubicunque alliceret. Est enim *Lugduni Batavorum* procurante celeberrimo *Paulo Hermanno* cl̄ōl̄ōclxxxv. 12. edita , & *Frankofurti ad Moen.* cl̄ōl̄ōclxxxix. 8.

Quantopere jam confiderent novi Doctoris *nostri* dexteritati ac peritiæ juvenes Academici, mox elucebat, quum prælectiones in chemiam & alias universæ medicinæ partes institueret. Majori enim numero & notabiliore ardore



dore ad scholas *ejus* confluebant auditores, quam ut æquo animo ferre posse viderentur illi, quibus ordinarium docendi munus demandatum erat. Annum itaque tempus, & quod excurrit utilitati artis cupidorum Jenæ impendit, hocque ad finem tendente de *morbo convulsivo ex viso spectro* novam disputationem publice proposuit.

Hoc facto Jenam tantisper relinquere statuit, ut crebrius repetitæ invitationi generosissimi & perillustres viri Domini *Joach. Martin. Unverfaerth*, Serenissimi Electoris *Brandenburgici* Consiliarii & principatus *Mindensis* Cancellarii, affinis sui dilectissimi, satisfaceret, jamque vacillanti valetudini suæ hac peregrinatione consuleret. E venerat enim ipsi, quod omnibus solet, qui intentius naturæ contemplationi & indagationi sese dedunt, ut corporum suorum robora inquieta cogitatione nocturnaque vigilia minuant: jamque hypochondriaci morbi rudimenta non obscure sentiebat, & cur pulmonibus suis à phthisi metueret, haud adeo læta percipiebat præfagia. Quum *Mindam* pervenisset, non solum ipsa itineris jucunditate admodum erectas & refocillatas vires mirabatur, verum etiam  
in

in honoratissimi affinis dilectissimæque sororis domo ita omnia ad votum suum comparata deprehendebat, ut redditum suum ad *Jenenses* musas, longius, quam initio statuerat, differre non dubitaret. Sed quum mox intelligeret, quam planam sibi tanti viri domus viam ad amicitiam summorum in illa provincia virorum panderet; divinoque beneficio contingeret, ut pluribus gravi morbo decumbentibus medicas manus singulari dexteritate nec minori felicitate admooveret; amantissimæque domus preces propriæque salutis rationes liquidissimæ accederent; statuit tandem Mindæ potius benevolentia præcipuorum virorum frui ac florere, quam se denuo invidiæ fluctibus ac valetudinis periculo *Jenæ* exponere. Sæpius memini me ex ore ipsius audire, quod admodum jam male afflicto corpore Jena digressus, itinerum ac vitæ magis activæ utilitatem tum primum recte cognoverit, quum à sedentaria vita semet subtraxisset. Atque ab eo tempore usque in senectutem id maxime tenuit, ut quantum fieri posset à sedendo sibi caveret. Quoties itaque aliquid meditabatur, deambulabat: quæ autem scribenda erant, inter ambulandum dicta.

dictabat. Habebat etiam complures semper, quibus dictabat calamo excipienda, vel describenda dabat, quæ recensuerat. Ita vero agendo & sibi proderat, valetudinem tuendo; & illis, qui, dum ipsi à manu erant, rerum utilissimarum ampla cognitione vix sentientes imbuebantur, & ad medicam prudentiam deducebantur.

Biennium hic lætus & felix exegerat, ubi animum cupido incessit, exteras etiam regiones adeundi. Primum itaque ad *Batavos* excurrit, ibique præcipuas & florentissimas civitates ordine lustravit, neminemque, cui ab arte & eruditione nomen paratum erat, infalutatum reliquit. Sed præcipue benevolentia celeberrimi Botanici, *Pauli Hermanni*, Professoris Lugdunensis, patria *Halenfis* delectabatur, qui hunc civem suum non solum peramanter hospitio excipiebat, verum etiam quovis officiorum genere demereri non desistebat. Navem deinde conscendit, & mense Julio in *Britanniam* trajecit, ubi per aliquot menses *Londini* & *Oxonii* exactos quicquid in physicis, anatomicis, chemicis vel mechanicis curiosum & utile obvenit, avide consideravit, & ex clarissimorum virorum con-



consuetudine fructum non mediocrem percepit. Sæpius tunc familiariter cum illustri Domino *Roberto Boyle* versatus fuit, qui non obscure significavit, se virtuti & eruditioni *nostri* magnum pretium statuere, quum ultro sæpe ad se accerferet, & de rebus chemicis ac physicis longum colloquium institueret. Sed & *Slarii*, *Crellii* aliorumque artis salutaris Antistitum amorem & benevolentiam sibi comparavit. Tam optato hujus itineris successu lætus Novembri mense Mindam revertebatur; pristinoque more se ægrotantium languoribus depellendis indulgebat.

Sequenti anno *MDCLXXXV.* præsidio militari, quod apud *Mindenses* collocatum erat, cuique generosissimus & admodam strenuus vir, Dominus *de Zieten* cum imperio præerat, Medicus dabatur, & præter honestum salarium multum benevolentia tam à summo harum copiarum ductore, quam à centurionibus & reliquis cohortium præfectis semper experiebatur, quoties cum ipsis aliquid esset negotii. Non hic subsistebat *HOFFMANNI* nostri felicitas, sed dexteritatem artis quotidiano usu auctam pari passu insequabatur. Gloriosissimæ enim memoriæ Prin-

Princeps *Fridericus Wilhelmus* Elector Brandenburgicus, ipsum totius principatus *Mindensis* Physicum provincialem An. cldlclxxxvi. constituebat, & honorificum Medici aulici titulum adjungebat. Sed & præcipui per illam provinciam & comitatum *Ravensbergensem* Nobiles suæ suorumque valetudinis curæ libentius gerendæ ipsum annuis stipendiis obligabant. Cumque his ita inferviret, ut præmonendo, consulendo, medendo industriam conservandæque valetudinis & vitæ studium omnes intelligerent, nunquam autem fostrum à quoquam ope sua uso exigeret, expertus est hanc sibi viam ad commendationem & opes etiam comparandas certissimam esse, à qua nunquam deinceps tota sua vita discessit.

Quum itaque ad votum omnia *nostro* hic fluerent, accidit, ut eodem anno jam ad finem tendente Status principatus *Halberstadiensis* ipsum ad se invitarent, quo locum provincialis Medici, morte ejus, qui munus id gesserat, vacuefactum, capefferet. Non ad spernandis conditionibus vocabatur, quum præter ordinarium, quo id munus gaudet, salarium multi ex præcipuis tam urbis, quam provinciæ, viris annum ipsi

ipſi ſtipendium decernerent. Nullus itaque dubitabat invitantibus obſequi. Dum vero abitum in annum ſequentem differt, interea novam excuſſionem, comite affine ſuo, Domino de *Unverſaerth* per *Brabantiam*, & *Hollandiam* inſtituit. Ineunte igitur vere An. *cloſo* *clxxxviii*. Halberſtadium petiit, incredibili omnium ſtudio exceptus. Artis crebra documenta inter omnes generis homines edebat, tantumque ſibi omnium amorem conciliabat, ut exſpectationi quiſque ſuæ abunde eſſe ſatisfactum fateretur. Eodem tempore ſolidam eruditionem ſuam medico orbi ostendebat tractatu *de inſufficientia acidi & viſcidi* in lucem edito; quo *Cornelii Bontekoe*, Archiatri *Brandenburgici*, & Profeſſoris medici in *Academia Francofurtenſi* hypotheſes, tunc novitatis eximia gratia florentes, de morborum cauſſis, eodemque ſubmovendi rationibus, oppugnavit, & multis tam ex theoria quam praxi rationali deſumtis argumentis ita deſtruxit, ut ex eo evileſcerent, plane ab omnibus exploſæ. Ejus autem ſcripti laudes vel attingere ſupervacuum fuerit, poſtquam doctiſſimi viri, qui *Acta Eruditorum Lipſiæ* ediderunt, ad-



modum honorifico elogio illud An.  
c1010CLXXXIX. mense Julio macta-  
verunt.

*Hornhusæ*, in principatu *Halbersta-*  
*dienfi*, larga aquarum salubrium scatu-  
rigo tunc prorumpebat; quo loco  
olim idem contigisse, sed mox defe-  
cisse, aliqui reminiscebantur. *Noster*  
in aquæ scaturientis naturam & vires  
accuratius tunc inquirebat, & incre-  
dibili hominum ægrotantium multitu-  
dini, quæ brevi tempore adfluebat,  
omni opera & studio consulere annite-  
batur. Hujus vero laboris fructum  
hunc habuit, quod tot ægrotos in-  
spiciendo, & malorum originem in-  
quirendo curationum quoque successus  
observando & consignando, artis pe-  
ritiam insigniter augebat, in diesque  
pluribus per rectorum consiliorum  
optatos successus innotesceret, & com-  
mendaretur. Exstat de hoc fonte scri-  
ptum vernaculo sermone tunc à *nostro*  
editum.

Eodem tempore coepit animum con-  
trahendo matrimonio adpellere, tamque  
felicibus auspiciis hoc negotium ad-  
gressus est, ut nulla re clarius forte in-  
telligatur, quam bene Numen propi-  
tium rebus *HOFFMANNI* nostri fa-  
verit,

verit, salutique ejus prospexerit, quam considerata matrimonii illius felicitate. Elegit enim, Deo sic dirigente, & electa jam anno ad finem properante ~~cl~~~~o~~~~c~~~~l~~~~x~~~~x~~~~i~~~~x~~. potitus est, virgine honestissima, & non minus venusto corpore, quam animo vera pietate, prudentia & mansuetudine ornatissima *Joanna Dorothea* viri integerrimi, probe docti & artis pharmaceuticæ consultissimi *Andreae Herstelle*, Pharmacopœi *Clausthalensis* & *Zellerfeldensis* unica filia, foemina ad exemplum proba & mariti per omnem vitam amantissima, cum qua per XLVIII. annos conjunctissime vixit. Deo enim visum fuit honestissimam matronam A. MDCCXXXVII. mortalium rebus eximere; de quo inferius dicendi locus recurret.

Circa hæc tempora ad exitum felicem deducebantur diu agitata consilia de Academia in *Halensi* urbe erigenda; jamque in eo erat, ut per omnes ordines eligerentur ac advocarentur viri celeberrimi, à quibus expectari poterat, fore ut Serenissimi conditoris spei ac voluntati fatisfieret. Aderant jam aliqui celeberrimi viri, qui omne sublimium disciplinarum bonarumque artium genus docendo famam novi *Heli-*

conis excitabant: jamque discendi cupidorum non manipuli, sed cohortes adfluxerant: erantque in illa multitudine studiosorum complures ex illustrissimis familiis orti juvenes: prorsus, ut quemadmodum ex vegeto germine præstantiam ac proceritatem stirpis, & ex primitiis fructuum messis ubertatem: ita ex primo hoc initio præsentem, quam intuemur, felicitatem novæ Academiæ augurari liceret. His sese FRIDERICUS HOFFMANNUS Medicinæ ac naturalis doctrinæ Professor primarius à Serenissimo Principe constitutus An. MDCLXXXIII. a. d. Mart. in publica cathedra primum ostendebat, initiumque publici muneris faciebat recitanda oratione de *Atheo ex artificiosissima corporis humani fabrica convincendo*: quam typis mox publicis exscriptam Perillustri Academiæ Fridericianæ Curatori ac Directori Dan. Ludolpho de Danckelmann dedicabat. Ita autem placuit illa eruditis viris, ut propter ullam numero Medicorum Theologorum pridem à pluribus adscriptus sit & inter præcipuos relatus, qui contra atheos calamum cum fructu effatu digno strinxerunt.



Prima ipsum & præcipua cura distinebat, ut de omnibus, quæ ad muneris suscepti rationes pertinebant, provide dispiceret. Conscripsit itaque facultatis medicæ statuta, eademque Serenissimo Universitatis conditori confirmanda obtulit: sigillum etiam facultatis, quali hodie utitur, invenit. Deinceps de collega medico cogitavit; cumque Dominus D. *Georgius Ernestus Stablius*, qui tunc Principi Saxo-Vinariensi faciebat medicinam, scriptis ad se litteris veterem amicitiam *Jenæ* cultam renovaret, seque ad novam Academiam evocari cupere ostenderet: aulæ ipsum meliori modo commendavit, & collegam ut expetiit, ita impetravit.

Proxima occupatio in usum præsentium studioforum dirigebatur, quibus in partes medicinæ omnes intimius deducendis omnem operam navabat, scholasque tam publicas, quam privatas aperiebat. Probabat autem illam medicinæ tam faciendæ quam docendæ rationem, quæ corporis curandi omnium partium structuram ex anatomica autopsia ante omnia exquirat; actionum autem, quas vivæ edunt, causas tam ex motuum æternis legibus, quam rerum, quæ in nos non

agere non possunt, ut aëris, aquarum, ciborum, medicamentorumque viribus insitis eruit & indagat, atque ad hoc tam physicis, quam chemicis & medico-practicis experimentis utitur. Atque anatomiae docendae una cum practica medicina provinciam nactus ejus multiplices utilitates ad practicum usum inculcandi occasionem crebram habuit; nunquam autem dimisit, sed luculento Academiae fructu eas administravit. Diu enim abdicaverat illa dogmatum genera, vel auctoritati veterum innixa, vel ex hypothese gratis adsumpta ratiociniorum intortorum ancipiti nexu, magno autem loquacitatis tractu derivanda.

Quumque non minus ea, quae vitam & sanitatem praestant, quam quae vel morbos inducunt vel eosdem expellunt; cujus generis sunt res externae, in scholis dictae non naturales, ex necessitate & certis legibus agant: non poterat utique probare illorum rationes, qui talibus insuper habitis, aut levissime tactis, principium aliquod vitale cogitans & intelligens praecipue respiciendum in medicina existimant, & ab illius vel sapientia vel erroribus omnia consequi arbitrantur. Gravi-  
ter

ter potius & creberrime inculcabat, animæ vires in corpus utique magnas esse & conspicuas, verum magis ad lædendum corpus ac variis morbis exponendum eam valere: quod adfectuum exemplo clarissime cognoscitur. Quicquid tamen vel mali hinc evenit vel boni, semper corporis statui alterando cedit; ut omnino Medicus non possit succurrere ulla alia parte, quam corporis rationem habendo, inque eo occurrentes motus vel dirigendo vel moderando aut omnino sopiendo. Urgebat autem præcipue illam medicinæ partem, quæ aëris, ventorum, regionum, aquarum, ciborum, potuum, vitæque generum insignes vires ad vitam sanam præstandam, morbosque avertendos; atque ex horum prava vel constitutione vel usu morborum ortus explicat; deinde vero vias recuperandi valetudinem & confirmandi ex eadem cognitione invenit & designat. In ipsa proinde medicina facienda ita pariter comparatus erat, atque auditores suos ita formabat, ut non sperarent à medicamentis ullis curationum optatos successus, tanquam illis perpetuæ & absolutæ vires inessent; sed ab ea corporum, quibus



offeruntur, conditione, quæ efficaciæ à medicinis exfertæ vel obsecundando vel resistendo & contra nitendo ad eas medendi vias ducitur, quæ præfenti curandorum statui maxime congruunt & ad salutem requiruntur. Hanc cognitionem in Medico vocabat rationem sive potius iudicium universæ Medicinæ præsidem, cujus beneficio omnium, quæ fieri aut facta esse vel ipsi videmus, vel ab aliis consignata legimus, causas invenimus, facileque cognoscimus, cur ab eodem medicamento vel auxilii genere hic optimos, alter pravos, alius omnino nullos effectus annotaverit. Ægrotantibus, aut in alicujus morbi initio positis, præcipue inculcabat, omnium aut saltem plerarumque ægritudinum sibi quemque causam esse; adeoque multum sane in unoquoque situm esse, ut vel immunis à morbis ad conspiciam ætatem perveniat, vel continuo delinquendo variis morbis obnoxius reddatur, vitæque exitum immaturum sibi contrahat. Multos itaque multarum medicinarum longo usu magis indies magisque corruptos ad emendatiorem valetudinis statum deduxit hujusmodi consiliis omninoque paucis & selectis

selectis medicinis apud tales, qui monitis audientes essent, plus effecit, quam antea infinita medicamentorum farrago & varietas potuerat efficere.

Qui medicinam ad naturæ universæ rationes ita revocabat optimo fane nascentis *Fridericianæ* fato ad physicam docendam fuerat admotus. Hujus enim tantopere ad humani generis commoda multiplicia comparatæ doctrinæ scholas aperiebat, non mera ratiocinia allaturas aut veterum traditiones repetituras; sed æque perspicuis ac jucundis experimentis omnia sensibus probaturas. Splendidissimum merito dicas primum illud auditorium decem illustrissimos Comites, sex Barones, complures nobiles & honestos alios auditores complectens. Admirabilis fane ardor ille commemoratione dignus visus est, quoniam & felicitatem novæ ac nondum solenniter dedicatæ Academiæ comprobat & præclaram fiduciam in docentis dexteritate positam ostendit. Nam quum is philosophiæ eandem partem sedecim ordine collegiis tractaverit, neque desissent qui omni molimine applausum hunc minuere conarentur: semper tamen habuit frequens & nobilissimis

civibus effulgens auditorium, & in eo viros jam publicis & honorificis muneribus admotos, qui assidua præsentia sua testarentur, quantum hujusmodi solidum docendi genus æstimarent, ipsoque exemplo fecus sentientium non satis sincera judicia refutarent.

Quum Serenissimus Elector Fridericus III. à suo nomine vocandam Universitatem ipsis Kalendis Juliis inaugurasset; postridie ejus diei *noster*, præsentibus Electore, aulæ, Universitatis & urbis proceribus decem medicinæ Doctores solenni ritu creabat. Finitis autem solennibus, quum Principi diutius Halæ commorari non liceret, isque abiens clementissime jussisset, ut patres Academiæ deliberarent, si quid ad salutem *Fridericianæ* in posterum tempus sanciendum existimarent; hi quidem re mature deliberata, duos ex suo ordine ad munificentissimum suum nutritorem miserunt, qui publica Universitatis negotia tractarent, & conficerent. Delectus autem cum Illustri ICTo & Consiliario Electoris intimo, *Samuele Stryckio noster* eo proficiscebatur. Atque hi duumviri non minori Universitatis bono, quam sua gloria, ex voto



voto perfecerunt, ut privilegia Academiae amplissima sancirentur.

Tertio Academiae natali magistratum ejus annum *noster* suscipiebat ab Illustri ICTO *Samuele Stryckio* ad se delatum. Vere dici potest, neminem forte ex omnibus, qui *Fridericianæ* in perpetuum prodesse annisi sunt, feliciori successu, quam FRIDERICUM HOFFMANNUM, primo hoc academico consulationu gavisum fuisse. Etenim hic fuit, cui licuit apud Perillustres *Ducatus Magdeburgici* Proceres efficere, ut viginti quatuor studiosis liberalem victum præbere annuerent; huicque beneficio mille thaleros in singulos annos præbendos adsignarent. Non satis hoc beneficio impetrato Academiam sibi obligasse sese existimabat, nisi plures eidem Principi devotas provincias exoraret, ut idem exemplum sequi vellent. Feliciter res succedebat, quum ad principatus *Halberstadiensis* Perillustres Status deferret. Nam cum plures ex proceribus patronos sibi omni obsequio & valetudinis ipsorum prompta felicique cura parasset: facile eos exoravit, ut pro duodecim studiosis liberaliter alendis quingentos thaleros decernerent, idque suum beneficium perpetuum

petuum sancirent. Ut vero tanto munere ad Reipublicæ emolumentum suumque verum commodum rectissime omnes uterentur : ipsemet tum hospitibus bonas leges præscripsit, tum etiam alumniis, quas à Perillustribus Patronis ac Mæcenatibus confirmatas promulgavit, & ut ab omnibus rite observarentur, eo majori semper studio quæsit, quoniam utriusque provinciae procures ipsum alumnorum suorum Ephorum legumque custodem constituerant.

Nec inter minima hujus magistratus referri debet quod *noster* apud Serenissimum Principem nutritorem impetravit, vel ex redditibus cœnobii *Hillerslebiensis* in ducatus *Magdeburgici* boreali limine inter *Haldenslebam* novam & *Wolmirstadium* siti, quingenti quotannis thaleri Academiae donarentur, pro collegio elegantioris litteraturæ fundando. Institutum hoc erat, ut in melioris ingenii & spectatioris industriæ aliquot juvenes quadringenti thaleri quotannis impenderentur, qui se, hoc auctoramento inducti, elegantiorum litterarum sollerti cura officiis scholasticis ardentius præpararent, ut essent idonei viri, qui scholis præfici  
ali-

aliquando possent. Huic tanto consilio susceptæ rei præficiebatur una cum venerando Theologo *Joach. Justo Breithauptio*, sacrorum *Hillerslebiensium* præposito & sacrarum litterarum Professore Seniore, vir undiquaque celeberrimus *Christoph. Cellarius*, eloquentiæ, antiquitatum & historiarum Professor Publicus, cui pro labore isto centum thaleri decernebantur.

Qui tanto *Fridericianæ* emolumento primum magistratum gesserat, eundem ordine ad se redeuntem ter suscepit, & cum summa integritatis laude sustinuit annis hujus sæculi quinto, decimo octavo, & vigesimo octavo. Accessit autem ultimo non exiguum additamentum oneris, quum Illustris quondam *JCtus. Nic. Hieron. Gundlingius*, ad quem fasces academici delati fuerant, longo satis tempore graviter decumberet, tandemque morte auferretur, vix dimidia temporis legitimi parte absoluta: quo fiebat, ut & languentem sublevare oporteret, & derelictum tandem magistratum resumere.

Satis hinc facile intelligitur, quam multum pro publico *Fridericianæ* bono *Hoffmannus* laboraverit. Sed non solum domi nulla in parte defuit ejus com-



commodis promovendis; verum etiam peregre missus ejus nomine dignitatem illius decore sustinuit. Nam post illam legationem, quam privilegiorum impetrandorum & amplificandorum causa suscepisse eum diximus, iterum *Berolinum* adiit, ut sollennibus exsequiis, quæ Reginae An. cl. 1705. memorabili pompa peragebantur, interesset: eodemque anno *Francofurtum ad Viadrum* mittebatur, ut illi Academiae, sæcularia gaudia celebranti, nostræ nomine gratularetur.

Quam celebre HOFFMANNI nostri nomen etiam primis academici muneris annis per omnem Germaniam fuerit, ex multis licet cognoscere. Nam non solum illustris *Academiae Cæsareæ naturæ curiosorum* Præses, *Lucas Schræckijus* eum ad Societatem honorifice & sponte invitavit, quantumque ejus in anatomicis, physicis & chemicis indagationibus industriam æstimaret, *Democriti* nomine imposito testatus est; verum etiam Perillustris *Leibnitius* eundem inter primos Regiæ *Scientiarum Societatis*, quæ *Berolini* ineunte hoc sæculo fundabatur, sodales adscribebat. Excitavit hoc nostrum ad observationes barometrico-meteorologicas adornandas,

das, quarum non nudas consignationes, sed ad usum applicatas & in ætiologiam epidemiæ constitutionis conversas condere ephemerides cogitabat. Exstat hujus operæ specimen, omnem annum c1010cc. complexum: cui præmissæ sunt curiosæ meditationes physicæ de ventorum causis eorundemque viribus & operationibus tam in hominum corpora, quam in barometra. c1010ccxix. in celeberrimam Regiam Scientiarum Societatem Britannicam receptus, cui dein observationes suas physico-chymicas inscripsit. Postea sub auspiciis *Societatis Scientiarum Russicæ* per *Blumentrostium* Archiatrum, genuinum ipsius discipulum, sodalis electus & per diploma transmissum, renovata illa Societate c1010ccxxxv. Kalend. Junii sub Præsidio Illustrissimi Ministri & Camerarii *de Korff*, pro membro honorario una cum Celeberrimi nominis in Anglia Medico Domino *Sloane* in classe physico-medica est declaratus.

Hic quoque amplissimus fane dicendi locus esset, si ex diurnorum libris exhibendi essent, quibus ægrotantibus opi & auxilio venerit. Neque tamen possum quin aliquot  
ex

ex maxime eminentibus & præcipuo loco positis attingam. Eminentissimus Elector *Moguntinus Lotharius Franciscus* ex primis erat, qui *nostrum* valetudinis tuendæ causâ ad se evocaverunt. Ad hunc sapientissimum Principem An. c1510cccii. profectus, in aula ejus aliquamdiu retinebatur ejusdem precibus; quippe cupiebat omnino, ut coram intuendo omne vitæ ejus genus, quæ vires corporis ejus essent, quæque proprietates, cognosceret, ut tanto commodius rectis consiliis & auxiliis succurreret. Quantam in ejus fide & dexteritate fiduciam poneret tantus Princeps, non solum tunc ostendit, verum etiam omni deinceps tempore. Non enim solum de suæ valetudinis statu sæpe ad ipsum clementissime scripsit; verum etiam consilium ejus in difficilioribus casibus ad forensam medicinam pertinentibus, sua manu exaratis litteris, indentidem requisivit. Eodem itinere ad aulas celsissimorum Landgraviorum tam *Hasso-Darmstadiensis* quam, *Cassellani* invitabatur, ut in rebus ad valetudinem Principum pertinentibus consilia suppeditaret. Atque sæpius deinceps ab aula *Cassellana* litteras accepit, quibus vel ad cura-

ratio-



rationem advocabatur, vel in medium consulere jubebatur.

Circa idem tempus *Cizam* revocabatur à Celsissima Principe *Maria Amalia* Potentissimi Regis Borussiae *FRIDERICI I.* Sorore, *Mauritio Wilhelmo* Duci Saxo-Cizenfi nupta: cujus gratia tantum florebat *HOFFMANNUS*, ut per plurimos deinceps annos sæpius vocaretur, nunquam non clementer habitus & honorifice dimissus.

Neque defuerunt magni Principes, qui ipsum in suas terras invitarent, & splendida satis munera offerrent. Sic factum à morte Celeberrimi *Meibomii* scimus, ut in Academiam *Juliam* ipsum pertrahere niterentur, quorum est de talibus negotiis deliberare. Neque minus ab aula *Guelpherbytana* in locum defuncti *Behrensii* Archiater desiderabatur. Omnium autem maxime serio & multum requirebatur, ut in *Cassellana* aula Archiatri munus capefferet. Enimvero omnibus se modeste excusabat *noster*, cui patriæ inservire pulcherrimum videbatur; aulæ autem servitiis se mancipare non solum molestum, sed cum periculo etiam multo conjunctum videbatur. Et sane plus gratiæ est magno & celebri Me-

N

dico,

dico, qui ad magnates vocatus venit, & peracto negotio abit, quam qui semel adstrictus cum empiricis omnis generis luctari, adversus invidiam autem, calumniam & fastum aulicorum perpetuas excubias agere debet, prorsusque sæpe cum gemitu sub magno strepitu boni viri officium exercere.

Anno cIdIdcciii. *Weisio* juniore Regis Borussiae Archiatro mortuo, nomine Regis, qui tunc temporis Magdeburgi degebat, nostro *Hoffmanno* ab Illustrissimo Camerario Comite de *Wartemberg* splendida hæc sparta fuit oblata, sed ipse humillime ob prætextam infirmi corporis valetudinem summam hanc clementiam deprecatus est; brevi vero tempore diplomate regio in numerum Consiliariorum & Archiatrorum est receptus, & vacuefactum Archiatri munus *Gundelsheimerus* ex Gallia redux obtinuit.

Anno hujus sæculi quarto rogabant ipsum aliqui aulæ *Berolinensis* primarii ministri, quibus auctor fuerat, ut thermarum *Bohemiae* Carolinarum usum experirentur, secum ut iter istud institueret, fontisque hujus aquis recte utendi modos edoceret. Hac occasione ita utebatur, ut naturam & vires admira-

admirabilis hujus scaturiginis ad examen accuratius revocaret. Quicquid igitur per complura experimenta tunc cognoverat, id omne cum publico communicabat, scripta eleganti dissertatione de *thermis Carolinis*, quæ sæpius typis renovata, & in vernaculum etiam sermonem translata legitur, cum pluribus aliis, quæ ad fontes soterios pertinentia deinceps observavit & in usus publicos convertit. Sæpius enim posthæc easdem Bohemiæ salubres aquas adiit, hortantibus ipsum Principibus aut aliis illustribus ægrotis, quibus spem emendandæ valetudinis ab hac medicina divinitus concessa fecerat. Factum hinc fuit, ut HOFFMANNUS magis magisque indies innotesceret: quum singulis annis magna ægrotantium multitudo ad thermas confluat: qui quum ipsius consilia pluribus fuisse salutaria intelligerent, non solum tunc iisdem uti volebant, verum postea etiam per litteras edoceri modos & vias ad salutem recuperandam proficuas desiderabant. Nolumus multa cumulare de summorum hominum personis, quarum saluti tuendæ aut recuperandæ fontium usum attemperavit: neque tamen reti-

N 2

cendum



cendum est, quod AUGUSTISSIMÆ IMPERATRICI cI<sup>o</sup>I<sup>o</sup>CCXX. thermis hifce utenti vocatus adfuerit, & quod deinde An. cI<sup>o</sup>I<sup>o</sup>CCXXXII. AUGUSTISSIMO IMPERATORI CAROLO VI. una cum AUGUSTISSIMA ad hos fontes profectis consilio adfuerit. Incredibili studio favebat Summus hic Christiani orbis Monarcha intelligendis harum aquarum principiis & constitutivis partibus, quas HOFFMANNUS coram per experimenta omnis generis demonstrabat. Non opus est hic multis commemorare, quam conspicuis summæ clementiæ signis Augustissimæ personæ hunc Medicum prosequutæ fuerint, quantisque magnificis muneribus exornatum dimiserint: illud certum est, quod & postero tempore non intermiserint, HOFFMANNI nomen honorifice commemorare & laudare industriam ac peritiam in se curandis comprobata.

Illis tam crebris itineribus in Bohemiam detexit *noſter* jam Anno cI<sup>o</sup>I<sup>o</sup>CCXVII. aquas amaro cathartico sale pollentes *Sedlicenſes*; earumque prima mentio publice facta est in  
differ-

differtatione inaugurali, quæ *observationes* & *cautelæ circa acidularum & thermarum usum & abusum* inscribitur. Sed quum post sex annos ad thermas rediret, *Augustissimæ* inserviturus, ejusque mentionem apud Celeberrimum & Perillustrem Archiatrum Cæsareum Dm. *Nic. Pium de Garelli* injiceret, horumque duumvirorum sententia illæ aquæ & ex iisdem paratum sal comprobatum commendatumque esset; mirum erat quantam mox celebritatem per universam *Germaniam* consequebantur.

Neque tamen his thermis solum, aut his, quas modo nominavimus, aquis *Sedlicensibus* illustrandi operam dedit, sed omnino ad omnes aquas foterias, & inter has præcipue ad acidulas, industriam suam convertit. Infederat nostratium animis pervulgata opinio, quod thermarum & acidularum natura toto, quod ajunt, coelo distet, & quod hæ acidum aliquod foveant. Ostendit autem *no-*  
*ster* perspicue quod non solum ab acido longe distent acidulæ; quippe potius alcalini salis prædominio infi-  
N 3 gnes;

gues; sed quod omnino à thermis acidulæ uno tantum illo discrepent, quia calore destituuntur. Primus itaque fuit noster HOFFMANNUS, qui docuit, acidulas & minerales aquas cum lactis connubio tuto & cum singulari fructu esse potandas, quod olim valde exitiosum habebatur à Medicis, qui harum aquarum naturam ignorabant. Præterea quam optime docuit justos omnibus his fontibus utendi modos, cum omnibus cautelis, quæ ex modo illarum aquarum operandi & corporum, in diversis ab ætate, temperamento & morbo constitutionibus diverso statu resultant. Tantum igitur abest, ut nobilissima hæc sanitatis principia, quæ Deus humano generi ex terræ visceribus suppeditat, abusibus pristinis reliquerit, aut persuasionibus ab empirico & imperito usu olim stabilitis obnoxia eadem passus fuerit: ut omni nisu ad rationalem usum ea revocaverit. De aliquibus fontibus seorsim commentando, ut de *Selteranis* & *Lauchstadiensibus* quorum insignissimum, tum in avertendis, tum in debellandis contumacibus morbis usum primus omnium recte detexit,  
&



& peculiaribus de iisdem conscriptis dissertationibus docuit, ut inde famam celebritatemque non modo per Germaniam, sed per plurimas quoque exterarum regiones testimonii sui auctoritate consequuti sint, in non leve urbium, apud quas scaturiunt, incrementum, & incolarum, quod gratissimo etiam animo agnoscunt, emolumentum.

Crebrorum ad fontes *Carolinos* itinerum etiam ille fructus erat, ut Potentissimo Regi Borussiae FRIDERICO I. propius innotesceret. Nam quum An. MDCCVIII. quo Rex fontium horum usum experiebatur, multi ex præcipua nobilitate viri medica HOFFMANNI opera uterentur, & ad salutationis officium admissi prædicarent viri hujus peritiam: jubebat Rex ipsummet ad se vocari, multaque de suæ valetudinis statu colloquutus, jubebat ut ad se frequentius veniret. Id quum faceret HOFFMANNUS & Rex Clementissimus non obscure ostenderet, se viro huic multum confidere & eruditis sermonibus ejus plurimum delectari: jam tunc aliqui non ob-

scuris signis ostendebant, quam suspectum ipsum haberent; suæ scilicet estimationi decessurum rati, quantum Rex huic tribueret.

Anni hujus ultimis mensibus Rex Potentissimus adversa valetudine graviter affligebatur. Et quum nulla medicina constantem ferre opem videretur; in mentem Regis veniebat HOFFMANNUS, à Serenissima sorore sua toties ipsi commendatus & nuper ad *Carolinas* thermas propius cognitus. Jubebat igitur per celeres nuncios eum protinus advocari, ut inter cæteros Medicos salutis regię curam fusciperet.

Non recusare HOFFMANNUS poterat, quod Rex serio volebat; quamquam bene intelligens, quam sit lubrica aulicorum virorum fortuna atque vita omnis libertatis & quietis ratione animi & corporis expers: Abiit igitur jam ad exitum vergente anno, divino numine fretus & sapientissimi Regis gratiæ confusus. Atque primo statim adventu suo industriam fidemque suam Regi adeo probabat, ut is propriæ voluntatis instinctu

stinctu nostrum inter Confiliarios aulicos adscisceret & Archiatrorum suorum collegio, cum amplissimo salario, illum adjungeret. Provide tamen HOFFMANNUS, sibi academicum munus conservari, petebat: quum semper tranquillis musis inservire, quam in aula continuo versari satius putasset: cui desiderio Rex clementissime adnuebat.

Ab hoc itaque tempore HOFFMANNUS per tres solidos annos, & quod excurrit, tanta fide tamque promptis & paratis obsequiis inserviebat aulæ, ut Regi Reginæque abunde satisfaceret, neque unquam in ipso vel fides & assiduitas vel dexteritas desideraretur. Non autem modici laboris res erat, Regi haud firmissima valetudine prædito per hibernos menses & gravibus pathematibus vexato inservire: sæpeque integras noctes corporis proprii necessariæ curæ subtrahere, & cum diebus noctes continuare opus erat.

Neque minus Regina ipsi laborem facebat pathematibus, subinde gra-



vioribus, obnoxia. Has tamen ærumnas, utpote officii partes facile superabat, & conscientia recte diligenterque navatæ industriæ molestias omnes inde enatas solabatur: præsertim quum Regias personas clementissima voluntate se prosequi intelligeret. At vero ipsa muneris sui tam diligens cura & indefessum illud studium omnes officii demandati partes implendi objiciebat ipsum molestissimæ invidiæ, mox etiam capitalibus odiis, collegarum præsertim *Andree Gundelsheimeri* qui nunquam promotus, quum Celeberrimo *Tournefortio* Regis Galliæ sumtibus itinere per *Græciam* & *Ægyptum* instituto adfuisset, aulæ Berolinensi redux commendatus, violentas medicinas etiam ex regia familia ortis porrigebat, cui *noster* modeste conscientiæ vi impulsus contradicebat. Multa dici hic possent de controversiis *HOFFMANNO* valde molestis, quæ ipsi cum hoc viro intercesserunt. Quum vero neminem magnopere juvare posse videatur hæc recensio; ista vero, quæ ad concertationis hujus causam pertinent, in *Medicinæ Consultatoriæ* vol.

vol. I. pridem legantur ample exposita, malumus rem totam sicco pede præterire, postquam in vivis esse pridem defierunt, qui tunc adversarii gravissimi fuerunt. Certe ab HOFFMANNI moribus alienissimum fuisse, ut ullum unquam hominem laceggeret, ex eo cognoscitur, quod nullius unquam controversiæ initium ipsemet fecit: & quod multis satis diserte contra se insurgentibus, quin fere insultantibus, nihil omnino respondere, rei que dijudicandæ arbitrium erudito orbi permittere maluit, quam disceptationibus bonas horas disperdere. Quicquid autem hic fecit, quo adversarius irritatus fuit, ita cum jurata fide, qua obstrictus tenebatur, arcto vinculo cohærebat, ut sine officii neglecti gravissimo reatu non potuisset omitti.

Ob plura itaque & gravia tædia aulica dimissus HOFFMANNUS repetebat dilectissimam patriam Anno MDCCCXII. mense Junio & ad intermissas aliquamdiu occupationes academicas tanto majori alacritate redibat, quo majorem ex illo otio dulcedinem

cedinem jucunditatemque nunc percipiebat. Non possum quin hoc loco commemorem, quæ medicus *Jo. Papius* ad *Keplerum* scripsit epist. de vita aulica XL. p. 76. *non est, quod mireris consilium meum de migratione in Borussiam, locum minus, ut videri potest, tutum. Expertus ego sum huc usque vitam primam academicam tunc hic (Onolsbachii) aulicam: contabesco propemodum recordatione vitæ academicæ, tanta ejus est bonitas, si cum cæteris conferatur. Huic si accedat copiosæ praxeos, ut nos loquimur, facultas, regiam fere vitam dixero. In aulis est splendida miseria, imo omnis aularum ratio liberalibus ingeniis est inimicissima.*

Si quid temporis relinquerent vel studiosæ juventutis institutio, vel ægrotantium querelæ, id ita dividebat, ut partem impenderet scriptis olim editis nunc recensendis & per fasciculos edendis, aliquibus etiam ab integro condendis, partem alteram tribueret naturæ per experimenta chemica profundius scrutandæ. Hinc factum est, ut ab illo tempore *dissertationum* olim emissarum *decuriæ* apud *Batavos* excuderentur; aliquis etiam fasci-



fasciculus , ad thermas & acidulas pertinentia complexus , *Ulmæ* prelum subiret : quem mox alius excepit , qui diversi argumenti minora opuscula antea separatim edita , conjungebat.

Prope jam sexagenarius animum adjiciebat condendæ Medicinæ rationali systematicæ , cujus primam partem luci publicæ sistebat anno 1800ccxviii. quam cæteræ ad hunc usque præsentem , quo ultimam manum operi immortalis futuro octogenarius imponit , per justa intervalla exceperunt. Merito videntur reprehendendi , qui ad medicinæ vel cujuscunque artis , quæ rationibus per experientiam longam comprobandis & firmandis constat , systemata condenda juvenes accedunt , alienaque fide conscribunt , non satis intellecta. Ex quibus dum multa ratiociniis potius consentaneis , quam certa scientia eruunt , curandique methodos eliciunt : fit ut & ipsi ætate jam provectiores & experiendo cautiores facti , multa inveniant , quæ corrigant , & alii eorum præscripta sequuti , ægrotantes non  
paucos

paucos pessumdent. Quod si ad scribendum nemo accederet, nisi multum experiendo confirmatus; in experiendo autem ratione prælucente duceretur ut eventuum causas rite erueret; brevi omnino futurum videtur, ut certum, quod sequamur, minime obscurum esset, dissensionumque infinita multitudo aut omnino tolleretur, aut ad insignem paucitatem redigeretur. HOFFMANNUS certe, qui tot annos docendo & artis opera edendo consumserat, semperque eventus fideliter notatos accurata & repetita meditatione ad veras causas revocare annifus fuerat; ostendit suo exemplo, quantum in rationibus inveniendis & reddendis feliciores sumus majoribus, qui eandem rem moliti fuerunt. Quemadmodum vero ad lucis claritatem cognoscendam nulla alia re opus est nisi oculo sano & aperto; ejusque usura omnibus jucunda & utilis accidit: sic omnino *Hoffmanniana* de medicis doctrinis præcepta ita universis, ad quos ea penetraverunt, facilia, plana & luculenta sunt visa, ut vix alius liber nostra patrumque memoria æquali plausu

fu susceptus fuerit. Nam quum biblio-  
pola , apud quem primum emissa fue-  
runt , plerasque partes bis terve re-  
novare debuerit ; exteri autem in ejus  
messum involaverunt & tam extra  
*Germaniam* , *Venetiis* & *Basileæ* , quam  
in illa *Francofurti* , recudendum illud  
medicinæ systematicæ opus suscep-  
erunt ; invito quidem auctore omnes  
præter honestissimos illos viros *Lugdunenses* , à quibus omnium suorum scri-  
ptorum editionem fieri non solum  
consensit , verum etiam exempla pas-  
sim correctâ & locupletata iisdem  
suppeditavit. In *Gallicum* sermonem  
conversæ medicinæ systematicæ pri-  
mam partem , & *Parisiis* emissam ,  
his diebus conspeximus. In quo tam  
egregio opere , qualem se præstiterit ,  
sera etiam posteritas livoris expers lon-  
ge adhuc apertius prædicabit. Eodem  
tempore , quo ad medicinam rationa-  
lem systematicam accedebat , alius uti-  
lissimi operis editionem aggrediebatur.  
Nam quum tot annis sæpius accidisset,  
ut vel ordinis medici nomine re-  
spondendum esset de casibus propo-  
sitis , vel ad medicinam forensam vel  
curandorum salutem pertinentibus ;  
neque



neque minus crebræ imo longe etiam frequentius ad ipsum solum directæ adferrentur litteræ, quibus consilia expetebant vel ipsi decumbentes, vel de illorum salute solliciti Medici: cœpit illa colligere & per fasciculos edere sub titulo *Medicinæ Consultatoriæ*.

Atque hujus jam duodecim tomi, quorum quisque decurias quinque complectitur, prodierunt vernaculo sermone. Curavit autem ut inde selecta quædam in latinum sermonem transferrentur & ederentur consilia: quod opus vix apud nos prodierat, quum jam binis locis, ut Amstelodami & Francofurti ad Moenum, recensum conspiceretur.

Putares virum tot scriptis elaborandis, tot consiliis scribendis occupatum non aliis semet indulgere potuisse laboribus. Enimvero longe aliter se res habet, plurimique sunt, quibus vel in hac urbe, vel peregre degentibus operam suam navavit, ut graves morbos devincerent. A quo enim tempore, aula relicta, huc reversus est, vix ulla aula Serenissimorum Principum

cipum Saxoniae aut Anhaltinorum fuit, quæ non HOFFMANNI opera & consiliis usa fuerit, eumque identidem ad se invitaverit. Schwartzburgicus Princeps semel iterumque ad se eum vocavit, sub cuius clementia per auctoritatem Imperatoriam A. 1699. cccxxvii. mense Jul. Comitis Palatini munus gratiose obtinuit. Cassellas ad Serenissimi Landgraffi curationem expetitus ivit, ut & Guelpherbytum ad Principis salutem procurandam accitus fuit. Longum foret, si Principes, Comites aliosque ex prima nobilitate proceres recensere velim, quorum valetudini tuendæ, aut languoribus tollendis consilia misit: aut si enumerare velim, quot magnates ex remotis regionibus huc venerint & curandos se ipsi præbuerint, magnumque fructum ab ipso consequuti sint. Nolumus quoque hic referre, quantum per omnem vitam temporis impenderit litterarum commercio, quod cum summis nostri ævi, & Medicis & Philosophis, maximeque cum magno Leibnitio, Imperatoris Regumque Archiatris, & plurimis Professoribus tam in-quam extra Germaniam de rebus physicis ac medicis ha-

buit ; de quibus alio forte tempore meminisse juvabit.

Anni cIdIdccxxxiv. ætate jam adulta HOFFMANNUS *Berolinum* accedebat, ut ibi habitantes carissimos, generum filiamque unicam cum familia ipsorum, inviseret. Accidebat tunc, ut triste nuncium adferretur de gravissimo & fere desperato viso morbo, qui potentissimum Regem in castris ad *Rhenum*, corripuerat. Quum jam in eo esset, ut ad nos reverteretur, non solum regii Ministri suadebant, sed clementissima Regina jubebat diutius subsistere, ut ad manus esset, si consilium ipsius expetendum videretur. Et sane eadem vespera, quæ Regem *Postdamio* reddiderat, celerrimo nuncio accersebatur; quo non parum faciebat, quod Celeberrimus Batavorum Medicus *Hermannus Boerhave* de morbo consultus *nostri* potissimum opera uti suaserat. Non levis erat morbus, qui optimum patriæ patrem adfligebat, ejusque initia jam à tertio anno infederant, & mora fuerant confirmata. Asthma erat hydropicum, quod omnino plus terroris, quam bonæ spei  
osten-



ostendebat: omninoque magni viri, quorum consilia requisita antea fuerant, aperte declaraverant, quod plus metuerent, quam bene sperarent.

Enimvero Dei clementiæ tribuendum est, quod ex ingenti discrimine liberatum patriæ patrem recuperavimus. Neque parum effecit animus Regis inter tot molestias semper alacris, numquam earum gravitate depressus, rectisque consiliis audiendis ac admittendis paratissimus. Nunquam enim diætæ præscriptas regulas migrabat ac medicinarum usui sese libenter præbebat.

Quinque mensium spatio consumto, quo tempore HOFFMANNUS regiæ valetudini recuperandæ una cum eruditis & celeberrimis viris, *Horchio* præcipue ac *Ellero* ad eandem curationem vocatis, præcipuam operam dederat, id omne effectum dabatur, quod infinita hominum millia ardentissimis precibus à summo Numine efflagitaverant. Pater patriæ non solum immunitatem à doloribus & molestiis consequutus erat; verum etiam pristinas vires, Dei

munere, collegerat, ut prodire & negotiis solita alacritate peragendis impendere se posset. Evenisse tum omnibus diceret, quod Alexandri militibus, cum is Philippi Medici arte & cura confirmatus subito in conspectum illorum venit, ut quemadmodum illi non avidius ipsum Regem quam Philippum intuiti fuerant, ita omnes pari admiratione & Regem & HOFFMANNUM adspexerint, ac pro se quisque gratiam habuerint regiæ valetudinis ac vitæ post Deum statore ac conservatori sollertissimo.

Jam vero Rex Clementissimus nihil omittebat, quo HOFFMANNUS ostenderet, quanta ipsum gratia complecteretur. Non solum splendidis muneribus laborem ac studium tanto tempore exantlatum compensabat, verum etiam sæpissime, præsentibus legatis ac proceribus, profitebatur, quod post Deum immortalem recuperatæ valetudinis beneficium ipsi deberet. Ornandum itaque honoribus etiam clementissime censuit: tantoque id magis se etiam facere professus est, ut orbis cognoscat, quantum amet, virum, quem

quem alio tempore inimicorum malæ artes in eadem aula opprimere conatæ fuerant. Sua igitur sponte ipsum *Consiliariorum intimorum* ordini adjunxit, filioque unico cognomini, paternarum virtutum æmulo, inter *Fridericianæ* Academiæ Professores medicos ordinarios locum tribuit & Consilarii aulici honorificam dignitatem adjunxit.

Neque minus fuit in Clementissima Regina studium HOFFMANNO benignissimam voluntatem suam declarandi. Nam inter alia præclarissima munera donavit ipsum sua imagine quam celeberrimus pictor summo artificio elaboraverat: ab eodemque pingi HOFFMANNUM jubebat, ut in regio secessu Monbijou collocaretur. Scripta etiam viri omnia mitti sibi jubebat, bibliothecæ ejusdem arcis inferenda. Sæpius inter hæc proponebatur ipsi, cupere utique Regem & Reginam, ut in propinquo esset, promteque posset, si quid accideret, ad opem ferendam advocari. Enim vero excusabat sese iisdem argumentis, quibus quondam apud Regem *Davidem* Senex Barfil-



læus fuerat usus ; & opus esse dicebat , ut in tam adulta senectute ad vitam beatam se præparet , & breve , quod ipsi vivendum sit , tempus medicinæ suæ systematicæ ad finem perducendæ & consiliis saluberrimis dandis impendat : neque minus clementer admissa hujus excusatio fuit , quam illius fuerat.

Mensis itaque Aprilis cIdIdccxxv. initio Clementissimo Regi valedixit , ac non sine multa gratiæ propensissimæ significatione , cui osculum Rex adiciebat , dimissus fuit. Ad suos salvus omnino redux maximo gaudio non solum domi suæ , à qua octo mensibus abfuerat , exceptus , verum etiam Academiæ & urbis studiosissima congratulatione , quæ venerandum senem , tanquam præcipuum decus suum & ante observaverat , & nunc tanto ardentius excipiebat , quum tot præclaris laudibus illud meritum divinum Numen adjecisset , quod Regem optimum & clementissimum servavisset.

Crebris ab eo tempore litteris , etiam ipsissima Regis manu signatis , & insigni-

gnibus muneribus per singulos fere annos transmissis certior redditus fuit de propensissima in se voluntate, qui non semel regia sua manu testatus est, vitæ suæ conservationem post Deum ipsius curæ deberi. Ut vero etiam Academia Fridericiana, cujus Senior jam est, cognosceret, quantum Rex cupiat consilia hujus tam multorum annorum usu exercitati viri, apud eam plurimum valere, Augustali libello jubebatur, nullam rem alicujus momenti absque ejus consilio & sententia perficere.

Tam felicem & fortunatam HOFFMANNI senectutem haud modice interpellabat An. cl<sup>o</sup> 1000 cccxxxvii. gravis morbus, qui dilectissimam ejus conjugem, qua cum per xxxxxviii. annos conjunctissime vixerat, ab ipso divellebat, in placidam ejus mortem terminatus. Sed hoc quoque adversum eo animo; qui Christianum & Philosophum decet, perferebat moderatissime, atque cogitationes à tristibus avertendo impendebat piis meditationibus. Eo enim tempore omnem *Christianæ doctrinæ summam* perspicua

& nervosa brevitate verbisque latinis complectebatur & cum publico communicabat.

Quum de eo scripto apud Regem Clementissimum mentio facta esset, illeque gratiosissimis litteris ostenderet, se cupere, illud etiam vernaculo sermone exstare; non poterat defugere jussum, efficiebatque ut primo quoque tempore germanica lingua legeretur.

Nuper elapsi anni cl<sup>o</sup>l<sup>o</sup>ccxxxviii. æstate gravissimus morbus febrilis optimum virum occupabat & non mediocriter affligebat: prorsus ut multis metuendi causæ plures & majores, quam bene sperandi viderentur. Divino tamen munere factum est, ut recuperaverimus virum, ipsiusque vegeta & alacri senectute gaudeamus, nuper octogesimum annum feliciter ingressa. Ultimo nec reticendum esse puto suum connatum quasi in extrema ætate discentibus inserviendi studium; siquidem per integros jam octo annos eam publice docendi iniit rationem, ut auditores, theoreticis præceptis



ceptis bene instructos, recta medendi scientia imbueret. Quem in finem quovis semestri collegium medico-practico-clinicum aperuit, in quo accurate conscriptos & ab exteris ad se transmissos casus communicavit, & ex his veras tam proximas quam mediatas causas solide eruit, quibus dein genuinam sanandi methodum superstruxit ac candide docuit. Dicitur vix potest, quem singularem plane fructum ac usum ii inde percipiant, qui artem salutarem feliciter & cum laude exercere cogitant. In tota enim medica scientia plurimum sibi observatio & longus rerum usus vendicat, qui optimus medicinæ interpret & docendi discendique magister merito prædicatur.

Faxit Deus ut non solum hunc jam ingressum octogesimum optabili valetudine perficiat, sed & multos deinceps annos subjungat: ut optimo viro, communi utique bono, patria urbs, Fridericiana Academia, Regia domus, universum genus humanum, quibus commentando ac consulendo prodest, diutissime salvo & incolumi perfruantur.

Atque nunc sermonis filum abrum-  
po commentandique finem facio.  
Satis tenuiter hæc de summis viri me-  
ritis esse tradita, ipsemet agnosco:  
quamquam, quod multa dici porro  
potuerint, aut debuerint de laudibus  
ejus, optime video. Quoniam tamen  
ad hanc scriptionem accedere nisi  
impetrata venia & exoratis subsidiis  
nolui; non alia autem conditione il-  
lam nactus sum, quam ut parcerem  
modestiae ipsius, quæ professam lau-  
dationem minime perferre potest: sim-  
plici hac vitæ factorumque recensione  
defungendum fuit. Certe non deerit  
amplissima dicendi materia cuicunque  
ad laudandas virtutes, quæ illustres &  
summæ in eo eluxerunt, progressuro:  
atque ut vitæ etiam annorumque se-  
ries, longius divino beneficio produ-  
cta, plurima, quæ his addi debeant,  
facta suppeditet, omnibus votis ab il-  
lo expeto, qui vitam resque mor-  
talium omnes liberrimo arbi-  
trio moderatur.

# CATALOGUE

des Livres

Qui se trouvent chés

Jean Christ, Imprimeur & Marchand  
Libraire à Basle.

---

*De son Impression.*

---

Livres François.

**T**Raité des Tribunaux de Judicature, où l'on examine ce que la Religion exige des Juges, des Plaideurs, des Avocats & des Témoins. Avec une Préface, où l'on prouve, que la justice est la source de la tranquillité, de la gloire, & du bonheur des Etats Civils. Par *Pierre Roques*. 1740. 4.

Dissertation historique sur les Duëls & les Ordres de Chevalerie, par Mfr. Basnage. Nouvelle Edition. Avec un Discours Préliminaire, où l'on entreprend de prouver, que le Duël fondé sur les maximes du point d'honneur, est une vengeance barbare, injuste & flétrissante. Par *Pierre Roques*. 1740. 8.

Dissertation sur les Eaux & le Sel de Sédlitz en Bohême, traduite du Latin de Mfr. Fréd. Hoffmann, Médecin de Sa Majesté le Roi de Prusse, Professeur dans l'Université de Hale, & membre de la Société Royale des Sciences de Londres; avec quelques Additions tirées d'une Traduction Allemande, & approuvées par l'Auteur. 3.

Lettres Françoises & Germaniques, ou Réflexions Militaires, Littéraires, & Critiques sur les François & les Allemans. 8.

Essay sur le Siècle de Louis XIV. par Mr. de Voltaire. 8.

Histoire de Louis XIV. par Mr. de la Hode enrichie



chie de Médailles in 4. Tome I. & II. le troisième sous presse.

### Livres Latins.

Aug. Guil. Busbequii Opera omnia quæ extant :

I. Legationis Turcicæ Epistolæ IV.

II. Exclamatio f. de Re militari contra Turcas instituenda consilium.

III. Solimanni, Turcarum Imperatoris, Legatio ad Ferdinandum Rom. Cæs.

IV. Busbequii Legat. Gallicæ ad Rudolphum II. Imperatorem Epist. LIII. Præmissa est vita Auctoris; summa cum fide ac diligentia denuo recognita, & aucta locupletissimo indice, 1740. 8. Editio splendida.

Georgii Bulli Harmonia Apostolica, seu binæ dissertationes, quarum in priore doctrina D. Jacobi de Justificatione ex operibus explanatur ac defenditur: In posteriore, consensus D. Pauli cum Jacobo liquido demonstratur. 1740. 8.

Petri de Vineis, Judicis Aulici & Cancellarii Friderici II. Imp. Epistolarum, quibus res gestæ ejusdem Imperatoris, aliaque multa ad Historiam ac Jurisprudentiam spectantia continentur, Libri Sex. Novam hanc Editionem adjectis variis lectionibus curavit Jo. Rudolph. Iselius JC. Accedit Simonis Schardii Hypomnema de fide, amicitia & observantia Pontificum Rom. erga Imperatores German. 2. Vol. 8. 1740.

M. Manilii Astronomicon. 1740. 8.

Jo. Christ. Wolfii Curæ Philologicæ & Criticæ in omnes Libros N. T. V. Tom. in 4. 1741.

Friderici Hoffmanni, Tractatus de Morbis Infantum præcipuis, cui accedit vita Auctoris. 8.

### Teutsche Bücher.

Christliche Dank-Predigt auf das durch Gottes Gnad erschienene dritte Jubel-Jahr der A. 1440. vermittelt Göttlichen Besandes erfundenen höchst schätzbarsten

barsten Buchdrucker - Kunst , gehalten zu Basel in der Kirche bey St. Elisabethen , von Herrn August Johann Burtorff Pfarrer in daselbst ; samt dem Carmine , welches die dieser Edlen Kunst Ge-  
flüssene dem ganzen Hochweisen Magistrat danckbar-  
lich abgestattet. Auf extra schön groß und weissem Schreib-Papier in 4.

L'on trouve aussi chés lui les Livres suivans de l'Impression de son Beau-Père Monsieur Jean Brandmüller, l'ainé.

### Livres François.

**D**ictionnaire Historique de Louis Moréri , dernière Edition de Bâle , augmentée de 6000. Articles en VI. Tomes in fol. avec le Supplément en II. Tomes qui va être mis sous presse incessamment.

Dictionnaire de la Langue Françoisse ancienne & moderne de *Pierre Richelet* , contenant généralement tous les Mots anciens & modernes , avec plusieurs remarques sur la Langue Françoisse , ses Expressions propres , figurées & burlesques , la Prononciation des mots les plus difficiles , leur Ortographe , le Genre des Noms , la Conjugaison des Verbes , leur Régime , celui des Adjectifs & des Prépositions , & les Termes les plus communs des Arts & des Sciences , le tout tiré de l'usage des bons Auteurs , revû , corrigé & augmenté des Mots Latins , des Termes & des Phrases Proverbiales , qui manquoient dans les précédentes Editions , & d'un grand nombre d'Exemples. Avec un abrégé de la Vie des Auteurs dont ces Exemples sont tirés. 3. Vol. in fol.

Histoire du Concile de Trente , écrite en Italien par Fra Paolo Sarpi , de l'Ordre des Servites ; & traduite de nouveau en François , avec des notes Critiques , Historiques & Théologiques , par Pierre Franc. le Courayer , Docteur en Théologie de l'Université d'Oxford , & Chan. Rég. & Anc. Bibliothécaire de l'Ab-



L'Abbaye de Ste G nevi ve de Paris suivant l' dition d'Amsterdam de 1736. 2. Vol. in 4.

**Le vrai Pi tisme ou Trait **, dans lequel on explique la nature & les effets de la Pi t ; la juste  tendue du renoncement au monde; o  l'on remonte   la source g n rale du peu de vertu qu'il y a entre les Chr tiens; o  l'on indique les moyens d'acqu rir une Pi t  solide; & o  l'on fait conno tre, comment la Pi t  nous dispose   l' gard de ceux qui ne pensent pas comme nous en mati re de Religion. Par *Pierre Roques*. 4.

Oeuvres de Mr. Voltaire, 3. Vol. 8. Le 4me Vol. sous presse.

Spectateur, 6. Vol. 8.

Mentor Moderne, 3. Vol. 8.

Babillard, 2. Vol. 8.

Grammaire M thodique Fran oise & Allemande.

Jean Fr d. Ostervald l'Exercice du Minist re Sac . 1739. 8. reconnu de l'Auteur.

La Nature & l'Excellence de la Religion Chr tienne trad. de l'Anglois, avec une Pr face par Burnet, Ev que de Salisbury. 8.

## Livres Latins.

Hollandi Publica Criminalis Vindicta in partem generalem & specialem divisa: In qua omnes doctrinae Rerum Criminalium in genere ac in specie perspicue & succincte tractantur, cuncti in universum articuli Constitutionis criminalis Carolinae, licet non secundum ordinem, tamen secundum genuinum sensum competenti titulo ac loco in foliis annotato declarantur, Autores praecipui eorumque consilia, responsa ac disputationes non solum, sed & jura atque statuta plerorumque Electoratum, Principatum, Rerumpublicarum ac Civitatum Imperialium partim allegantur, partim explicantur, ac casus sententiis Facult. Jurid. confirmantur, simulque rationes poenam aggravantes & mitigantes traduntur, &c. 4. super chart. script.



Jo. Frid. Ostervaldii Compendium Theologiæ Christianæ. 1739. 8. ab Authore recognita.

Ejusdem Ethicæ Christianæ Compendium, Editio altera, ab Authore recognita, & plurimis mensis, quibus scatebat Editio Londinensis, repurgata. 1739. 8.

Joh. Alphonfi Turretini Commentarius Theoretico-Præcticus in Epistolas D. Pauli ad Thessalonicenses. 1739. 8.

Puffendorffii de Officio Hominis & Civis, juxta Legem Naturalem libri duo. Suppl. & Observat. auxit & illustravit Gerschomus Carmichael. 8.

### Teutsche Bücher.

Neuvermehrtes Historisch- und Geographisches Allgemeines Lexicon, 4. Theil, fol. samt dem Supplement in 2. Theil, in fol. so unter der Press ist.

Bibel D. Martin Luthers Übersetzung, neue Auflage von 1739. auf stark Druck-Papier, in groß fol. Der Druck ist mit extra grober Schrift vor alte Leute, oder vor sothane, die ein blödes Gesicht haben.

Die nemliche auf ganz weiß Papier.

Historien-Saal, 5. Theil. 4.

Die vernünftige Tadelrinnen, 2. Jahr-Theile. 8.

---

I 7 4 I.

---



